

# Muselu Wapama wa Yesu Kirixtu woolebiwa ni Matewuzhi

## Madhu oovolowana

Niivuru ndda nilebiwe ni murumiwi Matewuzhi. Ndina naaye nimohi eeriwa Leevi. Oliye aali muZhudewu alivihesa musoko wa guveruno oRoma. Mwa ela aZhudewu amohi yoomuharahara. Mbwenye Yesu ahimwiithana wi akale muru-miwi aaye, vano Matewuzhi ahihiya mabasa a guveruno wi amuharege Yesu (9.9-13). Aliba onelamo amohi enoobuwelela wi Matewuzhi alebile niivuru ndda muwari mwa yaaka ya 58 ofiyedha 63 Kirixtu agabaliwe.

Niivuru ndda nnooneyiha wi Yesu di Mvulumusi aroromelihiwe mMalebani Ootaleleya. Matewuzhi owooniha mwa mikalelo dhoohiyana-hiyana wona Yesu mwaakwaniheliiye dha ovuhulela dhawoga dha odha waaye teto Matewuzhi owooneyiha wi Yesu ahaakwaneliha Malamulo.

## Ogawanyeya wa niivuru

Makolo ni obaliwa wa Yesu *1.1 ofiyedha 2.23.*

Mutheenga wa Zhuwawu Namabathiza *3.1-12.*

O bathiziwa ni weehiwa wa Yesu *3.13 ofiyedha 4.11.*

Mabasa a Yesu oGalileya *4.12 ofiyedha 18.35.*

Dila yoodhowa oZheruzalemi *19.1 ofiyedha 20.34.*

Mabasa a Yesu oZheruzalemi *21.1 ofiyedha 25.46.*

Orabula, okwa ni ovenyihwa *26.1 ofiyedha 28.20.*

## Makolo a Yesu

*(Luka 3.23-38)*

**1** <sup>1</sup>Ala bi makolo a Yesu Kirixtu,<sup>a</sup> namabaliwelamo a Davidi, mwaana a Abarhamu.

---

<sup>a</sup> **1.1** Kirixtu mu ewogelo ya eGerego enatapulela *Muthikitheliwi, Misiya*, naari wi: *oosaku-liwa a Mulugu*, oyene onaavulumuse athu. Moone teto verisikulu 16.

- 2 Abarhamu ahimbala Ezaaki;  
Ezaaki ahimbala Yakobo;  
Yakobo ahimbala Zhuda ni addibile;
- 3 Zhuda aali babe a Perezi ni Zera. (Mmeewa aali Tamari.)  
Perezi aali babe a Heziromo;  
Heziromo aali babe a Aramu;
- 4 Aramu aali babe a Aminadabi;  
Aminadabi aali babe a Naxoni;  
Naxoni aali babe a Salimoni;
- 5 Salimoni aali babe a Bowazi.  
(Bowazi amaaye yaali Rahabi.)  
Bowazi aali babe a Obeddi.  
(Obeddi amaaye yaali Ruti.)  
Obeddi aali babe a Zhesi;
- 6 Zhesi aali babe a Kingi Davidi;

Davidi aali babe a Salomawu.  
(Salomawu amaaye yahikala mwadha Uriya.)

- 7 Salomawu aali babe a Robowamu;  
Robowamu aali babe a Abiya;  
Abiya aali babe a Aza;
- 8 Aza aali babe a Zhosafati;  
Zhosafati aali babe a Zhoramu;  
Zhoramu aali babe a Uziya;
- 9 Uziya aali babe a Zhotamu;  
Zhotamu aali babe a Akaazi;  
Akaazi aali babe a Ezekiya;
- 10 Ezekiya aali babe a Manasesi;  
Manasesi aali babe a Amoni;  
Amoni aali babe a Zhosiya;
- 11 Zhosiya aali babe a Zhekoniya ni addibile mudhidhi oyene  
wacedheliwiiwa oBabilooniya.<sup>b</sup>
- 12 Vano wacedheliwiiwa oBabilooniya:  
Zhekoniya aali babe a Salatiyeli;  
Salatiyeli aali babe a Zorobabeli;
- 13 Zorobabeli aali babe a Abiyudi;  
Abiyudi aali babe a Eliyakimu;  
Eliyakimu aali babe a Azori;
- 14 Azori aali babe a Zadoki;

<sup>b</sup> 1.11 Moone Mamwene a Nabiili 24.14-15; Koronika a Nabiili 36.10; Zheremiya 27.20

Zadoki aali babe a Akimu;  
 Akimu aali babe a Eliyudi;  
 15 Eliyudi aali babe a Eleyazari;  
 Eleyazari aali babe a Matani;  
 Matani aali babe a Yakobo;  
 16 Yakobo aali babe a Zhuuze,  
 mamuna a Mariya,  
 Mariya oyene ambalile Yesu,  
 oyene oneethaniwa Kirixtu.

17 Mowinda wambeela wa Abarhamu ofiyedha wa Davidi yavirile anamabaliwelamo dila kumi ni nnayi, wambeela wa Davidi ofiyedha ocedheliwa oBabilooniya yavirile anamabaliwelamo dila kumi ni nnayi, wambeela mudhidhi woocedheliwa oBabilooniya ofiyedha obaliwa wa Kirixtu ole aroromelihiwe yavirile anamabaliwelamo dila kumi ni nnayi.

### Obaliwa wa Yesu

(Luka 2.1-7)

18 Obaliwa wa Yesu Kirixtu weereyile ayi: Mariya, maaye a Yesu, agaveviwe ni Zhuuze, ehinagone vamohi, ahifwanyeya aganna wari odheela mwa owodha wa Muneba Woweela. 19 Vowi Zhuuze, mamuna a Mariya, aali oowoma murima, kaafunile omukaliha manyazo vowooneyela, ahubuwelelaga omwihiya mowiipiteya. 20 Mbwenye oobuwelaga nda, moorohani ahidheeliwaga mungero a Nabwiya, wiira: “Zhuuze, namabaliwelamo a Davidi, ohoove omwaakela Mariya okala mwihiyanaawo, vowi wari yinniiyena epadduwe ni owodha wa Muneba Woweela. 21 Oneere ombala mwaana-mulobwana, vano we oneere omuthwa ndina na Yesu,<sup>c</sup> mwaha wi oliye oneere ovulumusa nlogo naaye mwa dhoothega dheewa”.

22 Dhaatedhene ndo dhipadduwele wi dhaakwanelihiwe dhedho dhawogile Nabwiya odheela mwa namavuhulela, eerile: 23 “Namwali oohumunona mulobwana oneere okanna wari, ambale mwaana-mulobwana, muneeriinyu mmwiithanege Emanuwele”,<sup>d</sup> (enatapulela Mulugu ni hiyo).

24 Zhuuze, agarurumuwile moorohani, ahiiragana wona mwamulamulele mungero a Nabwiya, omwaakela Mariya okala mwihiyanaaye. 25 Mowindo kaamunonile ofiyedha ombala mwaana oyene, amuthwiliye ndina nowi Yesu.

### Atthottho enomweeddela Yesu

**2** 1 Yesu abaliwe oBetelemi murudda wa oZhudeya, Heroddi agali mwene. Yesu agabaliwe, oZheruzalemi wahifiyaga atthottho ooku-

<sup>c</sup> 1.21 Yesu enatapulela NABWIYA *onovulumusa*. <sup>d</sup> 1.23 Moone Ezaya 7.14 (Bibiliya Seputuwazhinta).

mela omadheelo wa nduwa. <sup>2</sup>Yahikohedhelaga, wiira: “Mwene aZhudewu obaliwe oli wuuvi? Vowi noonile ttendderi yaaye omadheelo wa nduwa. Nidheele wi nimweebedhe”.

<sup>3</sup>Mwene Heroddi ageewile nda ahikathamiheyaga teto ni athu a oZheruzalemi aatene. <sup>4</sup>Nuwindo, ahaatugumanyaga apogo a anamakutha aatene ni anamasuuziha a Malamulo a nlogo, waakohaga wi Kirixtu<sup>e</sup> ole aroromelihiwe aabaliwe wuuvi. <sup>5</sup>Aliwa yahaakulaga, wiira: “OBetelemi, oZhudeya, vovi dhilebiwe ndo odheela mwa namavuhulela:

<sup>6</sup> “*We Betelemi,  
elabo ya oZhuda,  
ni vang'onong'ono kwiyiire mung'onong'ono  
vaari va maluwa a oZhuda;  
vowi mwa we muneere okuma musogoleli  
onaalamulege nlogo naaga Ezarayeli' ”.*<sup>f</sup>

<sup>7</sup>Nuwindo, mwene Heroddi ahawiithanaga mowiipiteya atthottho, waakoha mudhidhiya wooniliwa ttendderi eyo. <sup>8</sup>Vano ahaarumaga wi edhowe oBetelemi, wiira: “Mweelibihedhe omusayela ofiyedha mumfwanye mwaana oyo, mwamfwanya mudhe mugaaddele wi ni miyeene gidhowe gamweebedhe”.

<sup>9</sup>Egeewile madhu a mwene Heroddi yahimaruwaga, odhowaga. Ttendderi yooniligiwa omadheelo wa nduwa yowaasogolelaga, egafiyile vamburoni vaaligi mwaana, ttendderi ele yahii melaga vadhulu va mburo vaaligi mwaana. <sup>10</sup>Aliwa egoonile ttendderi ele yahihagalalaga vajinji. <sup>11</sup>Egavolowile mba yahimfwanyaga mwaana ni amaaye Mariya. Yahikoraga omweebedha mwaana ole, waatapula mathumba a mvahi dheewa, oveleela oro, libani noonukwela ni makura eneeriwa mira. <sup>12</sup>Mulugu ahawaaddelaga aliwa moorohani wi ehiwelele wa Heroddi. Mowindo yahiiwelelaga owaniwa ni dila emohi.

### Ababiinya a Yesu enomuthawelana wEgubuddu

<sup>13</sup>Egadhawile atthottho ale, mungero a Nabwiya ahimooneyelaga Zhuuze moorohani, wiira: “Ovenye, omuthukule mwaana ni amaaye, othawele wEgubuddu. Wakale wewo ofiyedha wi guwaaddele, vovi Heroddi onomusayela mwaana wi ampe”.

<sup>14</sup>Vevale Zhuuze ahivenyaga ni mahiyu, omuthukula mwaana ni amaaye, othawela wEgubuddu. <sup>15</sup>Yahikala wewule ofiyedha okwa wa Heroddi. Nda dhahipadduwa wi dhaakwanelihe nde dhawogile Nabwiya odheela mwa namavuhulela, eeriliye: “Miyo gihimwiithana Mwaanaga aali elabo ya wEgubuddu”.<sup>g</sup>

<sup>e</sup> 2.4 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosaku-liwa a Mulugu*, oyene onaavulumuse athu. <sup>f</sup> 2.6 Mikeya 5.2 <sup>g</sup> 2.15 Ozeya 11.1

<sup>16</sup>Heroddi vooniligiye wi atthottho ale ehimunyaengetha, ahitakaleli-waga vajinji. Ahilamulaga wi epiwe anaalobwana aatene a yaaka biili oya mundduli a oBetelemi ni a mirudda dhowapeelela. Oliye ahiirana nda moohariha ni mudhidhi atthottho wamwaaddeliwi wooniliwi ttendde-ri. <sup>17</sup>Nuwindo, dhahaakwanela dhawogile namavuhulela Zheremiya, dhowi:

<sup>18</sup>“*Ohiweya ndhu oRaama,  
ndhu nowundda ni okubanya,  
Rakeli onawuunddela anaaye;  
onokoodda omaalihiwa,  
vowi anaaye aatene yahirimeela*”.<sup>h</sup>

### Owelawo wEgubuddu

<sup>19</sup>Heroddi agakwile, mungero a Nabwiya ahimooneyelaga Zhuuze moorohani agali wEgubuddu, omwaaddela, wiira: <sup>20</sup>“Ovenye, omuthukule mwaana ni amaaye, owelele wEzarayeli mwaha wi ale yafuna ompa mwaana oyo ehikwa”.

<sup>21</sup>Vano Zhuuze ahivenyaga, omuthukula mwaana ni amaaye, owelele elabo ya Ezarayeli. <sup>22</sup>Mbwenye aganonile wi Arikelawu, mwaana a Heroddi, dinalamula oZhudeya vamburoni va babe ahoovaga wi adhowe akalege wewo. Zhuuze ahaaddeliwaga moorohani dhoofuna wiira, nuwinda ahidhowaga murudda wa oGalileya, <sup>23</sup>okalaga wewo. Nluwa nneeriwa Nazarethi. Nda dheereyile wi dhaakwanelihiwe dhawogile anamavuhulela, dhowi: “Oliye oneerege wiithaniwa muNazarethi”.

### Zhuwawu Namabathiza onosasanyedha dila ya Yesu Kirixtu (Maruku 1.2-8; Luka 3.1-18)

**3** <sup>1</sup>Mwa malabo alene, ahikumelela Zhuwawu Namabathiza, owaalaleyela athu mwiiddedereni ya oZhudeya, eeraga: <sup>2</sup>“Tthwaruwani dhowiira dheenyu mwaha wi Omwene wa Odhulu ohaaddamela!” <sup>3</sup>Vowi namavuhulela Ezaya ahiwoga dha Zhuwawu, eeraga:

*“Ndhu na muthu nnakuwa  
mwiiddedereni:  
‘Sasanyedhani rampa  
wi Nabwiya aviremo,  
mogoolele dila yaaye’ ”.*<sup>i</sup>

<sup>4</sup>Zhuwawu awara guwo dhoosanyiwa ni mooya a mwaneenyama oneethaniwa kamelo,<sup>j</sup> agamagele sintu na nikupa mmwiinuni mwaaye

<sup>h</sup> 2.18 Zheremiya 31.15    <sup>i</sup> 3.3 Ezaya 40.3 (Bibiliya Seputuwazhinta)    <sup>j</sup> 3.4 Namavuhulela Eliyazi ahiwara mowinda. Moone Mamwene a Nabili 1.8. Dhoowara nda dhinatoonyu wi Zhuwawu aali namavuhulela. Moone Levitiku 11.22; Zakariya 13.4.

teto yooja yaaye yaali kwaakwa ni enwi ya mukokolani. <sup>5</sup> Athu a oZheruzalemi, a mirudda dhaatedhene dha oZhudeya, vamohi ni mburo dhaatedhene dhowaaddamela mwihinje Zhordawu, yoodhowa wa Zhuwawu Namabathiza. <sup>6</sup> Aliwa yabweka dhoothega dheewa, Zhuwawu owaabathiza mmwihinjeni Zhordawu.

<sup>7</sup> Zhuwawu agoonile wi aFarizi ajinji ni aSaduseyi yoodhaaga vevale vabathizigiye, ahiiraga: “Nyo, mulogo wa dhivili, wuwaaddeleni baani othawa owali wa Mulugu onafuna odha? <sup>8</sup> Mwihidde mabasa owooneyiha wi muhutthwaruwa dhoothega dheenyu. <sup>9</sup> Mmurimani mweenyu muhuu-buwelege owoga, mwiiraga: ‘Nihikanna babiihu Abarahamu’.<sup>k</sup> Vowi miyo ginowuwaaddelani wi Mulugu onowaanda waasaddula mabwe alena wi ekale ahima a Abarahamu. <sup>10</sup> Badho ehipanihiwa wi egwaddena misisi dha mithanko. Mithanko dhaatedhene dhihinavaha dhoovaha dhapama dhineere okakatthiwa wi dhivokedhiwe vamunddoni.

<sup>11</sup> “Miyo ginoobathizani ni mahinje enooniha wi nyo muhutthwaruwa dhoothega dheenyu, mbwenye ole onadha mundduli mwaaga onogikwaranya, kagifwaneele othukula sapathe dhaaye. Oliye onoobathizegeni ni Muneba Woweela ni munddo. <sup>12</sup> Etelo yaaye eli mmadadani wi amveethena tirigu, amulogolele vatatani, aakahe makataya ni munddo woohuthima”.

#### **Obathiziwa wa Yesu** (*Maruku 1.9-11; Luka 3.21-22*)

<sup>13</sup> Malabo alene Yesu ahimaruwaga oGalileya odhowa mwihinje Zhordawu wi abathiziwe ni Zhuwawu. <sup>14</sup> Mbwenye Zhuwawu ahixixaga okoodda, eeraga: “Miyo difwaneele obathiziwa ni nyo, vano nyo munafuna wi miyo guubathizeni?”

<sup>15</sup> Mbwenye Yesu ahimwaakulaga, wiira: “Dhiinova orumeedhe, mwaha wi fumwemo munafuneyeliwa wi niirena Mulugu dhinafuniye”. Vano Zhuwawu ahirumeedhaga.

<sup>16</sup> Yesu agabathiziwe ahivenyagamo mwinko. Nuwindo, odhulu wahifuguwaga, Yesu ahoonaga Muneba wa Mulugu ni mooneyelo a kangayiwa okitaga, odhaaga va oliye. <sup>17</sup> Vano nahiiweyaga ndhu odhulu, neeraga: “Ola di Mwaanaga oodhivela, onagihagalaliha”.<sup>l</sup>

#### **Weehiwa wa Yesu mwiiddedereni** (*Maruku 1.12-13; Luka 4.1-13*)

**4** <sup>1</sup> Dhigeereyile ndo, Yesu ahithukuleliwaga mwiiddedereni ni Muneba Woweela wi eehiwe ni Sathana. <sup>2</sup> Agathugile malabo makumi mannayi mahiyu ni mutana, ahikalagana dala. <sup>3</sup> Nuwindo, Sathana<sup>m</sup> ahi-

<sup>k</sup> 3.9 Moone Zhuwawu 8.33    <sup>l</sup> 3.17 Masaalimu 2.7; Ezaya 42.1    <sup>m</sup> 4.3 SathanaNaari wi: Nameeha.

mwaaddamelaga, wiira: “Akala oli mwaana a Mulugu, waalamule mabwe ala esadduwe ekale mikaathe”.

<sup>4</sup>Mbwenye Yesu ahimwaakulaga, wiira: “Maleba Ootaleleya enawoga wi: *‘Muthu kanakala ni egumi mwaha wa yooja baahi, mbwenye onokalawo mwa madhu maatene enakuma wa Mulugu’*”.<sup>n</sup>

<sup>5</sup>Nuwindo, Ddiyabo<sup>o</sup> ahimuthukulaga Yesu, omudhowana oZheruzalemi, nluwa noweela, omugweliha vootaama va nyuba ya Mulugu.

<sup>6</sup>Omwiirela: “Akala oli Mwaana a Mulugu, olupele vati. Vowi dhihilebiwa wi:

*“Mulugu onoodha aalamule angero aaye  
wi yuuvenyihe, yuuthukule wi manyalo aawo  
enaakwakwathuwe ni nibwe’*”.<sup>p</sup>

<sup>7</sup>Yesu ahimwaakulaga, wiira:

“Mbwenye Maleba Ootaleleya yiire: *‘Ohumweehe Nabwiya, Mulugu aawo’*”.<sup>q</sup> <sup>8</sup>Nuwindo, Ddiyabo<sup>r</sup> ankeene ahimuthukulaga Yesu, omudhowana mwaango wootaamesesa, omoonihia omwene dhaatedhene dha mwiilaboni ni nthithimiho neewa. <sup>9</sup>Nuwindo, Sathana ahimwiirelaga: “Gineere wuuvaha dhaatedhene dhedhi wakokora, ogeebedha”.

<sup>10</sup>Yesu ahimwaakulaga, wiira:

“Ovenyevo va, Sathana! Maleba Ootaleleya yiire: *‘Omweebedhege Nabwiya Mulugu aawo, omwiimelelege oliyeeneve baahi’*”.<sup>s</sup>

<sup>11</sup>Vevale Ddiyabo<sup>t</sup> ahimaruwaga, odhowaga, vano yahidhaaga angero omwiimelela Yesu.

### Yesu onowambeela mabasa aaye oGalileya (Maruku 1.14-15; Luka 4.14-15)

<sup>12</sup>Yesu ageewile wi Zhuwawu ohufugeliwa mukaambura ahiwelelaga oGalileya. <sup>13</sup>Nuwindo, ahivenyagawo oNazarethi, odhowa okalaga oKafaranawu, oli waaddamela seresere ya nyaza, mmigaano dha oZebuloni ni oNafitali.<sup>u</sup> <sup>14</sup>Ndo dhahipadduwa wi dhaakwanelihiwe dhawogile namavuhulela Ezaya, eeraga:

<sup>15</sup>*“Elabo ya oZebuloni,  
elabo ya oNafitali,  
dila ya onyaza,  
kobela ya oZhordawu,*

<sup>n</sup> 4.4 Deteronomiyo 8.3    <sup>o</sup> 4.5 Ddiyabo mu ewogelo ya eGerego enatapulela a niwogo; naari wi: *dhuvu-dhuvu*. Oli ndina nnavahiwa Sathana vookala musogoleli a mineba dhootakala. Teto maverisikulu 8 ni 11.    <sup>p</sup> 4.6 Masaalimu 91.11-12    <sup>q</sup> 4.7 Deteronomiyo 6.16    <sup>r</sup> 4.8 Naari wi: *Sathana*.    <sup>s</sup> 4.10 Deteronomiyo 6.13    <sup>t</sup> 4.11 Naari wi: *Sathana*.

<sup>u</sup> 4.13 *Zebuloni ni Nafitali* Malogo a Ezarayeli elaboya yaali vaari va Nyaza ya oGalileya ni Nyaza Mediteraneyo.

*Galileya a athu oode:*

<sup>16</sup> *Nlogo needda muyiihini  
nihoona waara wuulubale,  
athu ookala elabo ya murinti wookwa,  
waara ohaamoneyela”.*<sup>v</sup>

<sup>17</sup>Okuma vevale odhowa osogolo Yesu ahambeelaga olaleya, eera-  
ga: “Tthwaruwani dhoothega dheenyu, vowi Omwene wa Odhulu  
ohaaddamela”.

### **Wiithaniwa wa anamasuuzwa owambeela**

*(Maruku 1.16-20; Luka 5.1-11; Zhuwawu 1.35-42)*

<sup>18</sup>Yesu eeddaga seresere ya Nyaza ya oGalileya ahawoonaga addibila  
abiili, Simawu, oononiwa teto ni ndina na Peduru ni Andire evoke-  
dhaga mathavi munyaza, vowi yaali anamatota somba. <sup>19</sup>Vano Yesu  
ahawaaddelaga, wiira: “Mudhe mugihare, guwiireni anamatota a athu”.  
<sup>20</sup>Mowaaguva aliwa yahaahiyaga mathavi eewa, omuharaga.

<sup>21</sup>Egeeddile vang'ono, Yesu ahawoonaga addibila amohi abiili, Tiyago  
ni Zhuwawu, ahima a Zebedeyo, egali mmwanddeyani ni babiiwa esa-  
sanyedhaga mathavi eewa. Yesu ahawiithanaga. <sup>22</sup>Mowaaguva aliwa  
yahihiyaga mwanddeya ni babiiwa, omuharaga Yesu.

### **Yesu onosuuziha ni waayiliha aredda**

<sup>23</sup>Vano Yesu ahidhowaga weddedda elabo yaatene ya oGalileya,  
asuuzihaga, alaleyaga Muselu Wapama wa Omwene mu nyuba dha  
matugumano dha aZhudewu,<sup>w</sup> ayilihaga dhoovoreya ni dhiredda dhaate-  
dhene vaari va athu. <sup>24</sup>Vano bili yaaye yahivuweya elabo yaatene ya  
oSiriya. Mowindo yowaadhagana aredda aatene yannaga dhiredda  
dhowukuula dhohiyana-hiyana: Oohiddiwa ni mineba dhabure,  
aajilejile, ooragala. Oliye owaayilihaga. <sup>25</sup>Athu ajinji yoomuharaga ooku-  
mela oGalileya, oDekapolisi, oZheruzalemi, oZhudeya ni a kobela ya  
oZhordawu.

### **Olaleya wa vamwaangoni**

*(Luka 6.20-23)*

**5** <sup>1</sup>Yesu agoonile wiinjiva wa athu, ahigwelaga vamwaangoni, agaka-  
raatile, anamasuuzwa aaye yahimwaaddamelaga. <sup>2</sup>Oliye ahambeelaga  
waasuuziha, eeraga:

<sup>3</sup>“Ooreelihiwa baale yinna muneba wowiiyeviha,

---

<sup>v</sup> 4.16 Ezaya 9.1-2    <sup>w</sup> 4.23 Nyuba dha matugumano dha aZhudewu Nda mu ewogelo ya  
eGerego dheeriwa *sinagoga*. Mabasa eewa kayaali oolobelamoove, naari osuuzamo Mala-  
mulo, mbwenye teto yowaathongamo athu yahaaharhamo Malamulo a aZhudewu.



- vowi Omwene wa Odhulu bweewa.
- 4 Ooreelihiwa baale enaandda,  
vowi binatodoliwe.
- 5 Ooreelihiwa baale eli owiiyeviha,  
vowi binaakele elabo ya vati  
wona yookalana yeewa.
- 6 Ooreelihiwa baale yinna dala ni nthona  
dha efunelo ya Mulugu,  
vowi binaarubale.
- 7 Ooreelihiwa baale enaweeddiwela thagaraga akwiiwa,  
vowi Mulugu onoodha aweeddiwele thagaraga.
- 8 Ooreelihiwa baale eli oweela mirima,  
vowi binamoone Mulugu.
- 9 Ooreelihiwa baale eneerana murenddele,  
vowi bineethaniwe ahima a Mulugu.
- 10 Ooreelihiwa baale enaharahariwa  
mwaha woohara efunelo ya Mulugu,  
vowi Omwene wa Odhulu bweewa.

11 “Munakala ooreelihiwa mwaaruwaniwaga, mwaaharahariwaga ni owogeliwa dhootakala dhoohiyana-hiyana mwaha wa miyo. 12 Muhagala-le, muthabe mwaha wi yoothetheeliwana yeenyu si yuulubale odhulu teto mwa mukalelo mmohive yahaaharahara anamavuhulela yadhiile nyo muhunakalewo.

#### **Anamasuuz a Yesu mwiinyu ni waara wa elabo**

13 “Nyo muli mwiinyu wa elabo; ki mwiinyu wakumuwa, onaawe-lihedhiwe addi wi odhivage? Weera ndo kilivo emohi yowirana, onoothathileliwa ode, onyngaleliwaga ni athu.

14 “Nyo muli waara wa elabo. Kadhinaandeya ologoha nluwa nimagi-we vamwaangoni, 15 naari kinahiddiha panti, ekuneelana mpika, eehi. Enahela mburo wa vadhulu wi waamoneyegelege athu aatene eli muwari mwa nyuba eyo. 16 Mwa mukalelo mmohive muhiddihe waara weenyu vaari va athu aatene wi yoone meerelo eenyu apama, emuthithimihege Babiinyu oli odhulu.

#### **Malamulo a Mozezi**

17 “Kamuubuwelege wi gidhee omariha Malamulo a Mozezi naari masuuziho a anamavuhulela awale. Kagidheeledhedho, eehi, gidheelee waakwaneliha masuuziho eewa. 18 Ebaribareene miyo ginowu-waaddelani wi odhulu ni elabo ya vati dhakalawoove, naari nlemba ning'onong'ono, naari etoonyihedho emohi ya nlemba kinavenyihiwa-vo vaMalamuloni. Dhinakala ndo ofiyedha dhaatedhene dhaakwanele.

<sup>19</sup>Vowi ole onavenyihevo nlamulo nimohi, naari nikale ning'onong'ono nowi avi, aasuuzihaga akwaaye wiirana ndo, muthu oyene oneeriwege mung'onong'ono okwaranya mu Omwene wa Odhulu. Mbwenye ole oneewelega malamulo, aasuuzihaga akwaaye wiirana ndo onakala mpogo mu Omwene wa Odhulu. <sup>20</sup>Ginowuwaaddelani wi ororomeleya weenyu mwa efunelo ya Mulugu waahikwaranya wa anamasuuziha a Malamulo ni aFarizi, kalivo mmohi onaadhe avolowe mu Omwene wa Odhulu.

### Yesu onosuuziha oteyihana

<sup>21</sup>“Nyo mwihiiwa dhawogiwe wa awale-wale dhowi: ‘Kumpe muthu’,<sup>x</sup> vano ‘onampa muthu onothongiwa’. <sup>22</sup>Mbwenye miyo ginowuwaaddelani wi muthu oli aatene onatakaleliwa ni ddibile, onofwanelela othongiwa. Naari onamuruwana ddibile’ onofwanelela othongiwa mmuthegoni; ole onamwiirela ddibile ‘taduwa’, onofwanelela odhowa omunddoni woohuthima.

<sup>23</sup>“Mowindo, waadhaagana mvahi waawo veebuwani, wuubuwelela wi ddibilo ohukanna mwaha ni we, <sup>24</sup>ohiye mvahi waawo veebuwani vevo, vowambeela odhowe wateyihane ni ddibilo, vano owelelewo wapeleke mvahi waawo.

<sup>25</sup>“We waadhowaga omathongiwelelwa osayele oteyihana mundila mowaaguva ni ole wuusumele wi oliye ahuupeleke wa namathonga, namathonga oopeleke mmadani mwa musupayi, oliye oofugele mukaambura. <sup>26</sup>Ebaribareene ginowuwaaddela wi kudha okumamo ohulivile korowa yoogomihedha.

### Yesu onokooddiha oraruwa

<sup>27</sup>“Nyo mwihiiwa dhiwogiwe dhowi: ‘Kuraruwe’.<sup>z</sup> <sup>28</sup>Mbwenye miyo ginowuwaaddelani wi muthu oli aatene onamusugwa mwihiyana ni moobuwelelo oomfuna, ohuraruwa mmurimani mwaaye. <sup>29</sup>Vano akala niinto naawo na omoononi wooja ninowuuthegiha, okumihemo, othathilele woolapela. Vowi eli yapama oyeleela yaano emohi ya mwiili waawo, ohiya mwiili waawo waatene ovokedhiwe omunddoni woohuthima. <sup>30</sup>Emodha-modhave, akala ndada naawo na moonoo wooja ninowuuthegiha ogwadde, othathilele woolapela ni we. Eli yapama oyeleela yaano emohi ya mwiili waawo, ohiya mwiili waawo waatene ovokedhiwe omunddoni woohuthima.

<sup>x</sup> 5.21 Okuma 20.13; Deteronomiyo 5.17    <sup>y</sup> 5.22 Enofwanyeya madhu owi: *Naari onamuruwana ddibile vihili mwaha* mu dhoolebiwa ni madada dhimohi dhixa. Mbwenye anamasuuzi ajinji enoobuwela wi *vihili mwaha* madhu ala kiyalebiwe ni murumiwi Matewuzhi.    <sup>z</sup> 5.27 Okuma 20.14; Deteronomiyo 5.18

### Yesu onokooddihha omwalana

(Matewuzhi 19.9; Maruku 10.11-12; Luka 16.18)

<sup>31</sup>“Dhihiwogiwa teto, wiira: ‘Mulobwana amwiigara mwihiyanaaye, enoofuneya amvahe kaarata ya omwalana’.<sup>a</sup> <sup>32</sup>Mbwenye miyo ginowuwaaddelani wi aatene enamwalana ni mwihiyanaaye mwahaya ohuli wa mararuwo, onomwiirha wi araruwege. Vano mulobwana onamutela mwihiyana owiigariwa oyo teto onooraruwana.

### Pole-pole ni olibela

<sup>33</sup>“Teto nyo mwihiiwa dhaaddeliwe apogo eenyu awale dhowi: ‘Ohulibelege ebeweene,<sup>b</sup> mbwenye enoofuneya wiirena dhalibeliwe vameentoni va Nabwiya’. <sup>34</sup>Mbwenye miyo ginowuwaaddelani wi mwihye olibela waatewene. Hiyani olibela ni ndina na odhulu mwaha wi bu mpanddo wa Mulugu. <sup>35</sup>Naari olibela mu ndina na elabo ya vati, vovi fi voonyingala va manyalo aaye, naari ni ndina na oZheruzalemi mwaha thi nluwa na Mwene mulubale. <sup>36</sup>Vano ohiye olibela mu ndina na muru waawo mwaha kunaanda osaddula nthithi nimohi nikala nooriba, naari nikala noweela. <sup>37</sup>Mbwenye sapama mwiirege: ‘Ee’, akala ‘ee’. Mwiirege: ‘Naari’, akala ‘naari’. Dhakwaranya vevo dhinadha mwa mabasa a Nambure.<sup>c</sup>

### Yesu onosuziha olelevelana

(Luka 6.29-30)

<sup>38</sup>“Nyo mwihiiwa dhiwogiwe, wiira: ‘Oliva niinto nniinto, niino nniino’.<sup>d</sup> <sup>39</sup>Mbwenye miyo ginowuwaaddelani wi muhulibanena eno-wiirelani dhabure. Muthu oddwadha mbarutuni omvahe oddwadhe epaddi emohi. <sup>40</sup>Muthu oosumela wa anamathonga wi owaake maleya, omvahe teto ni kazaakweene. <sup>41</sup>Muthu oowaddihedha weedda ni sapo kilomeeturu emohi, weeddeve teto makilomeeturu meenddi. <sup>42</sup>Muthu onooloba yego, omvahe. Muthu onafuna wuubolihedha yego omvahe, ohumwiing'anihe ekothikothi.

### Waadhivela amwiiddani

(Luka 6.27-28,32-36)

<sup>43</sup>“Nyo mwihiiwa dhiwogiwe, wiira: ‘Omudhivelege mukwaawo’,<sup>e</sup> ‘omwiidde mwiiddani aawo’. <sup>44</sup>Mbwenye miyo ginowuwaaddelani wi mwaadhivelege amwiiddani eenyu, mwaalobelege ale enooharahara-

<sup>a</sup> 5.31 Deteronomiyo 24.1 <sup>b</sup> 5.33 Levitiku 19.12; Numero 30.2 <sup>c</sup> 5.37 Nambure Naari wi: *Sathana*, musogoleli mulubale a mineba dhootakala. <sup>d</sup> 5.38 Okuma 21.24; Levitiku 24.20; Deteronomiyo 19.21 <sup>e</sup> 5.43 Levitiku 19.18

ni. <sup>45</sup>Mweera ndo, munakala ahima a Babiinyu a odhulu. Mwaha oliye onowaafaalihedha nduwa athu abure ni apama teto onowaarubwihedha muzongwe ooharihamo efunelo ya Mulugu ni ale enakoooda ooharihamo. <sup>46</sup>Mwaha wowi mwaadhivelaga ale enoodhivelani baahi, munaavahiwe yootthettheeliwa baani ni Mulugu? Anamakoha-musoko<sup>f</sup> enowiirana dhimodha-modhave. <sup>47</sup>Teto, mwaalovelaga amudhi eenyuve baahi, mwiirilevo ddi yookwaranya amohi? Dhedho kahuwo dhineerana ale ehinamurromela Mulugu? <sup>48</sup>Mowindo, nyo kalani owaakwanela wona Babiinyu a odhulu oli owaakwanela”.<sup>g</sup>

### Dhooveleela wa athu oorabula

**6** <sup>1</sup>“Muwaraale, kamwiiregena meerelo eenyu apama vameentoni va athu wi aliwa yuutthetthelegeni, mweera ndo kamudha mwaakela yootthettheeliwana ya odheela wa Babiinyu oli odhulu.

<sup>2</sup>“Mwa ela, mwaavahaga aliba ohaleeliwa, kamoobege palaza vaari veenyu wona muneerela anamanyengetha mu nyuba dha matugumano<sup>h</sup> ni mmarampani wi etthettheeliwege ni athu. Ebaribareene ginowu-waaddelani wi aliwa ehaakela yootthettheeliwana yeewa. <sup>3</sup>Vano we waafunaga omvaha oohaleeliwa, ndada naawo na moonoo woong'oto nihi none dhineera ndada naawo na moonoo wooja, <sup>4</sup>wi mvahi waawo okale wa wipiini. Vano Ababo, enoona dha wipiini, enowuutthettheela.

### Mukalelo woolobela

(Luka 11.1-4)

<sup>5</sup>“Mwaalobelaga muhukalege wona anamanyengetha, enadhiveliwa olobela owiimeleene mu nyuba dha matugumano ni mmakulugano wi yooniwege ni athu. Ebaribareene ginowuwaaddelani wi aliwa ehaakela yootthettheeliwana yeewa. <sup>6</sup>Mbwenye we waalobelaga ovolowege osubuni waawo, ofugege musiwo, olobele wa Ababo eli wipiini; vano Ababo enoona dha wipiini eneere wuutthettheela. <sup>7</sup>Waalobelaga kuvirusedhege madhu mamohive wona athu oode, vowi enoobuwela wi voowoga vajinji fineeriisu yiiwiwe. <sup>8</sup>Nyo kamwiiregena wona aliwa. Mulugu Babiinyu ohunona dhinoohaleelani muhunamulobe. <sup>9</sup>Voolobela mwiirege ayi:

“Babiihu a odhulu,

<sup>f</sup> 5.46 *Anamakoha-musoko* Ala aEzarayeli aatene yawoona wona “anamathega.” Yooniwa wi babure vameentoni va athu mwaha wi yamulabela guveruno a oRoma. Aali mwiiddani a aEzarayeli. <sup>g</sup> 5.48 Levitiku 19.2; Deteronomiyo 18.13 <sup>h</sup> 6.2 *Nyuba dha matugumano* Nda mu ewogelo ya eGerego dheeriwa *sinagoga*. Mabasa eewa kayaali oolobelamoove, naari osuuzamo Malamulo, mbwenye teto yowaathongamo athu yahaaharihamo Malamulo a aZhudewu. Moone teto verisikulu 5.

ndina neenyu noweela nthithimihiwege.

<sup>10</sup> Omwene weenyu odhe.

Ofuna weenyu wiireyege vati vano  
wona muneereyeliwa odhulu.

<sup>11</sup> Munivahe peeno yooja yeehu

yowaakwana malabo maatene.

<sup>12</sup> Munilevelelege dhoothege dheehu,

wona hiyo nnaalevelela athu enanthegelela.

<sup>13</sup> Vano kamurumeedhele wi nimorele moweehiwani,  
mbwenye munivulumuse mwa dhabure.<sup>i</sup>

[Vowi weenyu bu Omwene, owodha,  
ni nthithimiho na okala ni okala. Amenii.]

<sup>14</sup> “Vowi mwaalevelelaga athu dhoothege dheewa teto Babiinyu a odhulu onowuulevelani. <sup>15</sup> Akala kamunaalevelela athu dhoothege dheewa, Babiinyu kadha oolevelani dhoothege dheenyu.

### Mukalelo woothuga

<sup>16</sup> “Mwaathugaga, kamwiyooneyihege okubanya wona anamanyengetha, enasaddula wiintoni weewa ni makuzi, enafuna athu yawoonege wi enothuga. Ebaribareene ginowaaddelani wi aliwa ehaakela yooththetheeliwana yeewa. <sup>17</sup> We waafunaga othuga, osusule wiintoni, odholihe makura mmuruni mwaawo <sup>18</sup> wi athu ehinone wi onoothuga, mbwenye enone Ababo eli wipiini baahi, vano Ababo enoona dha wipiini eneere wuutthetheela.

### Dhooreela odhulu

(Luka 12.33-34)

<sup>19</sup> “Mwihiyuugelele dhooreela dha elabo ya vati, vevo oswa ni mukwiti vinanoongiwa, owiia vinatataruliwa yiya. <sup>20</sup> Mbwenye mwiyuugelelege dhooreela odhulu wewo oswa naari mukwiti ohunanoongiwa, naari owiia ohunatataruliwa yiya. <sup>21</sup> Vowi vevo vinaakale dhooreela dhaawo teto murima waawo onakale vevo.

<sup>22</sup> “Meento bili panti ya mwiili. Meento aawo yakala apama, mwiili waawo waatene onakala wowaara. <sup>23</sup> Akala meento aawo babure, mwiili waawo waatene onakala muyiihini. Akala panti eli mwa nyo enosadduwa yihi, yihiya enotthabwa.

<sup>24</sup> “Kalivo onaanda wawiimelela anabwiya abiili, sowi oneerege omwiidda mmohi, amudhivelege mmohiwa, naari oneerege wiivelela wa mmohi, mmohiwa amunyemulege. Kadhinaandeya omwiimelela Mulugu, wiimelela teto dhooreela.<sup>k</sup>

<sup>i</sup> 6.13 Naari wi: *Nambure*. <sup>j</sup> 6.13 Amenii enatapulela *Dhikale ndo*, naari wi *Siibaribareene*.

<sup>k</sup> 6.24 *Dhooreelamu ewogelo ya eGerego enatapulela mamom*.

<sup>25</sup>“Mwaha wa ela ginowuwaaddelani wi kamusanyeyelege dhinoohaleelani mwiiraga: ‘Nnaaje ddi?’ naari ‘Nnaang’we ddi?’ Vowi egumi yeenyu soofuneya okwaranya yooja, vano mwiili weenyu boofuneya okwaranya yoowara. <sup>26</sup>Musugwe, balame dha odhulu kadhinalhala, kadhinahadda, kadhinalogolela mmatatani mbwenye Babiinyu a odhulu onojiha. Ki nyo kamuli oofuneya okwaranya balame?” <sup>27</sup>Kalivo muthu onaanda waakwaniha odheela mookathamiheya weenjehedha nlabo nimohi na egumi yaaye.

<sup>28</sup>“Ki vano mwaha bwaddi musanyeyelaga yoowara? Moone monnuwelo a todo dha mukokolani: Kadhinalaba naari kadhinaluwa guwo. <sup>29</sup>Mbwenye miyo ginowuwaaddelani wi naari mwene Salomawu munthithimiho ni naaye naatenene kaafiyedhe owara oligana ni todo nda. <sup>30</sup>Vano akala Mulugu onowariha manasi a mukokolani, eliwo peenove, omenseloni wiwa evokedhiwa vamunddoni, ebaribareene Mulugu onowuwarihani, naari nyo mugalive ooyeva nrromelo. <sup>31</sup>Mowindo, kamusanyeyege mwiiraga: ‘Nnaaje ddi? Nnaang’we ddi?’ naari ‘Nnaware ddi?’ <sup>32</sup>Vowi athu ehinamuroromela Mulugu binasayela dhego dhaatedhene dhedhi; vovi Babiinyu a odhulu ohunona dhinarabuleliinyu mwa dhaatedhene dhedho. <sup>33</sup>Musaeyele vowambeela Omwene waaye ni wogoowa waaye, vano dhaatedhene dhedho muneere weenjehedhiwa. <sup>34</sup>Mowindo muhusanyeyelege nlabo na menselo, nlabo na menselo nnakala ni dhoorusa dheewa-dheewa. Kadda nlabo nihikanna dhoorusa dhiwa dhowaakwana.

### Kammukonege muthu

*(Luka 6.37-42)*

**7** <sup>1</sup>“Kammukonege muthu wi teto Mulugu onaadhe ookoneni. <sup>2</sup>Vovi ni mukalelo onaakoniinyu athu, Mulugu onoodha ookoneni ni mpi-mo oyene munapimiinyuna teto oliye oneere wuupimanaani oyene.

<sup>3</sup>“Mwaha bwaddi onoona ekata eli mwiintoni mwa ddibilo, ohoonaga emiri eli mwiintoni mwaawo? <sup>4</sup>Naari onaawoge addi ni ddibilo wiiraga: ‘Ogihiye givenyihemo ekata mwiintoni mwaawo’, oganna emiri mwiintoni mwaawo? <sup>5</sup>We namanyengetha! Vowambeela ovenyihemo emiri eli mwiintoni mwaawo, weera ndo oneerege woona pama wi ovenyihemo ekata eli mwiintoni mwa ddibilo.

<sup>6</sup>“Muhuvahege dhego dhoreelihiwa anabwa, naari ovokedha kumba, dhego dheenyu dha mutheengo wookwima, vovi kumba dhinonyingalela dhego dheenyu dha mutheengo wookwima, vano anabwa enoorugunuwa yuudaruleni.

### Owoma murima wa Mulugu

*(Luka 11.9-13)*

<sup>7</sup>“Lobani muneere ovahiwa; sayelani muneere ofwanya; gogoddani muneere ofuguleliwa. <sup>8</sup>Vovi aatene enaloba enowaakela, ole onasayela onofwanya, ole onagogodda onofuguleliwa.

<sup>9</sup>“Muthu baani mwa nyo oneera mwaanaye amuloba mukaathe amvaha nibwe? <sup>10</sup>Naari oneera amuloba somba amvaha nyowa? <sup>11</sup>Nyo mugalive abure muhunona waavaha dhego dhapama aniinyu, ki Babiinyu oli odhulu kanaavahe mootthabwa dhego dhapama wa ale enamuloba? <sup>12</sup>Dhaatedhene dhinafuniinyu wi athu yuwiirelegeni, nyo teto mwawiirelege aliwa,<sup>l</sup> vovi ela sinatapulela Mala-mulo ni dhosuuziha dha anamavuhulela.

### Musiwo woopurana

(Luka 13.22-30)

<sup>13</sup>“Ovolowele musiwu woopurana! Mwaha wi musiwu woorambalala ni dila yookweya dhinadhowiha omarimeelelo, ajinji enohara dila eyene. <sup>14</sup>Mbwenye musiwu woopurana ni dila yooyeva, dhinadhowiha wiigumi-ni yoohumala, athu vang’ono binafwanya dila eyo”.

### Muthanko ni dhoovaha dhiwa

(Luka 6.43-45)

<sup>15</sup>“Mwaraale ni anamavuhulela ooratha! Mwaha wi enoodha wa nyo ni onyengetha wona mabila oopwaasa, mbwenye mmurimani mweewa egali miji dhooguwa. <sup>16</sup>Athu alena nyo munoodha mwaadidele ni dhoovaha dheewa. Mwaha wi kadhidha dhiireya nroga nivahe uuva. Naari mmurulani mvahe mayeebe. <sup>17</sup>Mowindo, muthanko waatene wapama onavaha dhapama, mbwenye muthanko wabure onavaha dhabure. <sup>18</sup>Teto kadhidha dhiireya wi muthanko wapama ovahe dhabure, naari muthanko wabure ovahe dhapama. <sup>19</sup>Muthanko waatene ohunavaha dhapama onogwaddiwa ovokedhiwe vamunddoni. <sup>20</sup>Mowindo, anamavuhulela ooratha ayo munoodha mwaadidele ni dhoovaha dheewa.

<sup>21</sup>“Kahuwo aatene eneera: ‘Nabwiya, Nabwiya’, enaavolowe mu Omwene wa Odhulu, mbwenye ale eneerana ofuna wa Ababa eli odhulu. <sup>22</sup>Nlabo<sup>m</sup> nddo nadha nifiya athu ajinji enoodha egiirelege: ‘Nabwiya, Nabwiya! Kahuwo hiyo navuwihesa mutheenga wa Mulugu mwa ndina neenyu? Nikumihaga mineba dhootakala mwa ndina neenyu? Neerana dhootikiniha dhuulubale mwa ndina neenyu?’ <sup>23</sup>Vevo miyo ginoodha gawiirele voweela: ‘Kaguunonileni. Mvenyevo va, athu owiirana dhabure!’<sup>n</sup>

### Oowaraala ni oolodhowa

(Luka 6.46-49)

<sup>24</sup>“Muthu oli aatene oneewa madhu aaga avirihagamo, onaligana ni muthu oowaraala amagile nyuba yaaye, atibile miliddidha addiihiha, asiddela.

<sup>l</sup> 7.12 *Dhaatedhene dhinafuniinyu wi athu yuwiirelegeni, nyo teto mwawiirelege aliwa.* Madhu ala eneeriwa mukalelo wa oro bu muruya wa nlamulo ni dhosuuziha dha anamavuhulela, weeragana ndo ohaakwaniha dhaatedhene. <sup>m</sup> 7.22 *Nlabo nnaagiwana Nlabo na Othongi Woogomihedha.* <sup>n</sup> 7.23 *Masaalimu 6.8*

<sup>25</sup>Orubwa muzongwe, mihinje odhaala, pevo ni kuluzi yuulubale oddwadha nyuba ele, mbwenye kayatongwile, mwaha wi nyuba ele yahimageya pama. <sup>26</sup>Mbwenye muthu oli aatene oneewa madhu aaga ala, ahaavirihagamo, onaligana ni muthu oolodhowa, amagile nyuba yaaye ahisiddelile kaatibele mooddiihiha. <sup>27</sup>Vevale muzongwe orubwa, mihinje odhaala, pevo ni kuluzi yuulubale oddwadha nyuba ele. Yahitongwa, obwanyuwa yaatene”.

<sup>28</sup>Yesu agamalile owoga madhu alena, anamwinji yahitikiniheyaga ni masuuziho aaye. <sup>29</sup>Vowi oliye asuuzihaga wona muthu anna owodha, kaasuuzihaga wona anamasuuziha a Malamulo.

**Oyilihiwa wa muthu a maredda**  
(*Maruku 1.40-45; Luka 5.12-16*)

**8** <sup>1</sup>Yesu akitaga omwaangoni anamwinji yegi omuhara. <sup>2</sup>Mulobwana mmohi a maredda<sup>o</sup> ahimwaaddamelaga, okokora, omweebedha, wiira: “Nabwiya, mwafuna munowaanda ogeeliha”.<sup>p</sup>

<sup>3</sup>Vevale Yesu ahitadeelaga ndada, omukahinya, wiira: “Gihifuna, kala oweela!” Mowaaguva aheelihiwaga mwa maredda ale. <sup>4</sup>Vano Yesu ahimwiirelaga: “Kumwaaddele muthu, mbwenye odhowe wa namakutha owoone akala ohuyila teto wavelele mvahi walamule Mozezi wi okale onamoona wa athu”.<sup>q</sup>

**Oyilihiwa wa mwiimeleli a sinturiyawu**  
(*Luka 7.1-10*)

<sup>5</sup>Yesu agavolowile oKafaranawu sinturiyawu<sup>r</sup> mmohi ahimwaaddamelaga, omulobaga mwa ntidi, eeraga: <sup>6</sup>“Nabwiya, mwiimeleli aaga vaade onoobulela, kanaanda weedda, onovoreyiwa vajinji”.

<sup>7</sup>Yesu ahimwaaddelaga, wiira: “Ginadhowa wewo, gamuyilihe”.

<sup>8</sup>Mbwenye sinturiyawu ahimwaakulaga, wiira: “Nabwiya, miyo kagili oofwanelela wi guwaakeleni mba mwaaga. Mbwenye muwoge ndhu neenyu nimohi baahi, mwiimeleli aaga onooyila. <sup>9</sup>Mwaha wi gihikalana apogo enawiiweleliimi. Teto gihikalana anyakoddo ginaathongiimi. Gawoga wa mmohi, geera: ‘Dhowa’, oliye onodhowa, wa mmohiwa gawoga, geera: ‘Odhe’, oliye onoodha. Teto gamwaaddela mwiimeleli aaga, geera: ‘Wiirena ela’, oliye onowiirana”.

<sup>10</sup>Yesu ageewile dhedhi ahitikinaga, owoga wa athu yamuharaga, wiira: “Ebaribareene ginowuwaaddelani wi okala ni okala kaginaabihege omoona mwEzarayeli akalana nrromelo nooligana wona na muthu ola. <sup>11</sup>Ginowuwaaddelani wi athu ajinji eneerege odha omadheelo wa nduwa ni a omadhowelo

<sup>o</sup> 8.2 *Maredda* mu ewogelo ya eGerego kinaagana mareddave mbwenye teto dhi-reda dhoohiyana-hiyana dha nikupa na muthu. <sup>p</sup> 8.2 *Ogeeliha* Naari wi: *mugiyilihe*.

<sup>q</sup> 8.4 Levitiku 14.1-32 <sup>r</sup> 8.5 *Asinturiyawu* yaali asogoleli a anyakoddo zana (100) a Roma.



wa nduwa ekalena mburo vameeza ni Abarahamu, Ezaaki ni Yakobo mu Omwene wa Odhulu. <sup>12</sup>Mbwenye ale yafwanelele Omweneya enoodha evo-kedhiwe ode, wa yihi. Wewo oneere okale wuundda ni otakuna meeno”.

<sup>13</sup>Vano Yesu ahiwogaga ni sinturiyawu ole, wiira: “Odhowege, dhiireye mooligana ni ororomela waawo”. Nuwindo, mudhidhi mmohive olene mwiimeleli aaye ahiyilaga.

**Yesu onowaayiliha athu ajinji**  
(*Maruku 1.29-38; Luka 4.38-41*)

<sup>14</sup>Yesu agafiyile vaade va Peduru amfwanyilege mbogohi a Peduru agakonaantile, abulelaga mwaha wa nipaddawe. <sup>15</sup>Yesu ahimukahinyaga ndada, nipaddawe omwihiya. Vevale mma ole ahivenyaga wambeela waakamihedhaga aliwa.

<sup>16</sup>Egudduguddu-guddu, amohi yahimudheelagana Yesu athu ajinji yahiddiwe ni mineba dhootakala. Vano owiigaraga mineba dhootakala ni madhu baahi, aayilihaga aredda aatene. <sup>17</sup>Ahiiragana nda wi dhaakwa-nele nde dhawogile namavuhulela Ezaya wi:

*“Oliyeene ohuthukula dhoolodhowa dheehu,  
ohunaakela teto dhiredda dheehu”.*<sup>s</sup>

**Yesu onowaweeha oofuna omuhara**  
(*Luka 9.57-62*)

<sup>18</sup>Yesu vawooniligiye athu ajinji yamwaapeelele, ahawii-relaga anamasuuzaa aaye wi elabuwele kobela emohiwa ya nyaza. <sup>t</sup><sup>19</sup>Nuwindo, ahimwaaddamelaga namasuuziha a Malamulo, wiira: “Namasuuziha, gineerege wuuharani waatewene onafuniinyu odhowa”.

<sup>20</sup>Mbwenye Yesu ahimwaakulaga, wiira: “Makala ehikanna makungu eewa, balame dha odhulu dhihikanna dhitunji dheewa, mbwenye miyo, Mwaana a Muthu, kaginna voosameeliha muru”.

<sup>21</sup>Namasuuzaa mmohiwa“ ahimulobaga Yesu, wiira: “Nabwiya, gihiyeni vowambeela gidhowe gaalogohe ababa”.

<sup>22</sup>Mbwenye Yesu ahimwaakulaga, wiira: “Ogihare. Waahiye anookwa yaalogohege anookwa eewa”.

**Yesu onomaaliha kuluzi ni pevo**  
(*Maruku 4.35-41; Luka 8.22-25*)

<sup>23</sup>Nuwindo, Yesu agagwelile mmwanddeyani anamasuuzaa aaye yahimveleelaga. <sup>24</sup>Mowaaguva nahitatamuwaga nipevo nuulubale munyaza, ofiyedha mwanddeya ohala vang'ono obwina. Vano mudhidhi olene

---

<sup>s</sup> 8.17 Ezaya 53.4    <sup>t</sup> 8.18 Nyaza enaagiwana Nyaza ya oGalileya.    <sup>u</sup> 8.21 *Namasuuzaa mmohiwa* enatapulela wi ola kaali munikuruni mwa ale kumi ni abiili yaasakuliye.

Yesu eeraga ogona. <sup>25</sup> Vevale anamasuuza aaye yahidhowaga omvenyiha ekuwaga, yiiraga: “Nabwiya, nivulumuseni! Nnookwa!”

<sup>26</sup> Vano Yesu ahaakohaga, wiira: “Athu ooyeva nrromelo, mwaha bwaddi munooviinyu vajinji?” Ageere ndo, Yesu ahivenyaga, osumulula pevo ni kuluzi, dhaatedhene omaala. <sup>27</sup> Athu yahitikiniheyaga, wiira: “Muthu baani olaya, onafiyedha wiweleliwa pevo ni kuluzeene?”

**Yesu onowaayiliha athu oohiddiwa mineba dhootakala**

*(Maruku 5.1-20; Luka 8.26-39)*

<sup>28</sup> Yesu agafiyile kobela ya nyaza, murudda oneethaniwa Gadara, yahidhaaga wa oliye alobwana abiili yahiddiwe ni mineba dhootakala. Aliwa yakumilege omasiye, yahikalagana owali vajinji, kaavo muthu avira dila elene. <sup>29</sup> Vevale alobwana ale yookuwaga, yiiraga: “Munafuna ddi ni hiyo Mwaana a Mulugu? Mudheele onirabuliha mudhidhi ohunaakwane?”

<sup>30</sup> Wookala hiwule, vookumbuziwaga nikwedda nuulubale na kumba. <sup>31</sup> Vano mineba dhootakala dhahimulobaga Yesu mwa ntidi, wiira: “Mweera munikumiha, munirume navolowe munikwedda na kumba nde”.

<sup>32</sup> Yesu ahaakulaga, wiira: “Kaweni!” Mineba nde dhahikumaga mwa alobwana ale, odhowa munikwedda na kumba. Nuwindo, kumba dhaatedhene dhahithamagelaga ojijini, oddadda munyaza, okwa.

<sup>33</sup> Amakambuzi a kumba yahithawaga, ofiya oluwani, owoga dhaatedhene nde dheereyile teto ni dhedho dhawiireyele alobwana ale yahiddiwe ni mineba dhootakala. <sup>34</sup> Nuwindo, athu aatene a nluwa ndde yahidhowaga ogumana ni Yesu, vano egamfwanyile yahimulobaga ni ntidi wi avenyewo omuruddani weewa.

**Yesu onomuyiliha mulobwana ookwa-yaano oKafaranawu**

*(Maruku 2.1-12; Luka 5.17-26)*

**9** <sup>1</sup> Yesu ahigwelaga mmwanddeyani, olabuwela kobela emohiwa, odhowa nluwa na owaniwa. <sup>2</sup> Wewule athu yahimudheelagana mulobwana mmohi ookwa-yaano egamukonaantihile vanteteni. Yesu, agoonile nrromelo nanna athu ale, ahimwiirelaga ookwa-yaano ole: “Mwaanaga, olibe murima, dhoothega dhaawo dhihileveleliwa”.

<sup>3</sup> Vevale anamasuuziha a Malamulo yoowogaga weekiwa, yiiraga: “Mulobwana ola onomunyemula Mulugu!”

<sup>4</sup> Nuwindo, Yesu, voonona moobuwelelo eewa, ahiiraga: “Mwaha bwaddi munoobuweleliinyu dhootakala mmirimani mweenyu? <sup>5</sup> Etthabwile okweya siivi? Wiira: ‘Dhoothega dhaawo dhihileveleliwa’, naari owoga, wiira: ‘Venya weedde?’ <sup>6</sup> Mbwenye munone wi miyo Mwaana a Muthu gihikanna owodha mwiilaboni ya vati woolevelela dhoothega...” Oliye ahirugunuwaga owoga ni ookwa-yaano ole, wiira: “Venya, othukule ntete naawo, odhowege vaade vaawo”.

v 8.28 Masiye a mudhidhi olene yakala wona nikungu.

<sup>7</sup>Ookwa-yaano ole ahivenyaga, odhowaga vaade vaaye. <sup>8</sup>Anamwinji egoonile nde yahikalagana woova, yoomuthithimihaga Mulugu, aavahile athu kopolo dhowinda.

**Yesu onomwiithana Matewuzhi**

*(Maruku 2.13-17; Luka 5.27-32)*

<sup>9</sup>Yesu agavenyile vevale, ahimoonaga muthu mmohi eethaniwa Matewuzhi agakaraatile vamburoni vookoha musoko, Yesu ahimwiirelaga: “Ogiharege!” Matewuzhi ovenya omuharaga.

<sup>10</sup>Vano Yesu agali mba<sup>w</sup> ajaga yahidhaaga anamakoha-musoko ajinji ni anamathega, okaraati vamohi ni Yesu ni anamasuuzwa aaye. <sup>11</sup>Vevale aFarizi egoonile nde, yahaakohaga anamasuuzwa a Yesu, wiira: “Mwaha bwaddi nama-suuziha eenyu onaja ni anamakoha-musoko teto ni athu oothega?”

<sup>12</sup>Yesu ageewile dhedho ahiiraga: “Ale eli agumi kinamurabulela namugu, eehi, mbwenye ale eli aredda. <sup>13</sup>Dhowani, mwasuuzwa yoo-tapulela ya madhu ala: ‘Ginafuna thagaraga ohiya mukutho’.<sup>x</sup> Vowi kagidheelee wawiithana athu apama, mbwenye athu oothega”.<sup>y</sup>

**Yesu onokohiwa mwaha woothuga**

*(Maruku 2.18-22; Luka 5.33-39)*

<sup>14</sup>Nuwindo, anamasuuzwa a Zhuwawu Namabathiza yahimwaaddamelaga Yesu, omukoha, wiira: “Mwaha bwaddi hiyo ni aFarizi nthugaga [dila dhijinjidhene], anamasuuzwa eenyu ehithugaga?”

<sup>15</sup>Yesu ahawaakulaga, wiira: “Kadhinaandeya wi aliba wiithaneliwa matelo ekale ookubanya namatelaya agali vevo! Enoofiya malabo eneriiwa yaakiwe namatelaya, mwa malabo ayene fineeriiwa ethugege.

<sup>16</sup>“Kalivo onasonela ecapa exa vaguwoni yawale, mwaha wi ecapa eyo enowoomola guwo yawale, otaleya wiwa onootthabwa. <sup>17</sup>Naari vinyu muxa kanaheliwa mmathumbani a makupa awale, mathumbaya enootaleya, vano vinyuya onothathiya, mathumbaya enomala mabasa. Mbwenye vinyu muxa onaheliwa mathumba maxa, ndala dhaabiilidhene dhinologoleya”.

**Yesu onomuyiliha mwaana a musogoleli ni mma mmohi**

*(Maruku 5.21-43; Luka 8.40-56)*

<sup>18</sup>Yesu awaaddelaga dhego dhedhi ahifiyaga musogoleli, mmohi a nyuba ya matugumano, ahimwaaddamelaga, okokora, omweebedha,

---

<sup>w</sup> 9.10 Naari wi: *vaade va Matewuzhi*. Moone Luka 5.29. <sup>x</sup> 9.13 Ozeya 6.6 <sup>y</sup> 9.13 Eno-fwanyeya madhu owi: *mbwenye athu oothega wi etthwaruwe* mu dhoolebiwa ni madada dhimohi dhixa. Mbwenye anamasuuzwa ajinji enoobuwela wi wi *etthwaruwe* kiyalebiwe ni murumiwi Matewuzhi.

wiira: “Mwaanaga a mwaana-mwihiyana ohukwa dhiinoveva, mbwenye mudhe, mmuhele ndada, oliye oneere okanna egumi”.<sup>19</sup> Vevale Yesu ahivenyaga omuhara ni anamasuuzaa aaye.

<sup>20</sup>Teto vahikalaga mwihiyana mmohi abulela ofiyedha yaaka kumi ni biili, oredda wookuma mwazi. Mwihiyana ole ahidheelaga odduli waaye okahinya nipiyo na yoowara yaaye,<sup>21</sup> vovi owubuwelelaga mmurimani mwaaye yeeka, wiira: “Giira gikahinya yoowara yaaye ginooyila”.

<sup>22</sup>Vano Yesu ahirugunuwaga, omoona, wiira: “Mwaanaga, olibe murima, nrromelo naawo nuhuuyiliha”. Mowaaguva, mudhidhi olene, mwihiyana ole oyila.

<sup>23</sup>Yesu agafiyile vaade va musogoleli ole ahawoonaga anamooba mvilovilo vano athu ajinji owukuuweene yuunddaga, oliye wiira: <sup>24</sup>“Venyavoni mwaha wi mwaana-mwihiyana ola kakwile, onoogona”. Vano anamwinji yoomuteyaga. <sup>25</sup>Nuwindo, athu egavenyilevo Yesu ahivolowaga mba, omwihiddeela ndada mwaana-mwihiyana ole, oliye ovenya. <sup>26</sup>Vano bili ya mapadduwo ale yahimwadheyelaga murudda waatene olene.

### Yesu onowaayiliha athu abiili oohoona ni muthu oohuwoga

<sup>27</sup>Yesu amaruwaga vevale yahimuharaga athu oohoona abiili, ekuwaga, yiiraga: “Mwaana a Davidi,<sup>z</sup> muneeddiwele thagaraga hiyo!”

<sup>28</sup>Agavolowile mba yahimwaaddamelaga oohoona ale, vano Yesu ahaakohaga, wiira: “Munororomela wi ginowaanda wuwiirelani dhedho?” Aliwa waakula, wiira: “Ee, Nabwiya!”

<sup>29</sup>Vevale Yesu ahaakahinyaga meento eewa, wiira: “Dhiireye wona ororomela weenyu”. <sup>30</sup>Vano meento eewa yahifuguwaga. Ahaasinjeedhaga vajinjivene, wiira: “Pole-pole ahikalevo mmohi oneere anone”. <sup>31</sup>Mbwenye aliwa egavenyile vevale, yahilaleyaga murudda waatene olene.

<sup>32</sup>Oohoona ale evenyagavowene, athu amohi yahimudhaagana wa Yesu muthu oohuwoga, oohidhiwa muneba wootakala. <sup>33</sup>Vevale Yesu agakumihile muneba wootakala ole, oohuwoga ole ahambeelaga owoga. Anamwinji yootikinaga, yiiraga: “Okalawene kinaabihege wooneya yego yowindala wEzarayeli!”

<sup>34</sup>Mbwenye aFarizi yoonong'onaga, yiiraga: “Ola onakumiha mineba dhootakala ni kopolo dhinamvaha musogoleli a mineba dhootakala”.

### Thagaraga dha Yesu

<sup>35</sup>Yesu oweeddeedda mmaluwani ni mmavade mwaatemwene, asuuzihaga mu nyuba dha matugumano,<sup>a</sup> alaleyaga Muselu Wapama wa Omwene, ayili-

<sup>z</sup> 9.27 Kahuwo wi Yesu aali Mwaana a Davidi; enatapulela namabaliwelamo a nlogo na Davidi. <sup>a</sup> 9.35 *Nyuba dha matugumano* Nda mu ewogelo ya eGerego dheeriwa *sinagoga*. Mabasa eewa kayaali oolobelamoove, naari osuuzamo Malamulo, mbwenye teto yowaatho-  
ngamo athu yahaaharihamo Malamulo a aZhudewu.

haga dhoovoreya ni dhiredda dhaatedhene. <sup>36</sup>Oliye vowawoona anamwinji oowaweeddiwelaga thagaraga vowi yaali ookathamiheya, oohukanna owaakamihedha wona mabila oohiyiwa oohukanna makambuzi. <sup>37</sup>Vano ahidhowaga wa anamasuuzaa aaye, wiira: “Ebaribareene mabasa oohadda ehunnuwa, mbwenye anamalaba eli vang’ono. <sup>38</sup>Mowindo mmulobe Nabwiya, mwiinya a mabasa oohadda wi aarume anamalaba omahaddelo waaye”.

**Yesu onowaaruma arumiwi kumi ni abiili**

(*Maruku 3.13-19; 6.7-13; Luka 9.1-6*)

**10** <sup>1</sup>Yesu ahawiithanaga anamasuuzaa aaye kumi ni abiili waavaha oowodha woolamula ni wiigara mineba dhootakala, ni oyiliha dhoovoreya ni dhiredda dhaatedhene.

<sup>2</sup>Anamasuuzaa kumi ni abiili ayene teto yeethaniwa arumiwi, mandinaya baala: owambeela Simawu, oononeya ni ndina na Peduru, Andire, ddibila aaye; Tiyyago, mwaana a Zebedeyo, ni ddibile Zhuwawu. <sup>3</sup>Filipi ni Baritolomeyo; Tome ni Matewuzhi, namakoha-musoko; Tiyyago, mwaana a Alifiyu, ni Tadeyu. <sup>4</sup>Simawu (a nikuru na aZeloti,) <sup>b</sup> ni Zhudasi a oEsikariyothi, ole ampeleke.

<sup>5</sup>Kumi ni abiili ala Yesu ahaaruma, wiira: “Kamudhowe wa athu oode, naari ovolowa mmaluwani a aSamariya, <sup>6</sup>mbwenye mudhowe wa mabila oorimeela a nyuba ya aEzarayeli. <sup>7</sup>Munaavirigiinyu mulaleyege, mwiirege: ‘Omwene wa Odhulu ohaaddamela’. <sup>8</sup>Mwaayilihege aredda, mwaavenyihege ookwa, mwaweelihege a maredda, <sup>c</sup>mwiigarege mineba dhabure. Mwaakelile mwa mahala; vahani mwa mahala. <sup>9</sup>Kamuthukule oro, kamuthukule parata, kamuthukule korowa ya mukuwa musintuni mweenyu. <sup>10</sup>Kamuthukule thumba na voolenddoni, kamuthukule maleya meenddi, kamuthukule saphatho, kamuthukule mukogodho, vowi namalaba onofwaneela waakela yooja yaaye.

<sup>11</sup>“Mwaavolowaga muluwani naari mmuruddani mukohedhelege dha muthu oofuna wuwaakelani, mukalege vevo ofiyedha nlabo noovenyamo. <sup>12</sup>Mwaavolowaga mbamo mwiirege: ‘Murenddele okale ni nyo’. <sup>13</sup>Vano athu a vaade vo yowaakelani moofwanelela murenddele weenyu okale ni aliwa; yahuwaakelani moofwanelela murenddele owelelege wa nyo. <sup>14</sup>Muthu oli aatene ahuwaakelani, naari ahivuruwana madhu eenyu, mwaavenyaga vaade vevale naari muluwani mule mutatege nthubi na mmanyaloni mweenyu. <sup>d</sup> <sup>15</sup>Ebaribareene ginowuwaaddelani wi Nlabo na Othongi, Mulugu

<sup>b</sup> **10.4** *AZeloti* Aliwa yaali a nikuru na aZhudewu yeethukulela oPalestina wona anamurala. Aliwa yooofuna wiinyuwela mwa pwere wi yaagonjihe ni wawiiigara aRoma.

<sup>c</sup> **10.8** *Maredda* mu ewogelo ya eGerego kinaagana mareddave mbwenye teto dhiredda dhoohiyana-hiyana dha nikupa na muthu. <sup>d</sup> **10.14** Yesu ahaalamulaga anamasuuzaa aaye wi etate nthubi na manyalo eewa wooniha wi ale enakoodda Muselu Wapama enakala ookoneya. Moone Maruku 6.11; Luka 9.5; 10.11; Meerelo a Arumiwi 13.51.

onoodha amweeddiwele thagaraga vajinji Soddoma ni Gomora,<sup>e</sup> ohiya nluwa nddo. <sup>16</sup>Mwiwe pama, miyo ginowuurumani wona mabila vaari va miiji; mowindo mukale ooxaga wona nyowa, oofwaasa wona kangayiwa.

<sup>17</sup>“Muxage ni athu mwaha wi eneerege wuupelekani mmithegoni mwa miladdu, muneerege owaxuliwa mu nyuba dha matugumano,<sup>f</sup> <sup>18</sup>mwaha wa miyo muneerege othukuleliwa vameentoni va makuminadori ni va mamwene wi mwaakulele onamoono wa aliwa ni wa athu oode. <sup>19</sup>Mwaathukuleliwaga omuladduni muhukathamiheyege, mwiiraga: ‘Ginawoge ddi?’ Vowi va mudhidi oyene muneerege ovahiwa madhu oofuna owoga. <sup>20</sup>Vowi onawogege kahuwo nyo mbwenye Muneba wa Babiinyu bunawogege mwa nyoovo.

<sup>21</sup>“Ddibila onoodha ampelekege ddibile wi apiwe, vano baabi onoodha ampelekege mwaanaye, ahima enoodha yawiinyuwelege ababiwa ofiyedha waapa. <sup>22</sup>Aatene eneerege wuwiiddani mwaha wa ndina naaga, ole onaavilele ofiyedha omakuthulo oneere ovulumusiwa. <sup>23</sup>Mwaaharahariwaga va nluwa nimohi muthawelege nluwa nimohiniwa, vovi ebaribareene ginowuwaaddelani wi kamunamarihe weddedda maluwa maatene a Ezarayeli ahifiyile Mwaana a Muthu.

<sup>24</sup>“Kalivo namasuua onamukwaranya namasuuziha aaye, naari kalivo mwiimeleli onamukwaranya nabwiye. <sup>25</sup>Mowindo sowaakwanela wi namasuua aliganene ni namasuuziha aaye, mwiimeleli aliganene ni nabwiye. Ki akala mwiinya a vaade athu enamwiithana wi Belezebu,<sup>g</sup> ki emudhi ya vaade vo kinamwiithanena mandina ootakala ookwaranya ndda?

<sup>26</sup>“Ndala muhumoove muthu, vovi kilivo yookuneeleya ehinaadhe yooneyihiwa, kilivo yawipiini ehinaadhe enoniwa. <sup>27</sup>Dhedho dhinowaa-ddeliimini mowiipiteya nyo muwoege voweela, nde dhinaaddeliwiinyu moonong'ona mulaleyege ni ndhu nootaama. <sup>28</sup>Kamwawoovege ayene enapa mwiili mbwenye kinaanda opa muneba. Mmoovege oyene onaanda obwanyulela muneba ni mwiili omunddoni woohuthima. <sup>29</sup>Kinagulihiwa anamandwi abiili ni sentaavu mmohi? Mbwenye kavili balame emohi enaamorevo Babiinyu ahirumeedhihe. <sup>30</sup>Owoga dha nyo, ni mathitheene a mmuruni enoweelengiwa. <sup>31</sup>Mowindo kamoovege, vovi muli oofuneya waakwaranya anamandwi ajinji.

<sup>32</sup>“Mowindo ole onagirumeedha vameentoni va athu, miyo teto ginoodha gimurumeedhe vameentoni va aBaba eli odhulu. <sup>33</sup>Mbwenye ole onagikoodda vameentoni va athu teto miyo ginoodha gimukoodde vameentoni va aBaba eli odhulu.

<sup>34</sup>“Muhuubuwelele wi miyo gidhiilena murenddele mwiilaboni ya vati; kagidhiilena murenddele, mbwenye gidhiilena koddo. <sup>35</sup>Vovi gidheelee

<sup>e</sup> 10.15 Wambeela 18.20; 19.24-28    <sup>f</sup> 10.17 *Nyuba dha matugumano* Nda mu ewogelo ya eGerego dheeriwa *sinagoga*. Mabasa eewa kayaali oolobelamoove, naari osuuzamo Malamulo, mbwenye teto yowaathongamo athu yahaaharihamo Malamulo a aZhudewu.  
<sup>g</sup> 10.25 *Belezebu* Ndina nnavahiwa Sathana vookala musogoleli a mineba dhootakala.

*ommwalaniha mulobwana ni ababe, mwaana-mwihiyana ni amaaye, nzala ni nzaliye.* <sup>36</sup> *Mowindo amwiiddani a muthu enaakalege amudhi a vaade vaaye.*<sup>h</sup>

<sup>37</sup>“Ole onaadhivela ababe naari amaaye ogikwaranya miyo kanafwaneela okala namasuuzwa aaga; ole onamudhivela mwaanaye a mulobwana naari a mwihiyana ogikwaranya miyo kanafwaneela okala namasuuzwa aaga; <sup>38</sup>ole ohunathukula muraddi waaye agiharaga, kanafwaneela okala namasuuzwa aaga. <sup>39</sup>Ole onalogolela egumi yaaye onorimeeliha, mbwenye onarimeeliha egumi yaaye mwaha wa miyo onofwanya.

<sup>40</sup>“Ole onowaakelani onagaakela miyo; onagaakela miyo onamwaakela ole ogirumile. <sup>41</sup>Onamwaakela namavuhulela<sup>i</sup> mwaha wowi namavuhulela onoodha aakele yoothuviwa ya namavuhulela, onamwaakela ooharihamo mwaha wi onoharihamo efunelo ya Mulugu onowaakela yoothuviwa ya ooharihamo. <sup>42</sup>Ole oneere amvahe kopo ya mahinje ooddiddila mmohi mwa oofuneya vang'onong'onove mwa anamasuuzwa aaga, mwaha wookala namasuuzwa aaga, ebaribareene ginowuwaaddelani wi kadha ayelela yoothuviwa yaaye”.

**Zhuwawu Namabathiza onowaaruma anamasuuzwa aaye wa Yesu**  
(Luka 7.18-35)

**11** <sup>1</sup>Yesu agamalile wawaaddelihamo anamasuuzwa aaye kumi ni abiili, ahivenyaga wewule, odhowa osuuzihaga, alaleyaga mmaluwani mweewa.<sup>j</sup>

<sup>2</sup> Zhuwawu Namabathiza ahiiwaga agali mukaambura dhiwogiwaga dha mabasa a Kirixtu<sup>k</sup> ole aroromelihiwe, ahaarumaga anamasuuzwa aaye wi yamukohe wi: <sup>3</sup>“Di nyo ole eeriwa onofiya,<sup>l</sup> kaahi nimujejihege mmohi?”

<sup>4</sup>Yesu ahaakulaga, wiira: “Dhowani mwamwaaddele Zhuwawu dhedho dhineewiinyu, dhinooniinyu wi: <sup>5</sup>Aliba ohoona enowoona, aliba otopiya enoweedda, aliba mareda<sup>m</sup> enoweelihiwa, aliba ohiiwa enowiiwa, anookwa enovenyihwi, oorabula enolaleyeliwa Muselu Wapama. <sup>6</sup>Ooreelihiwa duule ohunakwakwathuwe mwaha wa miyo”.

<sup>7</sup>Nuwindo, anamasuuzwa a Zhuwawu evenyagavowene, Yesu owaakohaga anamwinji mwaha wa Zhuwawu, eeraga: “Mwadhhowile woona ddi mwiiddeddereni? Bango yoothikeya ni pevo? <sup>8</sup>Ki vano mwadhhowile

<sup>h</sup> 10.36 Moone Mikeya 7.6 <sup>i</sup> 10.41 *Namavuhulela* onaagiwana olene onalaleywa mutheenga wa Mulugu. <sup>j</sup> 11.1 *Mmaluwani mweewa* enaagiwana maluwa yaali a aZhudewu.

<sup>k</sup> 11.2 *Kirixtu* mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. <sup>l</sup> 11.3 *Ole eeriwa wi onofiya* enamwaagana Muthikitheliwi, oyene aZhudewu aatene yamujejihedhiwa ofiya, Misiya, naari wi Kirixtu.

<sup>m</sup> 11.5 *Mareda* mu ewogelo ya eGerego kinaagana maredave mbwenye teto dhiredda dhoohiyana-hiyana dha nikupa na muthu.

woona ddi? Muthu oowara guwo dhoofeewa? Moone enawara guwo dhoofeewa enakala mmavade mwa mamwene. <sup>9</sup>Ki vano mwadhowile woona ddi? Mwamoono namavuhulela? Ee, miyo ginowuwaaddelani wi oyene onamukwaranya namavuhulela. <sup>10</sup>Ola di Zhuwawu Namabathiza oyene awogiwe mMalebani yiiraga:

“ *‘Miyo ginomuruma osogolo waawo  
murumiwi aaga, oyene  
onaasanyedhege dila vasogolo vaawo’*”.

<sup>11</sup>Ebaribareene ginowuwaaddelani wi athu aatene ebaliwe ni mwihiana kalivo mpogo okumelele omukwaranya Zhuwawu Namabathiza, mbwenye mung'onong'ono muuMweneni wa Odhulu di mulubale omukwaranya oyene. <sup>12</sup>Wambeela malabo a Zhuwawu Namabathiza, ofiyedha dhiinova, Omwene wa Odhulu onowaneliwa, vano ale enawanela ni kopolo binaaka. <sup>13</sup>Mwaha wi Anamavuhulela aatene teto Malamulo evuwihile ofiyedha mudhidhi wa Zhuwawu. <sup>14</sup>Mwafuna orumeedha nda: Zhuwawu dili Eliyazi, oyene aadhe. <sup>15</sup>Ole winna obaruni,<sup>o</sup> eewe!

<sup>16</sup>“Ginaafwanafwanihe mulogo ola ni aani? Onaligana ni ahima eka-raatile vamusika yaakuwelaga akwiwa:

<sup>17</sup>“ *‘Hiyo nuhuwoobelani mvilovilo,  
nyo kamwiinile;  
nihiiba jibo ya vamakwelo,  
nyo kamuunddile’*.

<sup>18</sup>Vowi Zhuwawu ohudha onathuga, ohunamung'wa vinyu, vano athu eni: ‘Ohukanna muneba wabure!’ <sup>19</sup>Ohudha Mwaana a Muthu, onaja, onang'wa, athu eni: ‘Mmoone mulobwana ola, nanrima, namang'wa; akwaaye bi anamakoha-musoko ni anamathega!’ Mbwenye tthottho dhinooneya ni mabasa eewa”.

### **Oddilu wa maluwa oohutthwaruwa** (Luka 10.13-15)

<sup>20</sup>Nuwindo, Yesu ahambeelaga osumulula maluwa alene mweerihedhigiye dhootikiniha dhijinji. Oliye owaasumululaga mwaha woohufuna otthwaruwa, ahiiraga: <sup>21</sup>“Oddilu wa we Koraziimi! Oddilu wa we Betisayida! Yaheereye matikiniho oTiru ni oSidoni<sup>p</sup> yiiriwana maluwa eenyu, aliwa yootthwaruwa walenene, yoowara guwo dha masakwi, yiikuthulele nddoora. <sup>22</sup>Mbwenye miyo ginowuwaaddelani wi Nlabo na Othongi, Mulugu onoodha amweeddi-

---

<sup>n</sup> 11.10 Malakiya 3.1   <sup>o</sup> 11.15 Enofwanyeya madhu owi: *Ole winna obaruni wowiiwana, eewe!* mu dhoolebiwa ni madada dhimohi dhixa. Mbwenye anamasuza ajinji enoobuwela wi *wowiiwana* kiyalebiwe ni murumiwi Matewuzhi.   <sup>p</sup> 11.21-22 Moone dha oTiru ni oSidoni mmaniivuru a Ezaya 23.1-18; Ezekiyeli 26.1 ofiyedha 28.26; Zhouweli 3.4-8; Amosi 1.9-10; Zakariya 9.2-4.



wele thagaraga vajinji Tiru ni Sidoni, ohiya nyo, Koraziimi ni Betisayida. <sup>23</sup>Teto we Kafaranawu, onoobuwelela wi oneere wiigweliha ofiye odhulu? Naari, onookitihwa ovokedhiwe mburo wa anookwa; mwaha wi oSoddoma, yaheeriwewo matikiniho yiiriwena we, ookalawoove ofiyedha peeno. <sup>24</sup>Ginowuwaaddelani wi Nlabo na Othongi, Mulugu onoodha amweeddiwele thagaraga vajinji Soddoma, ohiya weewo, Kafaranawu”.

### Mudhe wa miyo mvume

(Luka 10.21-22)

<sup>25</sup>Va mudhidhi olene Yesu ahiraga: “Babani, mwiinya a elabo ya vati ni odhulu, ginowuutamaalani mwaha wowi muhaaloghedha athu attho ttho ni oosuuza dhego nda, vano nyo wooneyihedha oohusuuzza. <sup>26</sup>Ee, Babani, mwafunile wi dhikale ndala.

<sup>27</sup>“Dhaatedhene gihivahiwa ni Ababa. Kalivo onamunona Mwaana ahili Babe; vano kalivo onamunona Baabi ahili Mwaanaya teto ni oyene Mwaana onamfuniye omooneyela.

<sup>28</sup>“Dhaani wa miyo, nyo mwaatene oogoma ni oonyemeliwa sapo, vowi miyo ginowuuvahani ovuma. <sup>29</sup>Mwiireye sapo yaaga, musuuzze wa miyo, mwaha wi gili ookurumuwa ni owiiveviha murima; vano munoofwanya ovuma wa mineba dheenyu. <sup>30</sup>Vowi nipiddi naaga kannarusa, vano sapo yaaga soovevuwa”.

### Yesu di Nabwiya a sabuddu

(Maruku 2.23 ofiyedha 3.6; Luka 6.1-11)

**12** <sup>1</sup>Mudhidhi olene, nlabo na sabuddu, Yesu ahiviraga mmiddani mwa tirigu. Anamasuuzza aaye yahikalagana dala, yahambeelaga okothola mangala a tirigu waatakunaga. <sup>2</sup>AFarizi egoonile nde, yahiraga: “Kawoone! Anamasuuzza aawo enowiirana dhihinarameedhihiwa wiiriwana nlabo na sabuddu!”<sup>q</sup>

<sup>3</sup>Yesu ahawaakulaga, wiira: “Nyo kamweelengile dheerilege mwene Davidi ni akwaaye eganna dala?” <sup>4</sup>Oliye ahivolowaga mu nyuba ya Mulugu vamohi ni ayene yaaligi ni oliye, ojamo mikaathe dhorelihiwa, dhedho dhaharameedhihiwa. Oliye oja vamohi ni ale yaaligi ni oliye, mbwenye dhajiwa anamakutha weekiwa. <sup>5</sup>Teto kamweelengile mMalamuloni wi anamakutha enolupa magano a sabuddu, mu nyuba ya Mulugu mbwenye kinakanna yoothega? <sup>6</sup>Miyo ginowuwaaddelani wi yego enakwaranya nyuba ya Mulugu eli veva. <sup>7</sup>Nyo mwahaanone yootapulela ya madhu eneeriwa: ‘Ginafunu thagaraga ohiya mikutho’,<sup>t</sup> kamwaakonege ale ehinna muladdu. <sup>8</sup>Vowi Mwaana a Muthu di Nabwiya a sabuddu”.

<sup>q</sup> 12.2 Malamulo a Mozezi enokooddhiha olaba nlabo na sabuddu. Moone Okuma 20.8-11; Deteronomiyo 5.12-14. <sup>r</sup> 12.3 Moone Samuweli Owambeela 21.1-6 <sup>s</sup> 12.6 Yego Yesu va oneyaagana oliyeene, naari Omwene wa Mulugu. <sup>t</sup> 12.7 Ozeya 6.6

<sup>9</sup>Yesu avenyaga vevale, ahivolowaga mu nyuba dha matugumano<sup>u</sup> dheewa. <sup>10</sup>Mwemule mwahikalaga muthu mmohi akwile ndada. AFarizi yahimukohaga Yesu wi esayeke mwaha woomusumelana, wiira: “Dhino-rumeedheya oyiliha nlabo na sabuddu?”

<sup>11</sup>Oliye ahawaakulaga, wiira: “Muthu baani mwa nyoovo onakanna nibila naaye, vano nlabo na sabuddu, nimorela mmuliddini ahidhowa akumihamo? <sup>12</sup>Ki vano muthu kanna thima okwaranya nibila? Mowindo dhinorumeedhiwa wiirana yapama nlabo na sabuddu”.

<sup>13</sup>Vevale ahimwiirelaga muthu ole: “Otadeele ndada”. Otadeela, oyila, ofwanafwanaga ni nimohiniwa. <sup>14</sup>AFarizi evenyaga vevale yahitugumanaga, omuwogaga mawuje esayelaga mukalelo woomba.

### Yesu mwiimeleli oosakuliwa a Mulugu

<sup>15</sup>Yesu aganonile nda, ahivenyagavo. Athu ajinji yahimuharaga, waa-yiliha aatene. <sup>16</sup>Owawaaddelaga wi ehimulaleye <sup>17</sup>nda dhahipadduwa wi dhaakwanele dhawogile Mulugu odheela mwa namavuhulela Ezaya, eeraga:

<sup>18</sup> *“Ola di mwiimeleli aaga gimusakuliimi,  
oodhivela aaga, onahagalaliimina.  
Gineere ohela Muneba waaga mwa oliye,  
oneere olaleya wogoowa waaga wa athu oode.*

<sup>19</sup> *Kadha apaambiha, naari okuwa;  
ndhu naaye kanidha niuweya mmarampani.*

<sup>20</sup> *Kadha akothola bango yoonyenyeya,  
naari othimiha panti yoothuwa mwiisi,  
ofiyedha wogoowa waaga ogonjihe,*

<sup>21</sup> *mwa oliye athu oode eneere okalana ojejihedha”.*<sup>v</sup>

### Kopolo dha Yesu dhowiigarana mineba dhootakala.

*(Maruku 3.20-30; Luka 11.14-23)*

<sup>22</sup>Vano yahimudheelagana muthu oohiddiwa ni muneba wootakala, koono, kaawoga; Yesu omuyiliha muthu ole, wambeela owoga ni woona. <sup>23</sup>Anamwinji yootikinaga, ewogaga, yiiraga: “Olaya Mwaana a Davidi?”<sup>w</sup>

<sup>24</sup>Mbwenye aFarizi, egeewile ndo, yahiiraga: “Ola oneegara mineba dhootakala ni kopolo dha Belezebu,<sup>x</sup> mpo go a mineba ndo”.

<sup>u</sup> 12.9 Nyuba dha matugumano Nda mu ewogelo ya eGerego dheeriwa *sinagoga*. Mabasa eewa kayaali oolobelamoove, naari osuzamo Malamulo, mbwenye teto yowaathongamo athu yahaaharhamo Malamulo a aZhudewu. <sup>v</sup> 12.18-21 Ezaya 42.1-4 <sup>w</sup> 12.23 *Mwaana a Davidi* Ndda naali ndina nimohi na Misiya nanoniwiiyena ni aZhudewu. <sup>x</sup> 12.24 *Belezebu* naali ndina nnavahiwa Sathana vookala musogoleli a mineba dhootakala. Moone teto verisikulu 27.

<sup>25</sup>Yesu, aganonile moobuwelo eewa, ahiiraga: “Omwene waatene onagawanyeya weekiwa ohumala, nluwa nili naatenene naari nyuba enagawanyeya mwa weekiwa ehibwanyuwa. <sup>26</sup>Akala Sathana onomwii-gara Sathana mukwaaye, sowi omweneya ohugawanyeya, ki oliye onaalibihe addi omwene waaye? <sup>27</sup>Akala miyo gineegara mineba dhootakala ni kopolo dha Bezezebu, ki aniinyu eneegara ni kopolo dhawani? Mwaha wa eyo anamasuuzza eenyu binaadhe yuuthongeni wi nyo muli anamathega. <sup>28</sup>Mbwenye akala miyo gineegara mineba dhootakala ni Muneba wa Mulugu, ndo dhinooniha wi Omwene wa Mulugu ohufiya wa nyo.

<sup>29</sup>“Dhinaandeya addi muthu ovolowa nyuba ya mmohi akopolo wi amwiiyele dhookalana dhaaye ahaabihile ommaga? Oliye agamalile ommaga muthu ole akopolo finaandiiye wiiya vaade vale.

<sup>30</sup>“Ole ohuneewanana ni miyo, doopokihana ni miyo. Ole ohunagikamihedha otugumanya, oliye onoomwadha. <sup>31</sup>Mwaha wa ela ginowuwaaddelani wi yoothega yaatene ni onyemula oneerana athu enoodha eleveliwe, mbwenye onanyemula Muneba Woweela kadha aleveliwa. <sup>32</sup>Onamuwogela Mwaana a Muthu madhu oonyemula onoleveliwa, mbwenye onanyemula Muneba Woweela, kadha aleveliwa elabo elena naari elabo enadha.

<sup>33</sup>“Mweeraga muthanko ola bwapama, enatapulela wi dhoovaha dhiwa sapama, mbwenye mweeraga muthanko ola bwabure, dhoovaha dhiwa sabure, vowi muthanko onanoneya ni dhoovaha dhiwa. <sup>34</sup>Nyo, mulogo wa dhivili! Munaande addi owoga dhego dhapama, mugali abure? Vowi mulomo onawoga dhidhaalile mmurimani. <sup>35</sup>Muthu apama onakumiha dhoorela dhapama mmurimani mwaaye, mbwenye muthu abure onakumiha dhego dhabure mmurimani mwaaye. <sup>36</sup>Ginowuwaaddelani wi madhu maatene eebeweene enawoga athu, Nlabo na Othongi onoodha awaakulele. <sup>37</sup>Mwaha wi ni madhu aawo onoodha ovulumusiwena teto ni madhu aawo onoodha okoniwena”.

### Etoonyihedho ya Zhonasi

(Luka 11.29-32)

<sup>38</sup>Vano anamasuuziha a Malamulo amohiwa ni aFarizi yahiwoyaga, wiira: “Namasuuziha, nnafunu munoonihe etoonyihedho yootikiniha”.

<sup>39</sup>Yesu ahawaakulaga, wiira: “Nlogo nooholowa, nohiwelela,<sup>y</sup> nnaloba etoonyihedho; kilivo etoonyihedho emohiwa enoonihiwiiwa ehili ya namavuhulela Zhonasi. <sup>40</sup>Vowi Zhonasi ahikala malabo maraaruru mutana ni mahiyu mbaani mwa somba yuulubale, mowindo Mwaana a Muthu oneere okala malabo maraaruru mutana ni mahi-

<sup>y</sup> 12.39 Naari wi: *nooraruwa*.

yu muwari mwa theya. <sup>41</sup>Athu a oNinive enoodha evenye, Nlabo na Othongi, ekone nlogo ndda mwaha wi veewiliwa olaleya wa Zhonasi, yahitthwaruwa. Mbwenye oli va doomukwaranya Zhonasi. <sup>42</sup>Mwene a mwihiyana a wewo onakumela pevo onoodha avenye Nlabo na Othongi, akone nlogo ndda, vowi oliye odhiile omagomelo wa elabo wi eewe tthottho dha Salomawu. Vano mmoone oli va ohumukwaranya Salomawu.

<sup>43</sup>“Muneba wootakala wakuma mwa muthu, onoweeddedda mburo dhoohukala mahinje, osayelaga voovumavo, mbwenye kunafwanya. <sup>44</sup>Mwaha wa eyo onowiira: ‘Ginowelela vaade vaaga vakumiliimi’. Aawelegagavo onafwanya vihili muthu, mugazheliwe, mugasanyedhiwe pama. <sup>45</sup>Vano onodhowa othukula mineba dhimohi mitanu ni miinddi, dhootthabwesesa dhoohiyana ni oliye, dhinovolowa okalaga mwemo; vano mukalelo wa muthu oyo onakala wootakala okwaranya wale. Dhinadha dhiireye ndo ni mulogo ola wabure”.

**Amaaye ni addibile a Yesu**  
(*Maruku 3.31-35; Luka 8.19-21*)

<sup>46</sup>Yesu awogaga madhu alena, amaaye ni addibile yahifiyaga ode omusayelaga wi emuwogena. <sup>47</sup>[Muthu mmohi ahimwaaddelaga, wiira: “Amaayo ni addibilo eli vaade va. Enafuna ewoge ni nyo”.]

<sup>48</sup>Oliye ahimwaakulaga ole amwaaddelege, wiira: “Amma ni addibilaga baani?” <sup>49</sup>Ahitadeelaga madada wa anamasuuzi, wiira: “Amma ni addibilaga baala eli veva. <sup>50</sup>Mwaha wi ole oneerana ofuna wa aBaba a odhulu, oyene dili ddibilaaga, murogoraga ni amma”.

**Musibe wa namadhala**  
(*Maruku 4.1-20; Luka 8.1-15*)

**13** <sup>1</sup>Nlabo nendde Yesu ahivenyaga vaade, okaraati seresere ya nyaza. <sup>2</sup>Vano athu ajinji yahitugumanaga vakukuuve ni oliye. Mwaha wa eyo ahivolowaga mmwanddeyani okaraati, athu aate-ne egeemelile vamuseengani. <sup>3</sup>Owawaaddelaga dhego dhijinji mwa misibe eeraga: “Namadhala ahimaruwelaga okuthela. <sup>4</sup>Akuthelaga bewu dhimohi dhahimorelaga seresere ya dila, balame dhahidhaaga ojava. <sup>5</sup>Bewu dhimohi dhamorelege theya ya mabwe, vaaligi theya vang'ono. Dhahimelaga mowaaguva, vowi kavaali theya ejinji. <sup>6</sup>Nduwa nigoobile dhahummaga okwa, vowi misisidha kadheetibele. <sup>7</sup>Bewu dhimohi dhamorelege vamiingani, miinga ndo dhunnuwaga dhahihoga. <sup>8</sup>Dhimohi dhiwa dhahimorelaga theya yapama, dhahivahaga dhilo moweenjedhedheya, zana (100), emohi yahivahaga dhilo makumi matanu ni emohi (60), emohi yahivahaga dhilo maku-

mi maraaruru okwaranya nde dhakutheliwege. <sup>9</sup>Ole winna obaruni,<sup>z</sup> eewe”.

<sup>10</sup>Nuwindo, anamasuuzaa aaye yahimwaaddamelaga, omukoha, wiira: “Mwaha bwaddi munaawogana athu ala mwa misibe?”

<sup>11</sup>Oliye ahaakulaga, wiira: “Mwaha wi nyo muhuvahiwa onone-  
lamo dha wipiini dha Omwene wa Odhulu, mbwenye aliwa kivahiwe.  
<sup>12</sup>Vowi ole winna onowaakela moweenjedhedha wi akalena moottha-  
bwa. Mbwenye ole ohinna, naari eng'onong'ono yinniyena onowaakiwa.  
<sup>13</sup>Mwahaya buuyene onaawogeliimina mwa misibe: Vowi yoonaga,  
kinoona; yiiwaga, kineewa, naari kinewelelamo. <sup>14</sup>Nda dhahipadduwa  
wi dhaakwanele dhawogile Mulugu odheela mwa namavuhulela Ezaya,  
eeriliye:

“*Odhowe wa nlogo nddo*

*wawaaddele wi:*

*Nyo muneerege ovuruwana,*

*mbwenye kamudha mwiiwelelagamo.*

*Nyo muneerege osugwa,*

*mbwenye kamudha mudidelaga.*

<sup>15</sup>*Vowi mirima dha athu ala*

*dhili dhovaadda;*

*mabaru eewa kineewa,*

*yahaafuga meento eewa wi ehoone ni meento.*

*Yaheere ehiira ndo,*

*meento eewa yeerege woona,*

*obaruni weewa weerege wiiwa*

*yeerege ononelamo moobuwelelo eewa,*

*aliwa yeere owelela wa miyo,*

*miyo geere waayiliha!*

*Owogile di Nabwiya.<sup>a</sup>*

<sup>16</sup>Mbwenye ooreelihiwa bi meento eenyu vovi enowoona, wooreelihiwa fu obaruni weenyu vovi onowiiwa. <sup>17</sup>Ebaribareene ginowuwaaddelani wi anamavuhulela ajinji ni athu ooharihamo efunelo ya Mulugu yahifunesesa woona dhinooniinyu mbwenye kayoonile teto yahifunesesa wiiwa dhineewiinyu mbwenye kayeewile.

<sup>18</sup>“Mvuruwane, mwiiwe yootapulela ya musibe wa namadhala. <sup>19</sup>Athu eneewa muselu wa Omwene, ehiiwelelamo, eli wona bewu yamorelege seresere ya dila. Nambure<sup>b</sup> ahidhaaga, ovenyihamo yadhaliwe mmurimani mweewa. <sup>20</sup>Bewu dhamorelege vaali mabwe majinji bi athu eneewa

---

<sup>z</sup> 13.9 Enofwanyeya madhu owi: *Ole winna obaruni wowiiwana, eewe mu dhoolebiwa ni madada dhimohi dhixa. Mbwenye anamasuuzaa ajinji enoobuwela wi wowiiwana madhu ala kiyalebiwe ni murumiwi Matewuzhi.*

mutheenga, eromela mowaaguva ni ohagalala. <sup>21</sup>Mbwenye enalogela vang'ono mwaha wi kinna misisi. Vano yagumana ni dhookathamiha, oharahariwa mwaha wa mutheenga, aliwa enohiya nrromelo neewa. <sup>22</sup>Bewu yamorelege vamiingani baale eneewa mutheenga, mbwenye dhookathamiha dha elabo ela teto ofuna dhooreela, dhinohoga mutheengaya, vano athu ala kinavaha dhilo. <sup>23</sup>Bewu dhamorelege theya yapama bi athu ale eneewa mutheenga yiiwelelamo, vano enovaha dhilo dhijinji: Enovaha dhilo moweenjedhedheya zana (100), mmohi onovaha dhilo makumi matanu ni emohi (60), dhimohi dhiwa dhinovaha dhilo makumi maraaru okwaranya nde dhadhaliwe”.

### Musibe wa nthaaje

<sup>24</sup>Yesu ahiwogaga musibe mmohi, wiira: “Omwene wa Odhulu onafwanafwana ni muthu akuthelilege bewu yapama mmiddani mwaaye.

<sup>25</sup>Mbwenye, athu aatene egonaga, ahidhaaga mwiiddani aaye, odhala nthaaje<sup>c</sup> vaari va tirigu, ovenyavo. <sup>26</sup>Vano bewu dhigonnuwile, dhivahaga mangala, nthaaje teto nahikumaga.

<sup>27</sup>“Vevale amwiimeleli a muliba mudda yahiiraga: ‘Nabwiyani, kanikuthelile bewu yapama mmiddani mu? Ki nthaaje nikumile waani?’

<sup>28</sup>“Oliye ahawaakulaga, wiira: ‘Mwiiddani mmohi diirilena dhedho’. Vano amwiimeleli ale, yahiiraga: ‘Munofuna wi naddulemo nthaaje ndde?’

<sup>29</sup>“Oliye ahawaakulaga, wiira: ‘Eehi, mwaaddulaga nthaaje teto muneerege omuddula ni tiriguya. <sup>30</sup>Mwihye dhunnuwelege vamohi ofiyedha mudhidhi woohadda. Miyo ginowawaaddela anamalaba enadhowa ohadda wi vowambeela muddule nthaaje, mmage mapithika wi nipahiwe, vooharela mmuddulege tirigu, mmuhelege vatatani vaaga’ ”.

### Musibe wa kogolo ya mpeza ni emela

(Maruku 4.30-34; Luka 13.18-21)

<sup>31</sup>Yesu ahawaaddelaga musibe mmohi, wiira: “Omwene wa Odhulu onafwanafwana ni kogolo ya mpeza eyene muthu yathukuligiye adhala va mudda vaaye. <sup>32</sup>Ela enakala eng'onong'ono, mbwenye yoonnuwa enokwaranya bewu dhimohi dhidhaliwe, okala wona muthanko, ofiyedha balame dha odhulu, odha omagagamo dhitunji dheewa mmijindani mwiwa”.

<sup>33</sup>Ahawaaddelaga musibe mmohi, wiira: “Omwene wa Odhulu onaligana ni emela mwihiyana yathukuligiye, ataganyihedha ni saambale nijinji<sup>d</sup> ofiyedha onyakuwa naatenene”.

<sup>a</sup> 13.14-15 Ezaya 6.9-10    <sup>b</sup> 13.19 Nambure Naari wi: *Sathana*.    <sup>c</sup> 13.25 *Nthaaje* Naari wi: *joyo*. Moone teto maverisikulu 26, 27, 28, 29, 30, 35, 36, 38, 40.

<sup>34</sup>Dhaatedhene dhedhi Yesu aawogagana anamwinji mwa misibe; kaawogaga yego ehili mwa musibe <sup>35</sup>wi dhaakwanele dhawogiwe odheela wa namavuhulela, dheeriliye:

*“Gineere ofugula mulomo giwoge misibe;  
gilaleyele dhego dha wipiini  
wambeela omapadduwelo wa elabo”.*<sup>e</sup>

#### Waaddelihiwamo wa musibe wa nthaaje

<sup>36</sup>Vano Yesu ahaapaganyaga anamwinji, odhowaga vaade. Anamasuza aaye yahimwaaddamelaga, wiira: “Munaaddelihemmo musibe wa nthaaje na mmiddani”.

<sup>37</sup>Oliye ahawaakulaga, wiira: “Onadhala bewu yapama di Mwaana a Muthu. <sup>38</sup>Mudda si elabo; bewu yapama bi ahima a Omwene; nthaaje bi ahima a Nambure.<sup>f</sup> <sup>39</sup>Mwiiddani odhalile di Ddiyabo;<sup>g</sup> ohadda fu omakuthulo wa dhaatedhene, anamahadda bi angero.

<sup>40</sup>“Wona nthaaje nnadduliwa nivokedhiwa omunddoni, dhinadha dhiireyege ndo omakuthulo wa mudhidhi ola. <sup>41</sup>Mwaana a Muthu onoodha aarume angero aaye wi yaakumihemo muuMweneni mwaaye aatene alene enaathegiha akwiwa ni aatene alene eneerana dhootakala. <sup>42</sup>Vano evokedhiwe othukuthani ya munddo, wewo oneere okala wuundda ni otakuna meeno. <sup>43</sup>Vano ooharihamo efunelo ya Mulugu enoodha yaarege wona nduwa muuMweneni wa Ababa. Ole winna obaruni,<sup>h</sup> eewe.

#### Misibe dha dhooreela dhoologohiwa ni mabwe a mutheengo wookwima

<sup>44</sup>“Omwene wa Odhulu onafwanafwana ni dhooreela dhoologohiwa mmiddani, dhedho muthu agafwanyile, ahilogohaga dila biili. Vano odhaaliwa ohagalala onoodhowa oguliha dhaatedhene dhanniyena, korowadha ogulana mudda ole.

<sup>45</sup>“Omwene wa Odhulu teto onafwanafwana ni muthu a nagooso onasayela mabwe oofuneya. <sup>46</sup>Vano afwanya nibwe nimohi na mutheengo wookwima, onodhowa oguliha dhaatedhene dhanniyena, vano korowadha ogulana nibwe ndde.

#### Musibe wa nthavi

<sup>47</sup>“Omwene wa Odhulu teto onafwanafwana ni nthavi navokedhiwa munyaza, nnohidda somba dha musawo dhaatedhene. <sup>48</sup>Nadhaala anamatota somba

<sup>d</sup> 13.33 *Saambale ninji* Naari wi: *mpimo miraaru*. Dhedho wiinjiva wiwa waali wowaakwana vakuukuvi maniituru makumi meenddi ni maniituru meenddi.

<sup>e</sup> 13.35 *Masaalimu* 78.2    <sup>f</sup> 13.38 *Nambure* Naari wi: *Sathana*.    <sup>g</sup> 13.39 *Ddiyabo* Naari wi: *Sathana*.    <sup>h</sup> 13.43 *Mudhoolebiwa* dhawale muli: “Ole winna obaruni, eewe.” Mbwenye dhoolebiwa dhixa dhini: *Ole winna obaruni wowiiwana, eewe*.

enoburulela vamuseengani, yeera ndo enokaraati, osakulelaga dhapama dhiwa ohelaga mmatogwani, dhabure dhiwa othathilelaga okwibi. <sup>49</sup>Dhinaa-kale ndo omakuthulo wa dhaatedhene: Enoodha angero yaamwalanihe athu abure ni athu ooharihamo efunelo ya Mulugu, <sup>50</sup>vano yaavokedhe athu abure ale othukuthani ya munddo, wewo oneere okala wuundda ni otakuna meeno”.

<sup>51</sup>Nuwindo, Yesu ahaakohaga anamasuuzza aaye, wiira: “Mwihiiwelelamo dhego dhaatedhene dhedhi?” Yahimwaakulaga, wiira: “Ee!”

<sup>52</sup>Vano wiira: “Mwaha wa ela anamasuuziha a Malamulo aatene enasuuzza dha Omwene wa Odhulu enafwanafwana ni baabi a emudhi onakumiha vatatani vaaye dhego dhixa ni dhego dhawale”.

### Yesu onokooodiwa ni athu a oNazarethi

(Maruku 6.1-6; Luka 4.14-30)

<sup>53</sup>Yesu agawogile misibe nde, ahivenyagawo wewule. <sup>54</sup>Agafiyile owaniwa owasuuzihaga athu mu nyuba dha matugumano,<sup>i</sup> yoomvuruwanaga etikinaga, yiiraga: “Onadhana waani tthottho ni owodha wula oneeriyena dhootikiniha? <sup>55</sup>Ola kahuwo mwaana a namasema? Amaaye kineethaniwa Mariya, addibile kahuwo Tiyago, Zhuuze, Simawu ni Zhudasi? <sup>56</sup>Arogoriye kinakala vaari va hiyo? Ki dhinamukuma vaavi dhaatedhene dhedhi?” <sup>57</sup>Vevale aliwa yahitakaleliwaga ni oliye. Nuwindo, Yesu ahiiraga: “Namavuhulela onoriihiwa dhipaddi dhaatedhene, mbwenye veelaboni vaaye ni vaade vaaye kanarihiwa”.

<sup>58</sup>Vano Yesu keerilewo dhootikiniha dhijinji mwaha woohukalana nrromelo weewa.

### Okwa wa Zhuwawu Namabathiza

(Maruku 6.14-29)

**14** <sup>1</sup>Mudhidhi olene Heroddi, namathonga<sup>j</sup> a oGalileya, ahiiwaga bili ya Yesu. <sup>2</sup>Vano Heroddi ahiiraga wa ale yamulaba: “Oyo di Zhuwawu Namabathiza ovenyile muukwani mwaha wi oliye ohukalana owodha woiirana dhootikiniha”.

<sup>3</sup>Vowi Heroddi ahimwihiddaga Zhuwawu, ommaga, omfugeliha mu-kaambura. Oliye ahiiragana nda wi amudhivelihe Heroddiya, mwadha ddibile Filipi,<sup>k</sup> <sup>4</sup>mwaha wi Zhuwawu oomwaaddelesa Heroddi, eera- ga: “Nlamulo nnawoga wi kadhinarumedheya wi omutele Heroddiya”.

<sup>i</sup> 13.54 Nyuba dha matugumano Nda mu ewogelo ya eGerego dheeriwa *sinagoga*. Mabasa eewa kayaali oolobelamoove, naari osuuzamo Malamulo, mbwenye teto yowaathongamo athu yahaaharihamo Malamulo a aZhudewu. <sup>j</sup> 14.1 Namathonga eeriwa tetararaka, athonga epaddi ya nennayi ya murudda mmohi. <sup>k</sup> 14.3 Heroddiya ahimwihiya mamune Filipi. Nuwindo, Heroddi omutela. Otelana wula waali othegela Malamulo a Mozezi, vovi Filipi aali ahinakwe. Moone Levitiku 18.16; 20.21.



<sup>5</sup>Mwahaya buuyene Heroddi yafuneliye ompa, mbwenye oowawoova anamwinji vovi Zhuwawu yamwiira namavuhulela.

<sup>6</sup>Nigafiyile nlabo na obaliwa na Heroddi, mwaana-mwihiyana a Heroddiya ahiinaga vameentoni va athu, omudhiveliha Heroddi, <sup>7</sup>ofiyedha omuroromeliha ni olibela omvaha yego yaamulobiye. <sup>8</sup>Mwaha wootuzhiwa ni amaaye, ahiiraga: “Mugivahe muru wa Zhuwawu Namabathiza mmuziwoni dhiinoveva!” <sup>9</sup>Mwene Heroddi ahikathamiheyaga, mbwenye mwaha woolibela weeriligiiyena vameentoni va athu owiithaniwa, ahi-lamulaga wi yooloba ya mwaana a Heroddiya yaakuleliwe. <sup>10</sup>Ahirumihaga wi muru wa Zhuwawu okaambura ogwaddiwe. <sup>11</sup>Vevale yahidhaagana muru mmuziwoni, omwinka mwaana a Heroddiya waakelela, wawinka amaaye. <sup>12</sup>Vano anamasuuzwa a Zhuwawu yahidhaaga, othukula muruthu waaye, ologoha. Nuwindo, yahidhowaga omwaaddela Yesu.

**Yesu onowiinjiviha mikaathe ni somba**  
(*Maruku 6.30-44; Luka 9.10-17; Zhuwawu 6.1-15*)

<sup>13</sup>Yesu ageewile nda, ahivenyagawo wewule yeeka ni mwanddeya, odhowa ombale mburo wahaviriwesesa. Vano anamwinji eganonile, yahimaruwaga mmaluwani mweewa ni vati, omuharaga. <sup>14</sup>Yesu akitaga mmwanddeyani, ahawoonaga athu ajinji, ahaweeddiwelaga thagaraga, waayiliha aredda yaaligi vevale.

<sup>15</sup>Ociguwoni yahidhaaga anamasuuzwa a Yesu, wiira: “Ode ohuriba, mburo oliihu fu okokolani. Mwaarume athu ala edhowege mmavade wi yagule dhooja dheewa”.

<sup>16</sup>Vevale ahawiiirelaga: “Kinafuneya wi mulogo ola ovenyevo; nyeene mwaavahe dhooja”.

<sup>17</sup>Mbwenye aliwa yahaakulaga, wiira: “Ninna mikaathe mitanu ni somba biili baahi”.

<sup>18</sup>Oliye ahiiraga: “Mudhena wuno”. <sup>19</sup>Ahawaaddelaga wi athu ekaraati vathongweni, othukula mikaathe mitanu ni somba biili, ahigweliha-ga meento odhulu, omutamaala Mulugu. Nuwindo, opadhula mikaathe, wawinka anamasuuzwa aaye, aliwa waagawela anamwinji. <sup>20</sup>Athu aatene yahijaga, orubala. Vano dhoochala dhaddoddeliwege yahidhaalihaga middanga kumi ni miinddi. <sup>21</sup>Alobwana yajilege yaaligi macikwi matanu (5.000), eheelengeliwe ahiyana ni ahima.

**Yesu onoweedda vadhulu va mahinje a munyaza**  
(*Maruku 6.45-56; Zhuwawu 6.16-24*)

<sup>22</sup>Vooharela Yesu ahaalamulaga anamasuuzwa wi evolowe mmwanddeyani, esogolege, edhowe kobela emohi. Oliye ahihalaga aapaganyaga anamwinji. <sup>23</sup>Agaapaganyile anamwinji ahigwelaga omwaangoni wi alobele yeeka. Ofiyedha ode oriba aaligi wewo yeeka. <sup>24</sup>Mowindo

mwanddeya waaligi woolapelawene ni theya, orabulaga ni kuluzi, vowi wadhowaga wakumaga nipevo.<sup>1</sup>

<sup>25</sup>Ode ohunasese Yesu ahidhowaga ogumana ni aliwa eeddaga vadhulu va mahinje a munyaza. <sup>26</sup>Anamasuuzwa vamooniligiwa eeddaga vadhulu va mahinje, yahirurumuwaga, wiira: “Ole ntowa!” Vano yahikuwaga ni woova.

<sup>27</sup>Mowaaguva Yesu ahiiraga: “Kurumulani mirima! Di miyo. Kamoove!”

<sup>28</sup>Peduru ahaakulaga, wiira: “Akala di nyo, Nabwiya, mugirume gidhe oliinyuwo giviraga vadhulu va mahinje”.

<sup>29</sup>Yesu ahiiraga: “Dhaaga!” Peduru ahikitaga mmwanddeyani, weedda-ga vadhulu va mahinje, odhowaga waaligiye. <sup>30</sup>Mbwenye Peduru oonaga kopolo dha nipevo ahoovaga, wambeela obwina, ahikuwaga, wiira: “Nabwiya, givulumuseni!”

<sup>31</sup>Mowaaguva Yesu ahitadeelaga ndada, omwihiddeela, wiira: “We, muthu ooyeva nrromelo, onaanganyedhela ddi?”

<sup>32</sup>Nuwindo, yahigwelaga mmwanddeyani aabiileene, nipevo nahi-maalaga. <sup>33</sup>Ale yaaligi mmwanddeyani, yahimweebdhaga, yiraga: “Ebaribareene, oli Mwaana a Mulugu!”

<sup>34</sup>Vano egalabuwele kobela emohiwa yahifiyaga oGenezaretu. <sup>35</sup>Athu a elabo ele vanoniligiwa yahilaleyaga, wawaaddela owaaddamanana, waadhana aredda aatene wa Yesu. <sup>36</sup>Aliwa yoomulobaga ni ntidi wi aarumeedhihe ekahinyege nipiyo na yoowara yaaye. Vano aatene yakahi-nyaga yooyilaga.

### Yesu onosumulula magano a makolo a aZhudewu (Maruku 7.1-23)

**15** <sup>1</sup>Nahimaruwaga oZheruzalemi nikuru na aFarizi ni anamasuu-ziha a Malamulo odhowaga wa Yesu omukoha, wiira: <sup>2</sup>“Mwaha bwaddi anamasuuzwa aawo eharihagamo magano a makolo? Mwaha bwaddi kinahaba mmadani yaajaga?” <sup>3</sup>Oliye ahawaakulaga, wiira: “Ki nyo mwaha bwaddi teto munaruniha malamulo a Mulugu mwaha wa magano eenyu? <sup>4</sup>Vowi Mulugu ahilamula, wiira: ‘Wariihege ababo ni amaayo’,<sup>m</sup> vano teto ‘ole onaaruwana ababe naari amaaye athongiwe avahiwe goyi ya opiwa.’<sup>n</sup> <sup>5</sup>Mbwenye nyo munasuuziha wi muthu mmohi awoga ni ababe naari amaaye, eera: ‘Miyo kaginookamihedheni vovi ele yafuniimi wi gukamihedhenaani gimulogolele Mulugu’. <sup>6</sup>Muthu oyo kadha awaddihedhiwa waakamihedha ababe naari amaaye. Mowindo munavevusa madhu a Mulugu mwaha wa magano eenyu. <sup>7</sup>Nyo anama-

<sup>1</sup> 14.24 *Wakuma nipevo* Sowi mwanddeya nde dhoomageleliwa vela, naari wi guwo dhovaadda dhakamihedha weeddiha mwanddeya moohara nipevo. <sup>m</sup> 15.4 Okuma 20.12; Deteronomiyo 5.16 <sup>n</sup> 15.4 Okuma 21.17; Levitiku 20.9

nyengetha! Ezaya ahivuwaha pama vawogiliye madhu a Mulugu mwaha wa nyo, eeraga:

8 “*Nlogo ndda nnageebedha ni milomo,  
mbwenye mirima dheewa dhili woolapela ni miyo*

9 *Nnageebedha ebeweene  
vowi masuuziho enasuuzihiisu eli malamulo  
oosasanyiwa ni athu, ehili oosasanyiwa ni miyo*”.

10 Nuwindo, Yesu ahawiithanaga anamwinji wi emwaaddamele, wiira: “Mvuruwane, mwiiwelelemo. 11 Enamutakaliha muthu kahuwo enavolowa muwano, mbwenye enakuma muwano sinamutakaliha muthu”.

12 Anamasuuzi aaye yahimwaaddamelaga, wiira: “Muhunona wi aFarizi viiwiliwa madhu eenyu yahitakaleliwa?”

13 Oliye ahaakulaga, wiira: “Yoodhala yaatene aBaba a odhulu ehi-dhaliliwa eneere odduliwa. 14 Mwaahiye. Aliwa asogoleli oohoono.<sup>p</sup> Vano oohoono ammeza oohoono mukwaaye, aabiileene enomorela mmuliddini”.

15 Vevale Peduru ahimulobaga, wiira: “Munitapulele musibe ola”. 16 Yesu ahiiraga: “Teto nivano ninyeene kamwiiwelelemo? 17 Kamunanonelamo wi dhaatedhene dhinavolowela omulomoni dhinakitela mmwiilini, dheera ndo dhinokumamo mmwiilini? 18 Mbwenye dhinakuma muwano dhinadheela mmurimani, dhedho sinamutakaliha muthu. 19 Vowi pu mmurimani munakuma moobuwelo ootakala, dhoopa, dhoo-raruwa, dhoojeberuwe, dhowiia, onamoono wooratha, dhoonyemula. 20 Dhego dhedhi sinamutakaliha muthu; mbwenye oja ohuhabile mmadani kunamutakaliha muthu”.

### Mwihiyana a oKanani

(*Maruku 7.24-30*)

21 Yesu agavenyile vevale, ahidhowaga mirudda dha oTiru ni oSido-ni. 22 Mwihiyana mmohi a oKanani akumilege mirudda nde, ahidhaaga wa oliye, wiira: “Nabwiya, Mwaana a Davidi,<sup>q</sup> mugeeddiwele thagaraga! Mwaanaga a mwihiyana onorabula vajinji mwaha wa muneba wootakala”.

23 Yesu kamwaakulilege yego. Vano anamasuuzi aaye yahimwaaddamelaga, wiira: “Mmwaaddele adhowege, vowi onoodha alobagave mundduli mweehu”.

24 Yesu ahimwaakulaga, wiira: “Mulugu ogirumile wa nlogo na Ezarayeli, ayene eli wona mabila oorimeela”.

o 15.9 Ezaya 29.13 p 15.14 Enofwanyeya madhu owi: *boohoono, osogoleliwa wa oohoono* elebiwe mu dhoolebiwa ni madada dhimohi. Mbwenye anamasuuzi ajinji enoobuwela wi *Aliwa asogoleli oohoono* madhu ala yalebiwe ni murumiwi Matewuzhi. q 15.22 *Mwaana a Davidi* Ndda naali ndina nimohi na Misiya nanoniwiiyena ni aZhudewu.

<sup>25</sup> Vano mwihiyana ole ahidhaaga, okokora, omweebedha, wiira: “Nabwiya, gikamihedheni!”

<sup>26</sup> Oliye ahimwaakulaga, wiira: “Kahuwo yapama othukula dhooja dha ahima waavokedha anaanabwa”.

<sup>27</sup> Mwihiyana ole ahiiraga: “Ebaribari, Nabwiya, mbwenye anaanabwa enoja dhoonyenyeya dhinamora vameeza va anya”.

<sup>28</sup> Vano Yesu ahiiraga: “Mwihiyana we, nrromelo naawo thi nuulubale, dhiireye ndo wona munafuneliwe”. Wambeela mudhidhi olene mwaanaye ahilyilihiwaga.

**Yesu onowiinjiviha mikaathe ni somba olenddo wa nabiili**  
(*Maruku 8.1-10*)

<sup>29</sup> Yesu agamaruwe vevale, agelege seresere ya Nyaza ya oGalileya, ogwela vamwaangoni, okaraati vevale. <sup>30</sup> Athu ajinji yahidhowaga wa Yesu yahaadhowagana ooragala, ootopinya, ohoona, oohuwoga ni aredda amohiwa ajinji. Waahiya vakukuuve vaaligi Yesu, oliye waayiliha. <sup>31</sup> Ofiyedha anamwinji otikina vowawoona oohuwoga ewogaga, ooragala egayilihiwe, ootopinya yeeddaga, ohoona yoonaga. Vano yoomuthithimihaga Mulugu a Ezarayeli.

<sup>32</sup> Yesu ahawiithanaga anamasuuzi, wiira: “Ginowaweeddiwela thagaraga athu ala, vovi vihivira malabo maraaru ekalaga ni miyo, kinna yego yooja. Kaginafuna waapaganya ehijile, ginakathamiheyela wi enaadhe ehileye mundila”.

<sup>33</sup> Mbwenye anamasuuzi yaahiraga: “Okokolani wuno nnaafwanye waani mikaathe dhowawaakwana anamwinji aatene alena?”

<sup>34</sup> Yesu ahaakohaga, wiira: “Mwinna mikaathe mingaasi?” Yahimwaakulaga, wiira: “Ninna mikaathe mitanu ni miinddi ni somba vang'ono dhing'onong'ono”.

<sup>35</sup> Yesu ahawiirelaga anamwinji wi ekaraati vati. <sup>36</sup> Ahithukulaga mikaathe mitanu ni miinddi ni somba otamaalela, ogwaddanya, waavaha anamasuuzi, aliwa waagawela athu. <sup>37</sup> Aatene yahijaga orubala. Vevale anamasuuzi yahiddoddelaga dhoochaladhiwa, odhaaliha middanga mitanu ni miinddi. <sup>38</sup> Yajilege yaaligi alobwana macikwi mannayi (4.000), ehaweelengile ahiana ni ahima. <sup>39</sup> Yesu ahaapaganyaga anamwinji, ogwela mmwanddeyani, odhowaga elabo ya oMagadani.

**AFarizi ni aSaduseyi enoloba etoonyihedho**  
(*Maruku 8.11-13*)

**16** <sup>1</sup> AFarizi ni aSaduseyi yahimwaaddamelaga Yesu wi emuwage muwano, omuloba wi awoonihe etoonyihedho yootikiniha yookumela odhulu.

<sup>2</sup> Oliye ahawaakulaga, wiira: “Wafiya mudhidhi wa ciguwo, muno-wiira: ‘Oneere okala mudhidhi wapama mwaha wovi odhulu poofiila’,

<sup>3</sup>vano bebehi munowiira: ‘Peeno onokala pevo mwaha wowi odhulu ohukala murabo woofiila ni wooriba’. Muhunona ebaribareene ohiyaniha mukalelo wa odhulu, mbwenye kamunadidela dhitoonyihedho Mulugu dhineeriyena vaari va nyo dhiinova. <sup>4</sup>Nlogo nootakala murima, noohu-roromeleya nnaloba etoonyihedho, mbwenye kannavahiwe etoonyihedho emohi ehili etoonyihedho ya Zhonasi”. Ahaahiyaga, okwaranyavo.

**Pole-pole ni emela ya aFarizi ni ya aSaduseyi**  
(*Maruku 8.14-21*)

<sup>5</sup>Vano anamasuza egafiyile okobela ya nyaza, yahiddiwaalaga othu-kula mikaathe. <sup>6</sup>Yesu ahawiiirelaga: “Pole-pole, muxage ni emela<sup>r</sup> ya aFarizi ni aSaduseyi”. <sup>7</sup>Aliwa yoowogaga vakaleligiwa, yiiraga: “Ndo onawogela mwaha wi kanidhiilena mikaathe”.

<sup>8</sup>Yesu aganonile, ahiiraga: “Munawoga ddi weekiinyu mwiiraga kamwinna mikaathe, athu ooyeva nrromelo? <sup>9</sup>Kamuneeweelamoove nivano? Kamunoo-buwelela mikaathe mitanu dhajhiwege athu macikwi matanu (5.000)? Kamunoo buwelela middanga mingaasi mwaddodeliinyu dhoohaladha? <sup>10</sup>Naari mikaathe mitanu ni miinddi, dhajhiwege athu macikwi mannayi (4.000), middanga mingaasi mwaddodeliinyu dhoohaladha? <sup>11</sup>Ki muhuneeweelamo addi wi kagiwogile dha mikaathe? Mbwenye muxage ni emela ya aFarizi ni aSaduseyi”. <sup>12</sup>Vano yahiiwelelagamo wi kaawogaga wi exage ni emela ya mikaathe, mbwenye ni dhoosuuziha dha aFarizi ni aSaduseyi.

**Wiisorihwa wa Peduru**  
(*Maruku 8.27-30; Luka 9.18-21*)

<sup>13</sup>Yesu adhowaga dhipaddi dha oSezareya oFilipi, ahaakohaga anamasuza aaye, wiira: “Miyo, Mwaana a Muthu, athu enagiira gili aani?”

<sup>14</sup>Aliwa yahaakulaga, wiira: “Amohi eneera muli Zhuwawu Namabathiza; amohi eneera muli Eliyazi; amohiwa eneera muli Zheremiya, naari namavuhulela mmohi”.

<sup>15</sup>Vevale Yesu ahaakohaga, wiira: “Ki nyo, munagiira aani?”

<sup>16</sup>Simawu Peduru ahaakulaga, wiira: “Nyo muli Kirixtu ole aroromelihiwe, Mwaana a Mulugu mugumi”.<sup>s</sup>

<sup>17</sup>Yesu ahimwaaddelaga, wiira: “We oli oorelihiwa, Simawu, mwaana a Zhonasi, mwaha wi kahuwo muthu wuwaaddele, mbwenye aBaba eli odhulu buwaaddele. <sup>18</sup>Vano miyo ginowuwaaddela wi we oli Peduru,<sup>t</sup> va nibwe nddi ginomagavo gerezha yaaga, naari kopolo dha okwa kadhidha dhigonjiha. <sup>19</sup>Ginowuvaha macavi a Omwene wa Odhulu; we dhineerii-

---

<sup>r</sup> 16.6 *Emela* yaali etoonyihedho yalabihwana ni ovaha mukalelo wabure. <sup>s</sup> 16.16 *Kirixtu* mu ewogelo ya eGerego enatapulela *Muthikitheliwi, Misiya*, naari wi: *Oosakuliwa a Mulugu*, oyene onaavulumuse athu. <sup>t</sup> 16.18 *Peduru* mu ewogelo ya eGerego enatapulela *nibwe*.

we omagege elabo ya vati, dhineerege omagiwa odhulu; we dhineeriwe otapulege elabo ya vati, dhineerege otapuliwa odhulu”.<sup>20</sup> Yesu ahaawa-raalihaga anamasuuzwa wi ehidhe emwaaddela muthu wi oliye di Kirixtu ole aroromelihiwe.

**Yesu onovuwiha olendo wowambeela okwa waaye ni ovenyihiwa waaye**

*(Maruku 8.31 ofiyedha 9.1; Luka 9.22-27)*

<sup>21</sup>Ovenya mudhidhi olene, Yesu ahambeelaga wawooniha anamasuuzwa aaye wi yaali yoofuneya odhowa oZheruzalemi, arabulihiwe ni dhijinji wa makolo, apogo a anamakutha ni anamasuuziwa a Malamulo, apiwe, avenyihiwe muukwani nlabo na neethaaru.

<sup>22</sup>Vano Peduru ahimwiithanelaga vovi hivale, omwihiiha, wiira: “Nabwiya, kadhiireye dhedho, Mulugu karumeedhe wi dhiireye”.

<sup>23</sup>Mbwenye Yesu ahimurugunuwelaga, wiira: “Okwaranyevo viliimi va, Sathana! We wa miyo oli nibwe nookwakwathusa. Kunapwatha dha oMulugu, mbwenye onapwatha dha omuthu”.

<sup>24</sup>Vano Yesu ahawaaddelaga anamasuuzwa aaye, wiira: “Muthu onafuna odha wa miyo eekoodde yeeka, athukule muraddi waaye, agiharege. <sup>25</sup>Mowindo onafuna ovulumusa egumi yaaye, onowiirimeeliha; mbwenye ole onarimeeliha egumi yaaye mwaha wa miyo, onoodha afwanye.

<sup>26</sup>Vano muthu onapura ddi aakela elabo ya vati yaatene, arimeeliha egumi ya ebaribari? Muthu onalive ddi wi oobole egumi yaaye ya ebaribari?

<sup>27</sup>Vovi Mwaana a Muthu onoodha adhe mu nthithimihoni na aBabe ni angero aaye, amvahe kadda muthu mooligana dhowiira dhaaye. <sup>28</sup>Ebaribareene ginowuwaaddelani wi amohi mwa nyo muli veva kamunafiyedhe okwa muhoonile odha wa Mwaana a Muthu muuMweneni waaye”.

**Ohiyaniheya wa kove ya Yesu**

*(Maruku 9.2-13; Luka 9.28-36)*

**17** <sup>1</sup>Egavirile malabo matanu ni nimohi, Yesu ahaathukulelaga ombale Peduru ni addibila abiili yaaligi Tiyago ni Zhuwawu, ayeneve waadhowana mwaango wootaama. <sup>2</sup>Ahihiyaniheyaga vameentoni veewa; kove yaaye yoozherimelaga wona nduwa, dhoowara dhaaye dhahisadduwaga okala dhoweela wona waara. <sup>3</sup>Mudhidhi olene ahikumelelaga Mozezi ni Eliyazi, owogaga ni oliye.

<sup>4</sup>Peduru ahiwogaga ni Yesu, wiira: “Nabwiya, eli pama wi nika-le wewuno. Teto mwafuna nnomaga misasa miraaru, mmohi weenyu, mmohi wa Mozezi, mmohiwa wa Eliyazi”.

<sup>5</sup>Awogagave ndo wahidhaaga murabo wowaara, wakuneela. Mmuraboni mule mwahikumaga ndhu neeraga: “Ola di Mwaanaga oodhivela. Mwa oliye ginohagalala. Mumvuruwanega oliye!”

<sup>6</sup>Anamasuuz a egeewile yahoovaga vajinji, otongwela vati ootadeele-yeene ni kove vati. <sup>7</sup>Vevale Yesu ahawaaddamelaga, waakahinya, wiira: “Venyani, kamoove!” <sup>8</sup>Aliwa egaavenyihile meento kayamoonilege muthu mmohi ahili Yesu.

<sup>9</sup>Aliwa ekitaga omwaangoni, Yesu ahaalamulaga wi ehimwaaddele muthu mmohi dhooniliwa ofiyedha Mwaana a Muthu avenyihile muukwani.

<sup>10</sup>Anamasuuz a yahimukohaga, wiira: “Mwaha bwaddi anamasuuziha a Malamulo enawoga, yiiraga: ‘Soofuneya wi Eliyazi adhe vowambeela?’”

<sup>11</sup>Yesu ahawaakulaga, wiira: “Ebaribareene, Eliyazi onoodha vovambeela asasanyedhe dhego dhaatedhene. <sup>12</sup>Miyo guhuwaaddelani wi ebaribareene, Eliyazi ohudha, mbwenye kayamudidele, yahimwiirela dhaatene dhafuniwa omwiirela. Mwa mukalelo mmohive teto Mwaana a Muthu oneere orabulihiwa ni aliwa”. <sup>13</sup>Vano anamasuuz a yahiiwelelagamo wi awogaga dha Zhuwawu Namabathiza.

**Yesu onomuyiliha muzombwe oohiddiwa ni muneba wootakala**  
(*Maruku 9.14-32; Luka 9.37-45*)

<sup>14</sup>Egafiyile vaaligi anamwinji mulobwana mmohi ahimwaaddamelaga, okokora, wiira: <sup>15</sup>“Nabwiya, mmweeddiwele thagaraga mwaanaga amulobwana, vovi winna ajilejile, onorabula vajinji, dila dhijinji onomorelesa veeko, mudhidhi mmohi onomorelesa mwinko. <sup>16</sup>Gahimudhaagana wa anamasuuz a eenyu mbwenye aliwa kayaandilege omuyiliha”.

<sup>17</sup>Yesu ahiiraga: “Nlogo noohukanna nrromelo, noholowa, ofiyedha alini vineeriimi gikale ni nyo? Ofiyedha alini vineeriimi givilele? Kamudhenaani mwaana oyo”. <sup>18</sup>Yesu ahilamulaga muneba wootakala ole, okumamo mwa mwaana, wambeela mudhidhi olene mwaana ahiyila.

<sup>19</sup>Vano anamasuuz a yahimwaaddamelaga Yesu, omukoha ombale, wiira: “Mwaha bwaddi hiyo nihaandaga okumihamo muneba wootakala ole?”

<sup>20</sup>Oliye ahawaakulaga, wiira: “Mwaha wooyeva nrromelo neenyu. Ebaribareene ginowuwaaddelani wi mwakanna nrromelo nooligana ni kogolo ya mpeza, muneerege wiirela mwaango ola: ‘Venya va, odhowe wule’, oneerege wuwiiwelelani. Kavinaakale yego ehinaandigiinyu”.<sup>u</sup>

<sup>22</sup>Egatugumane oGalileya Yesu ahiiraga: “Mwaana a Muthu ohalile vang’ono oveleliwa mmadani mwa athu, <sup>23</sup>aliwa eneere ompa, mbwenye va nlabo na neethaaru oneere ovenyihwa muukwani”. Vano anamasuuz a yahukuuwaga vajinji.

---

<sup>u</sup> 17.20 Enofwanyeya verisikulu 21 eneera: *Mbwenye muneba wa musawo ola kuneegariwa ndo vihili malobelo ni othuga elebiwe mu dhoolebiwa ni madada dhimohi. Mbwenye anamasuuz a ajinji enoobuwela wi madhu ala kiyalebiwe ni murumiwi Matewuzhi.*

### Yesu onopeleka musoko waaye nyuba ya Mulugu

<sup>24</sup>Egafiyile oKafaranawu, anamakoha-musoko amohi a nyuba ya Mulugu yahidhowaga wa Peduru, omukoha, wiira: “Namasuuziha eenyu kanapeleka musoko wa nyuba ya Mulugu?”

<sup>25</sup>Oliye ahaakulaga, wiira: “Onopeleka”. Peduru agavolowile mba ahinawoge, Yesu ahiwogaga wiira: “Simawu, onoobuwela avi? Mamwene a elabo ela enaakela misoko okumela waani? Onakumela wa aniiwa, naari onakumela wa anaweendda?”

<sup>26</sup>Peduru ahaakulaga, wiira: “Onakumela wa anaweendda”.

Yesu ahiiraga: “Mowindo aniiwa ehivenyihwavo, kinapeleka. <sup>27</sup>Mbwenye wi hiyo nihikanne nihidda ni ayo enaakela misoko onyubani ya Mulugu, odhowe munyaza, wameze somba. Enambeeliwe omeza okanganule muwano mwiwa, onofwanyamo korowa dha gwingwi, othukule, wapeleke musoko waaga ni waawoya”.

### Mpogo baani?

(Maruku 9.33-37; Luka 9.46-48)

**18** <sup>1</sup>Mudhidhi olene anamasuuzi yahimwaaddamelaga Yesu, omukoha, wiira: “Oli mpogo” muuMweneni wa Odhulu baani?”

<sup>2</sup>Yesu ahimwiithanaga mwaana mmohi, omuhela vaari veewa, <sup>3</sup>wiira: “Ebaribareene ginowuwaaddelani wi mwaahisadduwa mukala wona ahima, kamudha mvolowa muuMweneni wa Odhulu. <sup>4</sup>Vowi ole oneeyeviha wona mwaana ola, oyene dili ookwaranya muuMweneni wa Odhulu.

<sup>5</sup>“Vano ole onamwaakela mwaana wona ola mwaha wa ndina naaga, onagaakela miyeene. <sup>6</sup>Muthu olene onaamuthegihe mmohi mwa ang'onong'ono ala enagiroromela, yaali yapama amageleliwe mukohi nibwe nuulubale na nsilo, avokedhiwe munyaza yooddiiha.

<sup>7</sup>“Oddilu oli ni elabo ya vati mwaha wa dhoothegiha. Dhoothegiha dho kadhinahiiheya wi dhihidhe, mbwenye oddilu oli ni muthu onadhiiha dhoothegiha ndo. <sup>8</sup>Mowindo akala ndada naawo, naari nnyalo naawo, ninowuuthegiha, ogwadde, othathilele woolapela ni we. Soofuneyesesa ovolowa mwiigumini ohinna yaano naari ogali ooragala, ohiya okalana madada mameenddeene, manyalo mameenddeene ovokedhiwe omunddoni woohumala. <sup>9</sup>Akala niinto naawo ninowuuthegiha, ovenyihemo, othathilele woolapela ni we. Soofuneyesesa ovolowa mwiigumini ni niinto nimohi baahi, ohiya ovokedhiwa omunddoni woohuthima oganna meento mameenddeene.

<sup>v</sup> 18.1 Yawogaga dha *mpogo* kinawoga wunnuwa wa muthu mbwenye enawoga dha osogolela mabasa, nlogo, naari elabo.



**Musibe wa nibila noorimeela**  
(Luka 15.3-7)

<sup>10</sup>“Pole-pole, kamwaavevuse naari mmohi mwa ang'onong'ono ala! Vowi ginowuwaaddelani wi angero eewa enakalave vameentoni va aBaba a odhulu.”<sup>w</sup>

<sup>12</sup>“Munoobuwela avi? Muthu mmohi akanna mabila zana (100), nimo-hi nirimeela, oliye kanaahiye omwaangoni makumi matanu ni mannayi ni matanu ni mannayi (99) wi asayelege ndde nrimeele? <sup>13</sup>Vano afwanya, ebaribareene ginowuwaaddelani wi ohagalala waaye onakala wuulubale, mwaha wa ndde nimohi narimeele, ohiya ale makumi matanu ni manna-yi ni matanu ni mannayi (99) yaharimeele. <sup>14</sup>Mowindo kahuwo efunelo ya Babiinyu a odhulu wi arimeele mmohi wa ang'onong'ono ala.

**Dhoofwanelela omwiirela ddibila athega**

<sup>15</sup>“Ddibilo oothegela,<sup>x</sup> odhowe wamoonihe yoothega ele okwibi. Owiiwelela, ohumpura ddibilo. <sup>16</sup>Mbwenye ahuwiiwelela, omuthukule muthu mmohi naari abiili, vowi muladdu onarumeedhiwa owogiwa va-kala anamooni abiili naari araaru.<sup>y</sup> <sup>17</sup>Akala oliye kaneewelege, waaddele gerezha teto akoodda wiiwelela gerezha, mmweelengele wona muthu oode, naari wi namakoha-musoko.

<sup>18</sup>“Ebaribareene ginowuwaaddelani wi dhaatedhene dhineeriinyu mmagege veelaboni ya vati, dhineerege omagiwa odhulu, dhineeriinyu mutapulege veelaboni ya vati, odhulu dhineerege otapuliwa.

<sup>19</sup>“Ginowuwaaddelani teto wi abiili mwa nyo mweewananela vati vano moolobela mulobaga yego-si-yego, eyo munovahiwa ni aBaba eli odhulu. <sup>20</sup>Vowi vili athu abiili naari araaru, etugumanela ndina naaga, miyo ginakala vaari veewa”.

**Musibe wa mwiimeleli oohumulelela mukwaaye**

<sup>21</sup>Vevale Peduru ahimwaaddamelaga Yesu, omukoha, wiira: “Nabwiya, ddibilaaga agithegela, gimulevelege dila ngaasi? Ofiyedha dila tanu nabii?”

<sup>22</sup>Yesu ahimwaakulaga, wiira: “Kaginowaaddela dila tanu ni biili, mbwenye ofiyedha dila makumi matanu ni meenddi ni dila tanu nabii (77).<sup>z</sup>

---

<sup>w</sup> 18.10 Enofwanyeya verisikulu 11 eneera: *Vowi Mwaana a Muthu, odheele waavulumu-sa ale yarimeele* elebiwe mu dhoolebiwa ni madada dhimohi. Mbwenye anamasuza ajinji enoobuwela wi madhu ala kiyalebiwe ni murumiwi Matewuzhi. <sup>x</sup> 18.15 *Oothegela* Naari wi: *athega*. <sup>y</sup> 18.16 Moone Deteronomiyo 19.15 <sup>z</sup> 18.22 Naari wi: *dila makumi matanu ni meenddi weejedhedhavo dila tanu nabii*.

<sup>23</sup>“Mowindo Omwene wa Odhulu onaligana ni mwene oobuwelele wi oone pama mangawa aaye wa amwiimeleli aaye. <sup>24</sup>Vowambeela yahimudheelagana mwiimeleli mmohi afiyaarile korowa dhowaakwana matalenti<sup>a</sup> macikwi kumi (10.000). <sup>25</sup>Mwiimeleli ole kannaga yego yooliva, mwaha wa ela mwene ahilamulaga wi agulihwiye oliye, mwihiyanaaye, anaaye ni dhaatedhene dhanniiyena wi eliviwena mangawa ale.

<sup>26</sup>“Vano mwiimeleli ahikokoraga, oloba, wiira: ‘Ginowuulobani mugikurumuwele, ginoliva’. <sup>27</sup>Mwene ole ahimweeddiwelaga thagaraga, omulevelela mangawaya, omuruma wi adhowege.

<sup>28</sup>“Mwiimeleli ole avenyaga vevale ahigumanaga ni mwiimeleli mukwaaye amfiyaarilege korowa zana (100) dha parata.<sup>b</sup> Ahimwihiddaga, omuhoga, eeraga: ‘Gilive yagifiyaariliwe’.

<sup>29</sup>“Vooharela mwiimeleli mukwaaye ahitongwelaga vamanyaoni vaaye, omulobaga, eeraga: ‘Gilevelele, ginowuuliva’.

<sup>30</sup>“Owambeela ole kaarumeedhilege, odhowa omvokedha mukaambura afiyedhe oliva mangawaya. <sup>31</sup>Akwaaye egoonile yahikubanyaga vajinji, odhowa omwaaddela nabwiya eewa dhaatedhene dheereyilege.

<sup>32</sup>“Vano nabwiya aaye ahimwiithanihaga, wiira: ‘Mwiimeleli abure, miyo guhuulevelela mangawa maatene alene mwaha wowiikubanyedha waawo. <sup>33</sup>Kadhafwanelele wi we teto omweeddiwele thagaraga mwiimeleli mukwaawo wona moweeddiweliimi thagaraga we?’ <sup>34</sup>Nuwindo, nabwiya aaye ahitakaleliwaga, ompeleka mukaambura wi arabulihwiye ofiyedha alive mangawa maatene.

<sup>35</sup>“ABaba a odhulu enoodha yuwiirenaani ndo ninyeene teto, akala kamunalevelelana ni murima waatene”.

### Yesu onowoga dha omwalana

(Maruku 10.1-12)

**19** <sup>1</sup>Yesu agamalile owoga madhu alena, ahimaruwaga oGalileya, odhowaga murudda wa oZhudeya olabuwela kobela emohi ya mwihinje Zhordawu. <sup>2</sup>Anamwinji yahimuharaga, oliye owaayilihaga wewule.

<sup>3</sup>AFarizi amohi yahimwaaddamelaga, omukohaga moomweeha wi emfwanyena mwaha, wiira: “Nlamulo nnorumeedhiha wi mulobwana amwalane ni mwihiyanaaye va mwaha oli waatene?”

<sup>4</sup>Oliye ahawaakulaga, wiira: “Kamuneelenge Maleba Ootaleleya wi omambeelelo Mpaddusi ampaddusile mulobwana ni mwihiyana?<sup>c</sup>

<sup>5</sup>Mulugu ahiwoga, wiira: ‘Mwaha wa ela mulobwana oneerege omwihiya

<sup>a</sup> 18.24 *Talenti* yaali korowa ya oro mutheengo waliveleliwa namalaba alaba yaaka kumi ni yaaka tanu. <sup>b</sup> 18.28 Naari wi: *denariyo*. Denariyo yaali korowa yawale ya parata ya oRoma mutheengo waliveleliwa namalaba alaba nlabo nimohi. <sup>c</sup> 19.4 Wambeela 1.27

babe ni amaaye ataganyihedhane ni mwihiyanaaye, abiili ala enakala mwiili mmohive'.<sup>d</sup> <sup>6</sup> Vowi kinakala athu abiili, enakala mwiili mmohive. Mowindo ele Mulugu egumanihiliye, muthu kamwalanihe".

<sup>7</sup>AFarizi yahimukohaga, wiira: "Ki mwaha bwaddi Mozezi alamule wi nivahege kaarata yoomwalana ni omwiigara?"

<sup>8</sup>Yesu ahawaakulaga, wiira: "Mozezi ahirumeedha omwalana mwaha wa ovaadda mirima dheenyu, mbwenye vowambeela kadhaali ndo. <sup>9</sup>Vano miyo ginowuwaaddelani wi oyene onamwalana ni mwihiyanaaye, vihili mwaha wa oraruwa, amutela mmohi, onooraruwana".<sup>e</sup>

<sup>10</sup>Anamasuuzaa aaye yahiiraga: "Akala dhinakala ndo vaari va mulobwana ni mwihiyanaaye dhili pama ohutela".

<sup>11</sup>Yesu ahawaakulaga, wiira: "Kahuwo athu aatene enaanda waakela mutheenga ola mbwenye aleneve evahiwe ni Mulugu. <sup>12</sup>Ehikalawo ehinatela mwaha wi ebaliwe ookuvuweene; okalawo amohi ehinatela mwaha wi yiire ofuuliwa ni athu amohi; ehikalawo amohi yiikooddihe otela weekiwa mwaha wa Omwene wa Odhulu. Ole onaanda waakela aakele".

**Yesu onowareeliha ahima**  
(*Maruku 10.13-16; Luka 18.15-17*)

<sup>13</sup>Nuwindo, yahaadhaagana ahima wa oliye wi aahela madada, aalobelele wi aareelihe, mbwenye anamasuuzaa yowaahiihaga.

<sup>14</sup>Yesu ahiiraga: "Ahiyeni ahima edhe wa miyo, kamwaahiihe, sowi Omwene wa Odhulu bwa athu enaligana ni aliwa". <sup>15</sup>Vano ahaahelaga madada, wareeliha. Ageere ndo ahivenyawo wewule.

**Muzombwe ooreela**  
(*Maruku 10.17-31; Luka 18.18-30*)

<sup>16</sup>Muzombwe mmohiwa ahimwaaddamelaga, umukoha, wiira: "Nama-suuziha, yapama ddi gineeriimi giirena wi gifwanye egumi yoohumala?"

<sup>17</sup>Yesu ahimwaakulaga, wiira: "Mwaha bwaddi onagikohiiwe eli yapama? Apama oliwo mmohive, di Mulugu. Waafunaga ovolowa mu egumi yoohumala ologolele malamulo".

<sup>18</sup>Oliye ahimukohaga, wiira: "Owi avi?" Yesu ahimwaakulaga, wiira: "Kumpe muthu, kuraruwe, kawiiye, kumwiinkedhe mukwaawo,

---

<sup>d</sup> 19.5 Wambeela 2.24    <sup>e</sup> 19.9 Enofwanyeya madhu owi: *oyene onamwalana ni mwihiyanaaye, vihili mwaha wa oraruwa, amutela mmohi, onooraruwana, teto onamutele oohiyiwa ole ni oliyeene onooraruwana* elebiwe mu dhoolebiwa ni madada dhimohi dhixa. Mbwenye anamasuuzaa ajinji enoobuwela wi teto *onamutele oohiyiwa ole ni oliyeene onooraruwana* madhu ala kiyalebiwe ni murumiwi Matewuzhi.

<sup>19</sup> waariihege ababo ni amaayo”,<sup>f</sup> teto “omudhivelege mwaaddamani aawo wona oneedhiveleliiwe”.<sup>g</sup>

<sup>20</sup> Muzombwe ole ahaakulaga, wiira: “Dhaatedhene dhedho ginohara. Ki egihalile ddi?”

<sup>21</sup> Yesu ahimwaaddelaga, wiira: “Waafunaga okala owaakwanela, odhowe wagulihe dhaatedhene dhinniiwena, korowadha waavahe athu oorabula, dhooreela onoodha ofwanye odhulu. Weera ndo, ogiharege”.

<sup>22</sup> Muzombwe ole ageewile madhu ale, ahivenyagavo, agali owukuuweene wovi ahikanna dhooreela dhijinji.

<sup>23</sup> Vano Yesu ahiwogaga ni anamasuuzaa aaye, wiira: “Ebaribareene ginowuwaaddelani wi soorusa vajinji athu ooreela ovolowa muuMweneni wa Odhulu. <sup>24</sup> Ginowuwaaddelani teto wi eli yookweya kamelo<sup>h</sup> ovira mookupula mwa singano, ohiyana wi athu ooreela evolowe muuMweneni wa Mulugu”.

<sup>25</sup> Anamasuuzaa egeewile nde yahitikinaga vajinji, yahiiiraga: “Akala dhili ndo, ki onaande ovolowa baani?”

<sup>26</sup> Yesu ahaasugwaga, wiira: “Ndo soohaandeya wa athu, mbwenye ni Mulugu kilivo ehinaandeya”.

<sup>27</sup> Vevale Peduru ahiiraga: “Hiyo nihihiya dhaatedhene, wuuharagani. Nnakanne ddi?”

<sup>28</sup> Yesu ahawaakulaga, wiira: “Ebaribareene ginowuwaaddelani wi Mulugu asasanyedha elabo exa, vano miyo Mwaana a Muthu, gikaraati vampanddoni vaaga va omwene wa nthithimiho, nyo mwagiharile teto muneere okaraati mumpanddoni kumi ni miinddi wi mwaathonge malogo kumi ni meenddi a Ezarayeli. <sup>29</sup> Aatene alene ehiiyile nyuba dheewa, addibiliwa, arogoriwa, ababiwa, ameewa,<sup>i</sup> naari yaahiye ahima eewa, naari midda dheewa, mwaha wa ndina naaga, enowaakela dila zana okwaranya dhihiyiliwa teto enowaakela egumi yoohumala. <sup>30</sup> Vovi athu ajinji eli owambeela enoodha ekale oogomihedha, ale eli oogomihedha binaakale owambeela”.

### Musibe wa anamalaba

**20** <sup>1</sup>“Sowi Omwene wa Odhulu onaligana ni mwiinya a mudda avenyilege bebeheene wi aasayele anamalaba a mudda waaye wa uuva. <sup>2</sup> Agamalile wiiwananela mutheengo wowaakela korowa emohi ya parata<sup>j</sup> va nlabo, ahaarumaga omudda.

<sup>f</sup> 19.19 Okuma 20.12-16; Deteronomiyo 5.16-20 <sup>g</sup> 19.19 Levitiku 19.18 <sup>h</sup> 19.24 Kamelo yaali aneenyama alubale yathukula dhoobo. <sup>i</sup> 19.29 Enofwanyeya madhu owi: *Aatene alene ehiiyile nyuba dheewa, addibiliwa, arogoriwa, ababiwa, ameewa, naari ahiyaniwa, naari yaahiye ahima eewa...* elebiwe mu dhoolebiwa ni madada dhimohi dhixa. Mbwenye anamasuuzaa ajinji enoobuwela wi *naari ahiyaniwa* madhu ala kiyalebiwe ni murumiwi Matewuzhi. <sup>j</sup> 20.2 Naari wi: *denariyo*. Denariyo yaali korowa yawale ya parata ya oRoma mutheengo walivebiwa namalaba alaba nlabo nimohi. Moone teto maverisikulu 9, 10, ni 13.

<sup>3</sup>“Agamaruwe wora ya neetanu nennayi ya bebehi, ahawoonaga athu amohi vamusika yahannaga yoohidda; <sup>4</sup>ahawiirelaga: ‘Nyo teto mudhowe omudda waaga, ginowuulivani korowa mowaakwanela’. <sup>5</sup>Vano aliwa odhowa. Ahimaruwaga olenddo mmohiwa mudhidhi waaddamelaga wora ya neekumi nabiili ya mutana, mwiinya ahiiragana emodha-modhave, ahiwelelaga wawiithana anamalaba amohiwa teto mudhidhi waakwana-ga wora ya neethaaru ya ciguwo ahiiragana emodha-modhave.

<sup>6</sup>“Omaruwa teto wora ya neetanu ya ciguwo, ahaafwanyaga amohiwa yahannaga yoohidda, waakoha, wiira: ‘Kamwinna yoohidda nlabo naatenene mwaha bwaddi?’ <sup>7</sup>Yahimwaakulaga, wiira: ‘Mwaha wi kalivo onivahile mabasa’. Vano mwiinya a mudda ahiiraga: ‘Dhowani ninyeene omudda waaga wa uuva’.

<sup>8</sup>“Ociguwoni mwiinya a mudda ahimwiithanaga musogoleli a mudda, wiira: ‘Wawiithane anamalaba, waalivele; wawambeelee oogomihedha, waamarihedhe owambeela’.

<sup>9</sup>“Egafiyile ale yambelege moogomihedha yahaakela korowa emohi ya parata kadda muthu. <sup>10</sup>Vano egafiyile owambeela yoobuwelaga wi eneere waakela mookwaranya, mbwenye naaliweene yaakelilege korowa emohi ya parata. <sup>11</sup>Egaakelile yomwaabaga mwiinya a vaade, <sup>12</sup>yiiraga: ‘Anamalaba ala elabile wora emohi baahi; vano eliganihiwa ni hiyo, navilelena olaba ni oviha nlabo naatenene’.

<sup>13</sup>“Mwiinya a mudda ahimwiirelaga mmohi mwa aliwa: ‘Mukwaaga, kaguwiiyele, kaweewanane ni miyo waakela korowa emohi ya parata?’ <sup>14</sup>Othukule eli yaawo, odhowege, miyo difunile waalivela oogomihedha ala mooliganiha ni we. <sup>15</sup>Kadhifwanelee wiirana dhaaga munafuneliimi? Naari winna nrima ni owoma murima waaga?’

<sup>16</sup>“Mowindo oogomihedha enoodha ekale owambeela, owambeela enoodha ekale oogomihedha”.<sup>k</sup>

**Yesu onowoga dila ya neethaaru dha okwa ni ovenyihiwa waaye**  
(*Maruku 10.32-34; Luka 18.31-34*)

<sup>17</sup>Yesu agwelaga odhowa oZheruzalemi, ahawiithanelaga ombali anamasuuzwa kumi ni abiili, wawaaddela, wiira: <sup>18</sup>“Mwiive, nili voolenddoni woodhowa oZheruzalemi, wewo miyo, Mwaana a Muthu, gineere opelekiwa mmadadani mwa apogo a anamakutha ni anamasuuziwa a Malamulo. Aliwa eneere olamula wi gipiwe. <sup>19</sup>Miyo gineere opelekiwa mmadadani mwa athu oode wi egibeddege, egiwaxule, egikomele vamuraddini, mbwenye nlabo na neethaaru givenyihiwe muukwani”.

---

<sup>k</sup> **20.16** Enofwanyeya madhu owi: *owambeela enoodha ekale oogomihedha, mwaha wowi ajinji enowiithaniwa, mbwenye oosakuliwa eli ooyeva elebiwe mu dhoolebiwa ni madada dhi-mohi dhixa. Mbwenye anamasuuzwa ajinji enoobuwela wi mwaha wowi ajinji enowiithaniwa, mbwenye oosakuliwa eli ooyeva madhu ala kiyalebiwe ni murumiwi Matewuzhi.*

**Dhooloba dha mma mmohi***(Maruku 10.35-45)*

<sup>20</sup>Vano ahidhaaga wa oliye mwadha Zebedeyo ni anaaye, ahikokoraga vameentoni vaaye, omuloba yego.

<sup>21</sup>Yesu ahimukohaga, wiira: “Onafuna ddi?” Oliye ahaakulaga, wiira: “Olamule wi ahima aaga ala abiili muuMweneni weenyu ekaraati mmohi ola omoononi weenyu wooja, mmohiwa ola omoononi weenyu woong'oto”.

<sup>22</sup>Mbwenye Yesu ahawaakulaga, wiira: “Kamunonile enalobiinyu. Dhinowaandeya nyo omung'wela nakoma<sup>1</sup> a goyi onaamung'weliimi?”

Yahimwaakulaga, wiira: “Ee, dhinowaandeya”.

<sup>23</sup>Yesu ahiiraga: “Ebaribareene munoomung'wa nakoma a goyi yaaga; mbwenye okaraati epaddi yaaga wi muthongege ni miyo, kadhili mwa miyo. Mburo ndo dhili ni Ababa wa ale yaasanyedheliye”.

<sup>24</sup>Vevale amohiwa kumi veewiligiwa madhu ale yahitakaleliwaga ni akwiwa abiili ale. <sup>25</sup>Vano Yesu ahawiithanaga, wiira: “Muhunona wi anamathonga a dhilabo enowaajela athu eewa, apogo binaalamula aliwa. <sup>26</sup>Kadhikale ndo wa nyoovo. Moohiyaniha, oyene onafuna okala mpogo vaari va nyo, akale mwiimelile enyu. <sup>27</sup>Vano onafuna okala owambeela vaari va nyo akale mudhaari enyu; <sup>28</sup>muliganenge wona Mwaana a Muthu, kadheele wi eemeleliwege mbwenye odheele eemelelege ni ovaha egumi yaaye okala yowoobola ya athu ajinji”.

**Yesu onowaayiliha aliba ohoona abiili***(Maruku 10.46-52; Luka 18.35-43)*

<sup>29</sup>Emaruwaga nluwa na oZheriko athu ajinji yoomuharaga Yesu. <sup>30</sup>Vano athu abiili ohoona yakaraatilege seresere ya rampa, egeewile wi Yesu avira wewule yahikuwaga, wiira: “Nabwiya, Mwaana a Davidi,<sup>m</sup> muneeddiwele thagaraga!”

<sup>31</sup>Vevale anamwinji yowaahihaga wi emaale. Mbwenye yoweenjedhedhagave okuwa, yiraga: “Nabwiya, Mwaana a Davidi, muneeddiwele thagaraga!”

<sup>32</sup>Vano Yesu ahiimelaga, wawiithana, waakoha, wiira: “Ki munafuna guwiireleni ddi?”

<sup>33</sup>Yahimwaakulaga, wiira: “Nabwiya, nnafuno noonege”.

<sup>34</sup>Vevale Yesu ahaweeddiwelaga thagaraga, okahinya meento eewa. Vano mowaaguva yahambeelaga woona, omuharaga.

**Yesu onovolowa muZheruzalemi ni ovuwa***(Maruku 11.1-11; Luka 19.28-40; Zhuwawu 12.12-19)*

**21** <sup>1</sup>Yaaddamelaga oZheruzalemi, yahifiyaga oBetifazhe, va Mwaango wa Olivera, Yesu ahaarumaga anamasuuzo aaye

<sup>1</sup> 20.22 Naari wi: kopo. <sup>m</sup> 20.30 Mwaana a Davidi Ndda naali ndina nimohi na Misiya nanoniwiyyena ni aZhudewu. Moone teto verisikulu 31.

abiili, 2 wawaaddela, wiira: “Dhowani mudhi onooniinyu ole, mowaaguvava munomfwanya buuru ni mwaanaye egamageleliwe. Mwaatapule, mwaadhena wa miyo. 3 Akalavo onookoheni, mmwaakule, mwiire: ‘Nabwiya dinaafuna’. Vano oliye oneere wuwinkani mowaaguva”.

4 Vano nda dheereyele wi dhaakwanele dhawogile namavuhulela dhowi:

5 *“Mwawaaddele athu a oZiyoni:”*

*‘Keeng’anani, onoodha mwene eenyu,*

*owiyeviha, agagwelile vabuuruni,*

*vamwaana a buuru, oomfuwa oothukula dhoobo’ ”.*°

6 Anamasuuzi egadhowile yahiragana dhaaddeliwigiisu. 7 Yahimu-dhaagana buuru ni mwaanaye, otadeela dhoowara dheewa vamutanani va abuuru, Yesu okaraati vadhuluviwa. 8 Athu ajinji yootadeelaga dhoowara dheewa murampani, amohiwa yookotholaga mijindda dha mithanko otadeelaga murampani. 9 Vano anamwinji, ale yadhowaga osogolo ni ale yadhaaga mundduli, yookuwaga, yiiraga:

*“Hozana,<sup>p</sup> Mwaana a Davidi!<sup>q</sup>”*

*“Ooreelihiwa di oyene onadha mu ndina na Nabwiya!”*

*“Hozana mudhulu-dhulu!”*

10 Agavolowile muZheruzalemi nluwa naatenene nahithikeyaga, athu yookohanaga, yiiraga: “Olaya baani?”

11 Anamwinji yookuwaga, yiiraga: “Ola di namavuhulela Yesu, a oNazarethi a oGalileya”.

### **Yesu onoweeliha nyuba ya Mulugu**

*(Maruku 11.15-19; Luka 19.45-48)*

12 Yesu agafiyele vathaddo va nyuba ya Mulugu ahaathamagihagavo athu aatene yagulihagavo ni oogula. Ahaabidhulaga meeza a athu oocenja korowa teto ahibidhulaga dhittengu dha anamaguliha kangayiwa. 13 Ahawaaddelaga, wiira: “Dhilebiwe ndala: ‘Nyuba yaaga eneethaniwege nyuba ya matugumano a malobelo.’<sup>s</sup> Mbwenye nyo muhusaddula okala ‘nikungu na ambava’<sup>t</sup>”.

14 Agali vathaddo va nyuba ya Mulugu, yahidhaaga wa oliye oohoona, ooragala; oliye waayiliha. 15 Mbwenye apogo a anamakutha ni anamasuuziha a Malamulo yahitakaleliwaga egoonile dhootikiniha nde Yesu dheeriligiye, vowawiiwa ahima ekuwaga mu nyuba ya Mulugu yiiraga: “Hozana wa Mwaana a Davidi!” 16 Apogo ni anamasuuziha ale

<sup>n</sup> 21.5 Ziyoni naali ndina nimohi na Zheruzalemi.    ° 21.5 Zakariya 9.9; Ezaya 62.11

<sup>p</sup> 21.9 Hozana mu ewogelo ya eHeberi enatapulela *Nabwiya nivulumuseni*. Moone teto

verisikulu 15.    ¶ 21.9 Mwaana a Davidi Ndda naali ndina nimohi na Misiya nanoniwiiyena

ni aZhudewu. Moone teto verisikulu 15.    † 21.9 Masaalimu 118.26    § 21.13 Ezaya 56.7

‡ 21.13 Zheremiya 7.11

yahimunyanyuwelaga, wiira: “Onowawiiwa ala dhinawogiiwa?” Yesu ahawaakulaga, wiira: “Ee, kamuneelengege dhowi:

“*Muwano mwa ahima ang'onong'ono  
ni mwa manyenya muhusasanyedhamo wi  
mukumege matamaalelo eenyu?*”<sup>u</sup>

<sup>17</sup>Ahaahiyaga, ovenyamo muluwani mule, odhowaga oBetaniya, nluwa ning'onong'ono wavireliwigiiye mahiyu maatene.

**Yesu onodduba mfigera<sup>v</sup>**  
(*Maruku 11.20-25*)

<sup>18</sup>Yesu bebeheene awelagawo oluwani ahikalagana dala. <sup>19</sup>Agoonile muthanko wa mfigera (onaligana ni namutaambwi) waaddamela mundila ahaaddamelagavo, mbwenye kaafwanyilegemo yego, afwanyilegemo mataakuruve baahi. Vevale ahiwogaga ni muthanko ole, wiira: “Muthanko we, wambeela peeno kudha ovahave yego!” Mudhidhi olene mfigera ole wahummaga.

<sup>20</sup>Anamasuuzaga egoonile nde yahitikinaga, wiira: “Mfigera ola wummile addi mowaaguva!”

<sup>21</sup>Vevale Yesu ahawaakulaga, wiira: “Ebaribareene ginowuwaaddelani wi mwakanna nrromelo muhaanganyedhaga kamuneerena dhedhive dhimwiirimina namutaambwi ola. Mbwenye nyo mweerela mwaango ola: ‘Venyavo, weevokedhe munyaza’, dhineerege wiireya wona munawogeliinyu. <sup>22</sup>Teto dhaatedhene dhinaalobigiinyu mwa nlobelo muroromelaga, muneerege waakela”.

**Yesu onokohiwa dha owodha waaye**  
(*Maruku 11.27-33; Luka 20.1-8*)

<sup>23</sup>Yesu agafiyile nyuba ya Mulugu asuuzihaga, apogo a anamakutha ni apogo a nlogo yahimwaaddamelaga omukoha, wiira: “Onaaddele, owo-dha baani oneeriiwena dhego dhi? Wuuvahile owo-dhawo baani?”

<sup>24</sup>Yesu ahawaakulaga, wiira: “Miyo teto ginowuukohani yego emohi, mwagaakula ginowuwaaddelani odhiliimina owodha oneeriiwena dhego dhi. <sup>25</sup>Amvahile Zhuwawu Namabathiza owodha wi abathizege baani? Aali Mulugu, naari yaali athu?” Vano yoovaanyihanaga mmohi ni mukwaaye yiiraga: “Neera wadhiile wa Mulugu, onowiira ki mudhe muhumurumeedhege oliye. <sup>26</sup>Teto neera wadhiile wa athu, nnowoova nlogo, vowi athu aatene yahiroromela wi Zhuwawu aali namavuhulela”.

<sup>27</sup>Yahimwaakulaga Yesu, wiira: “Kannonile”. Oliye teto ahawaakulaga, wiira: “Naari miyo teto kaginowaaddelani okumile owodha oneeriiwena dhedhi”.

---

<sup>u</sup> 21.16 Masaalimu 8.2    <sup>v</sup> 21.18-22 Mfigera bu muthanko onavaha furuuta dhoologana ni furuuta dha *namutaambwi*.



### Musibe wa ahima abiili

<sup>28</sup>“Ki munoobuwela avi? Mulobwana mmohi ahikanna anaaye abiili. Ahidhowaga wa owambeela obaliwa, wiira: ‘Mwaanaga, odhowe peeno walabe omudda wa uuva.’

<sup>29</sup>“Oliye ahaakulaga, wiira: ‘Kaginadhowawo’. Nuwindo, ahuubuwelelaga, otthwaruwa, odhowawo.

<sup>30</sup>“Baabi ole ahidhowaga wa a nabiili owoga emodha-modhave. Oliye waakula, wiira: ‘Ginoyawo, nabwiya!’ Nuwindo, kaagelewo.

<sup>31</sup>“Mwa ala abiili eerilena ofuna wa ababe duuvi?”

Yahimwaakulaga, wiira: “Owambeela”.

Yesu ahawaaddelaga, wiira: “Ebaribareene ginowuwaaddelani wi anamakoha-musoko ni ajeberuwe enovolowa muuMweneni wa Mulugu yuuhiyagani mundduli. <sup>32</sup>Mwaha wi Zhuwawu Namabathiza ahidha wa nyo owoonihagani dila yowogoowa, kamwamuroromele, mbwenye anamakoha-musoko ni ajeberuwe yahimuroromela. Nyo naari mugoonileve dhedho kamwatthwaruwile wi mmuroromele oliye.

### Musibe wa anamalima abure

(Maruku 12.1-12; Luka 20.9-19)

<sup>33</sup>“Vuruwanani musibe mmohiwa. Wahikala mulobwana mmohi alimile mudda wa uuva. Ahaapeleliha cinga, osasanyamo moovoddela uuva, omaga sanja yowiing'anela. Nuwindo, mudda ole ahibolihaha wa anamalima amohi. Ageere ndo ahivenyagamo mwiilaboni mule. <sup>34</sup>Ogafiyile mudhidhi woohadda muliba mudda ahaarumaga amwiimeleli aaye wa anamalima ale wi yathukule dhoovaha dhafunigiye.

<sup>35</sup>“Anamalima yahaahiddaga amwiimeleli ale; mmohi omuddwadha, mmohiwa ompa, oogomihedha omvonya ni mabwe. <sup>36</sup>Muliba mudda ahaarumagawo amwiimeleli amohi ajinji waakwaranya owambeela, wawirela emodha-modhave. <sup>37</sup>Voogomihedha ahimurumihagawo mwaana aaye-aaye, eeraga: ‘Ola oli mwaanaga, eneere omuriiha’.

<sup>38</sup>“Mbwenye anamalima egamoonile mwaanaya, yahaaddelanaga mmohi ni mukwaaye, yiiraga: ‘Ola di namahalana mudda, nimpe wi nihalena mureeleloya’. <sup>39</sup>Yahimwihiddaga, omvokedha ode wa mudda, ompa.

<sup>40</sup>“Ki muliba mudda ole adhaaga onawiirena avi anamalima ale?”

<sup>41</sup>Yahimwaakulaga, wiira: “Onoodha aape mowaarabuliha mapanga ale, muddaya aabolihaha athu amohi, enaavelelege dhoovaha va mudhidhiya”.

<sup>42</sup>Yesu ahaakohaga, wiira: “Kamuneelengege ndo mMalebani Ootaleleya?

“*Nibwe nenddo nakooddile anamamaga nyuba,  
ndda nihisadduwa okala nibwe noohiddeela nyuba*

*Nabwiya deerilena dhedhi,  
dhili dhootikiniha vameentoni veehu' ”.*<sup>w</sup>

<sup>43</sup>“Mowindo ginowuwaaddelani wi Omwene wa Mulugu muneere waakiwa, ovahiwe nlogo nimohi nnavahahege dhoovaha dha Omwene wa Mulugu. <sup>44</sup>Olene onatongwele nibwe nddi onogwaddanyeya, ole nna-mmoreliiwa nibwe nddi onoosileya”.<sup>x</sup>

<sup>45</sup>Apogo a anamakutha ni aFarizi egeewile madhu ale, yahiiwelelagamo wi aawogaga aliwa. <sup>46</sup>Mowindo yoosayelaga omwihidda, mbwenye yowa-woovaga anamwinji vovi athu yoororomela wi Yesu aali namavuhulela.

### Musibe wa mathanga a matelo

(Luka 14.15-24)

**22** <sup>1</sup>Yesu ahiwelelaga owoga mwa misibe, eeraga: <sup>2</sup>“Omwene wa Odhulu oli wona mwene asasanyilege mathanga a matelo a mwaanaye. <sup>3</sup>Ahaarumaga amwiimeleli wi yawaaddele owiithaneliwa mathanga, mbwenye aliwa kayafunilege odha.

<sup>4</sup>“Ahaarumaga amwiimeleli amohiwa ni malamulo owi: ‘Mwawaaddele owiithaneliwa mathanga wi gihimala osasanyedha dhaatedhene, gihipa ng’ombe ni aneenyama amohi ooruva, dhaatedhene dhihaakwana. Mudhe omathangani a matelo!’

<sup>5</sup>“Aliwa kayapwathilege, kadda muthu oovenyagavo, mmohi agele omudda waaye, mmohiwa ahidhowaga onagoosoni waaye, <sup>6</sup>amohiwa yahalilege yahaahiddaga amwiimeleli ale yahawoonihaga goyi, vano waapa. <sup>7</sup>Mwene ahitakaleliwaga, waaruma anyakoddo wi yaape mapanga ale, epahe nluwa neewa.

<sup>8</sup>“Vano ahawaaddelaga amwiimeleli aaye, wiira: ‘Mathanga ehaakwana, mbwenye aliba wiithaniwa kayaali oofwanelela. <sup>9</sup>Dhowani mmakulugano mwa dila, mwamwiithanele mathanga muthu oli aatene onamfwanyiinyu’. <sup>10</sup>Amwiimeleli ale egadhowile mmandila yahaatugumanyaga aatene yaafwanyigiisu, apama ni abureene, ofiyedha nyuba moojela mathanga odhaala ni owiithaniwa.

<sup>11</sup>“Vano mwene agavolowile wi awoone owiithaniwa yaaligi vameeza, vevale ahimoonaga mulobwana mmohi ahannaga yoowara ya vama-thangani. <sup>12</sup>Ahimukohaga, wiira: ‘Mukwaaga, ovolowile addi muno ohuwarile yoowara ya vamathangani?’ Oliye kannaga yoowoga.

<sup>13</sup>“Vano mwene ahaalamulaga amwiimeleli aaye, wiira: ‘Mmageni madada ni manyalo, mumvokedhe ode oyiihini, wewo onaakale wuundda ni otakuna meeno’.

<sup>14</sup>“Vovi ajinji enowiithaniwa, mbwenye oosakuliwa booyeva”.

<sup>w</sup> 21.42 Masaalimu 118.22-23    <sup>x</sup> 21.44 Verisikulu ela kinafwanyeya egalebiwe mu dhoolibiwa ni madada dhinjijji.

**Opeleka musoko wa Sezari**  
(*Maruku 12.13-17; Luka 20.20-26*)

<sup>15</sup>AFarizi egavenyilevo yahitugumanaga opanganelaga mukalelo woomuwaga muwano Yesu. <sup>16</sup>Yahaarumaga anamasuuzi eewa amohi ni a nikuru na Heroddi wi yamwaaddele, yeere: “Namasuuziha, nihi-nona wi nyo munowoga ebaribari, munosuuziha pama madhu a Mulugu, mooligana ni ebaribari. Teto kamuneelenga wi munawoga naani, mwaha wi kamuneeng'ana mukalelo wa muthu. <sup>17</sup>Kanaaddeleni, munoono avi? Enofwanelela opeleka musoko wa Sezari naari kinafwanelela?”

<sup>18</sup>Yesu aganonile ogongomwa weewa ahaakulaga, wiira: “Munageehela ddi, nyo anamanyengetha? <sup>19</sup>Kagooniheni korowa enaliviwa musoko”. Yahidhaagana korowa emohi ya parata.<sup>y</sup> <sup>20</sup>Oliye ahaakohaga, wiira: “Nifwanafwaniho nlivo thawani? Ki ndina nilebiwevo thawani?”

<sup>21</sup>Yahimwaakulaga, wiira: “Dha Sezari”. Vano ahawiirelaga: “Mumvahege Sezari eli ya Sezari; mumvahege Mulugu eli ya Mulugu”.

<sup>22</sup>Egeewile nde yahitikinaga. Vano omwihiya Yesu, odhowaga.

**Ovenyihiwa muukwani**  
(*Maruku 12.18-27; Luka 20.27-40*)

<sup>23</sup>Nlabo nendde aSaduseyi yahimwaaddamelaga Yesu. Aliwa enowoga wi kawuli ovenyihiwa muukwani, mwaha wa ela yahimukohaga, wiira: <sup>24</sup>“Namasuuziha, Mozezi ahiira: ‘Mulobwana akwa ahinna ahima, ddibile amutelege maamukweleya wi ambalele ahima ddibile ole yeele-ngiwege ahima a mwanookwa’.<sup>z</sup> <sup>25</sup>Vano wahikala addibila atanu ni abiili. Owambeela agatelile ahikwa, ahimwihiyile mwaana, vano ddibile omute-la maamukweleya. <sup>26</sup>Dhahiireya ndo ni ddibila a nabiili ni a neethaaru, ofiyedha ddibila a neetanu ni abiili. <sup>27</sup>Dhigeereye ndo teto omagomihedhowa mwihiyana ole okwa. <sup>28</sup>Ki nlabo na ovenyihiwa muukwani, mwihiyana ole onadha eeriwege mwadha wani, vowi atanu ni abiili ale yahimutela?”

<sup>29</sup>Yesu ahawaakulaga, wiira: “Munaviriganihela mwaha wa ohunonelamo Maleba Ootaleleya naari owodha wa Mulugu. <sup>30</sup>Vowi nlabo noovenyihiwa muukwani kalivo onaatelege naari otehiwa, athu enakalege wona angero a odhulu. <sup>31</sup>Nawogaga dha omavenyihiwelo muukwani kamweelengile dhiwogile Mulugu mwiinyeene, eeraga: <sup>32</sup>‘Miyo gili Mulugu a Abarahamu, Mulugu a Ezaaki ni Mulugu a Yakobo?’<sup>a</sup> Mulugu kahuwo Mulugu a athu ookwa, di Mulugu a athu ookalawo”.

---

<sup>y</sup> 22.19 Naari wi: *denariyo*. Denariyo yaali korowa yawale ya parata ya oRoma mutheengo waliveliwa namalaba alaba nlabo nimohi. <sup>z</sup> 22.24 Deteronomiyo 25.5 <sup>a</sup> 22.32 Okuma 3.6

<sup>33</sup>Egeewile nde anamwinji yahitikinaga ni dhoosuuziha dhaaye.

**Nlamulo noofuneya**  
(*Maruku 12.28-34; Luka 10.27*)

<sup>34</sup>Vano aFarizi veewiligiwa wi Yesu ohuvaanya dhowaakula dha aSaduseyi dhaatedhene, yahitugumanaga. <sup>35</sup>Mmohi mwa aliwa, nama-tapulela a Malamulo, moomweeha ahimukohaga, wiira: <sup>36</sup>“Namasuuziha, mwa Malamulo maatene, nuulubale thiivi?”

<sup>37</sup>Yesu ahimwaakulaga, wiira: “Omudhivelege Nabwiya Mulugu aawo ni murima waawo waatene, ni egumi yaawo yaatene, ni wiiwelelamo waawo waatewene’.<sup>b</sup> <sup>38</sup>Ndda thi nlamulo noofuneya teto nowambeela. <sup>39</sup>Na nabiili nnoligana ni nenddi: ‘Omudhivelege mwaaddamani aawo wona muneedhiveliwe’.<sup>c</sup> <sup>40</sup>Mwa malamulo meenddi ala fumageyile Malamulo maatene ni Anamavuhulela”.

**Kirixtu di Nabwiya a Davidi**  
(*Maruku 12.35-37; Luka 20.41-44*)

<sup>41</sup>AFarizi egatugumaneve, Yesu ahaakohaga, wiira: <sup>42</sup>“Munoobuwelela avi dha Kirixtu?<sup>d</sup> Di mwaana wani?”

Yahimwaakulaga, wiira: “Mwaana a Davidi<sup>e</sup>”.

<sup>43</sup>Yesu ahaakohaga, wiira: “Ki mwaha bwaddi Davidi awogile odheela mwa Muneba Woweela amwiithanaga ‘Nabwiya’, eeraga:

<sup>44</sup> “*Nabwiya Mulugu ohuwoga wa Nabwiya aaga:*

*“Okaraati omoononi waaga wooja  
ofiyedha gaahela amwiiddani aawo  
vati va manyalo aawo”<sup>f</sup>*

<sup>45</sup>Akala Davidi onamwiira ‘Nabwiya’, onaakale addi mwaanaye?”

<sup>46</sup>Mowindo kaalivo aandile omwaakula, naari ndhu nimohi. Okuma vevale, odhowa osogolo, kaalivo aliba murima wi amukohege yego.

**Yesu onokona onyengetha wa aFarizi ni anamasuuziha a Malamulo**  
(*Maruku 12.38-40; Luka 11.37-52; 20.45-47*)

**23** <sup>1</sup>Nuwindo, Yesu ahiwogaga ni anamwinji ni anamasuuziha aaye, wiira: <sup>2</sup>“Anamasuuziha a Malamulo ni aFarizi binna othongi wootapulela Malamulo a Mozezi. <sup>3</sup>Mwiiregena ni ologolela dhaatedhene dhinosuuzihiisuni, mbwenye kamuharege dhowiira dheewa, vovi aliwa

---

<sup>b</sup> 22.37 Deteronomiyo 6.5    <sup>c</sup> 22.39 Levitiku 19.18    <sup>d</sup> 22.42 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu.    <sup>e</sup> 22.42 *Mwaana a Davidi* Ndda naali ndina nimohi na Misiya nannoniwiya ni aZhudewu.    <sup>f</sup> 22.44 Masaalimu 110.1

kineerana dhinasuuzihiiisu. <sup>4</sup>Enomaga sapo dhoonyemela<sup>g</sup> ohela mmafuddi-ni mwa athu; mbwenye aliwa naari ni embuno emohi kinafuna ovenyihana.

<sup>5</sup>“Enahidda mabasa eewa maatene wi yooniwege ni athu, enowiima-gelela dhitoonyihedho dhuulubale dhoolebiwa epaddi emohi ya madhu a Mulugu vakoveni ni vamoononi. Enolapiha mijeba dha mikanjo dheewa. <sup>6</sup>Enodhiveliwa okaraati mburo dhowambeela mmathangani ni mu nyuba dha matugumano.<sup>h</sup> <sup>7</sup>Enodhiveliwa olojeliwa ni nriiho mburo dhowooneya, enodhiveliwa wiithaniwa ‘anamasuuziha’.<sup>i</sup>

<sup>8</sup>“Nyo kamwiiriwege ‘anamasuuziha’, mwaha wi namasuuziha eenyu oli mmohi baahi, nyo mwaatene muli addibila. <sup>9</sup>Elabo ya vati kammwiithanege muthu babiinyu, mwaha wi oliwo babiinyu mmohi baahi, ole oli odhulu. <sup>10</sup>Naari kamwiiriwege ‘anamatapulela’, mwaha wi Namatapulela eenyu oli mmohi, di Kirixtu.<sup>j</sup> <sup>11</sup>Ookwaranya vaari veenyu akale mwiimeleli eenyu. <sup>12</sup>Muthu oneegweliha, dinayevihiwa; ole oneyeviha, dinagwelihiwa.

<sup>13</sup>“Ooddilu di nyo, anamasuuziha a Malamulo, ni nyo aFarizi, nyoovo muli anamanyengetha! Munafugelela ddi Omwene wa Odhulu vameento-ni va athu? Nyo kamunavolowa, teto kamunaahiya athu enafuna ovolowa wi evolowe.<sup>k</sup>

<sup>15</sup>“Ooddilu di nyo anamasuuziha a Malamulo, ni nyo aFarizi, nyoovo muli anamanyengetha! Vowi nyo munowapeela nyaza ni odewene mmu-sayelaga muthu oomutthwarusa, vano mwamutthwarusa, munamwiira oliye wona oofwanelela omunddoni woohuthima dila biili wuukwaranya ni nyo.

<sup>16</sup>“Ooddilu di nyo anameeddiha oohoona munawoga mwiiraga: ‘Muthu alibela nyuba ya Mulugu eyo kahuwo yego, mbwenye muthu alibela oro a nyuba ya Mulugu onowaddihedhiwa eerena elibeliye’. <sup>17</sup>Nyo athu oolodhowa ni oohoona, yuulubale siivi, oro ole naari nyuba ya Mulugu eyo eneeliha oro? <sup>18</sup>Muneera: ‘Muthu alibela ebuwa kahuwo yego, mbwenye

---

<sup>g</sup> 23.4 Enofwanyeya madhu owi: *Enomaga sapo dhoonyemela dhoorusa othukula* elebiwe mu dhoolebiwa ni madada dhimohi dhixa. Mbwenye anamasuuziwa ajinji enoobuwela wi *dhoorusa othukula* madhu ala kiyalebiwe ni murumiwi Matewuzhi. <sup>h</sup> 23.6 *Nyuba dha matugumano* Nda mu ewogelo ya eGerego dheeriwa *sinagoga*. Mabasa eewa kayaali oolobelamoove, naari osuuzamo Malamulo, mbwenye teto yowaathongamo athu yahaaharihamo Malamulo a aZhudewu. Moone teto verisikulu 34. <sup>i</sup> 23.7 *Anamasuuziha* Mu ewogelo ya eHeberi ndhu nddi nneeriwa *raabi*. <sup>j</sup> 23.10 *Kirixtu* mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. <sup>k</sup> 23.13 Enofwanyeya verisikulu 14 eneera: *Ooddilu di nyo anamasuuziha a Malamulo, ni nyo aFarizi, nyoovo muli anamanyengetha! Munovolowa nyuba dha amaamukwele a ahiyana mwawaakaga dhookalana dheewa, munowirihedha malobelo oolapa wi mwiiriwege owo-goowa. Mwahaya buuyene munaalagiweliinyu moohuhiyedhedha!* elebiwe mu dhoolebiwa ni madada dhimohi dhixa. Mbwenye anamasuuziwa ajinji enoobuwela wi madhu ala kiyalebiwe ni murumiwi Matewuzhi. Moone Maruku 12.40 ni Luka 20.47.

onalibela yooveleela eli veebuwani, onowaddihedhiwa wiirana mwaha woolibela'.<sup>19</sup> Nyo muli ohoona baahi! Yuulubale siivi, yooveleela naari ebuwa eneeliha dhooveleela? <sup>20</sup> Ndala onalibelela ebuwa, onalibelela ebuwa eyo teto ni dhaatedhene dhili veebuwanivo. <sup>21</sup> Onalibelela nyuba ya Mulugu, onalibelela nyuba eyo teto ni oyene onakala mwemo. <sup>22</sup> Onalibelela odhulu, onalibela mpanddo wa Mulugu ni oleya okaraatile vampanddoni viwa.

<sup>23</sup> “Oddilu di nyo, anamasuuziha a Malamulo, ni nyo aFarizi, nyo muli anamanyengetha! Munoveleela ya neekumi ya mataakuru oonukwela ni bewu dhoowomiha dhooja, mbwenye kamunapwatha magano maatene oofuneya a Malamulo a Mulugu: wogoowa, thagaraga ni ororomeleya wa Mulugu. Soofuneya mwiiregena nda, muhuvenyihagavo Malamulo mamohiwa. <sup>24</sup> Anameeddiha ohoona, mucocitha embu mwa dhoong'wa dheenyu, mbwenye munommira kamelo!<sup>1</sup>

<sup>25</sup> “Oddilu di nyo, anamasuuziha a Malamulo, ni nyo aFarizi, nyo muli anamanyengetha! Munahuwa ode wa kopo ni wa muziwo, mbwenye muwari mweenyu mugali moobuwelelo owaaka ni a nrima. <sup>26</sup> Nyo aFarizi ohoonawo, vowambeela mweelihe muwari mwa kopo wi ode wiwa teto okale woweela.

<sup>27</sup> “Oddilu di nyo anamasuuziha a Malamulo ni nyo aFarizi, nyo muli anamanyengetha! Munaligana ni masiye oosuluwiwa ni ddowa, enooniha oriya ode wiwa mbwenye muwari mwiwa mugali makuva a anookwa ni dhoovudda dhaatedhene! <sup>28</sup> Nyo teto ode munooneya wona ooharhamo efunelo ya Mulugu vameentoni va athu, mbwenye muwari mweenyu muli dhoonyengetha ni dhootakala.

<sup>29</sup> “Oddilu di nyo, anamasuuziha a Malamulo, ni nyo aFarizi, nyo muli anamanyengetha! Munamaga pama masiye a anamavuhulela, muwomihedhaga ni mabwe masiye a athu owogoowa, mwiiraga: <sup>30</sup> ‘Nahaakalewo mudhidhi wa makolo eehu kanaarumeedhele dhowaapa anamavuhulela ayo’. <sup>31</sup> Nyo weekiinyu munorumeedhela wi muli ahima a ale yaapile anamavuhulela. <sup>32</sup> Mowindo marihani mabasa yambeele makolo eenyu!

<sup>33</sup> “Nyo muli nyowa, mulogo wa dhivili! Munaavulumusiwe addi othongiwa wa omunddoni woohuthima? <sup>34</sup> Vano mwiwe, miyo ginowu-rumihedhani anamavuhulela, atthottho ni anamasuuziha. Amohi muneere waapa waakomela vamuraadini, amohiwa mwaawaxulege mu nyuba dheenyu dha matugumano, mwaaharaharege nluwa ni nluwa. <sup>35</sup> Mowindo Mulugu oneere wuuthongani mwaha wowaapa athu yahanna muladdu vati va elabo, wambeela mwazi wa Abeli aali muthu owogoowa, ofiyedha mwazi wa Zakariya mwaana a Barakiya ampeliinyu vathaddo va nyuba ya Mulugu, vaari ni vaari va mburo woweela ni ebuwa. <sup>36</sup> Ebaribareene ginowuwaadde-lani wi dhaatedhene dhedhi dhinowadheela athu a mudhidhi ola.

<sup>1</sup> 23.24 *Kamelo* aali mwaneenyama mulubale athukula dhoobo.

<sup>37</sup>“Zheruzalemi, Zheruzalemi we, onaapa anamavuhulela, waavonyaga ni mabwe ale enarumihedhiwiwe, aa! Dila ngaasi gifunaga waatugumanya anaawo wona mwanaku onaatugumanya anaaye mmompeloni mwaaye, mbwenye we kawafunile! <sup>38</sup>Vuruwanani, nyuba yeenyu ela enoodha esadduwe ndebe. <sup>39</sup>Ginowuwaaddelani wi wambeela peeno kamudha mugoona ofiyedha mudhe mwiire: ‘Ooreelihiwa di ole onadha mundina na Nabwiya’<sup>m</sup>”.

### Etoonyihedho ya makuthulo a dhaatedhene

(Maruku 13.1-31; Luka 21.5-37)

**24** <sup>1</sup>Yesu akumaga mu nyuba ya Mulugu, anamasuuzwa aaye yahi-mwaaddamelaga wi emoonihe mamagiwelo a nyuba ya Mulugu.<sup>n</sup>

<sup>2</sup>Oliye ahiiraga: “Munowoona dhaatedhene dhedhi? Ebaribareene ginowuwaaddelani wi kudha okala nibwe vadhulu va nibwe nikwaaye nihinaadhe nihibwanyuliwe”.

<sup>3</sup>Yesu, agakaraatile vaMwaangoni wa Olivera, anamasuuzwa aaye yahi-mwaaddamelaga, omukoha ombale, wiira: “Kanaaddeleni dhego dhedho dhineereyege alini? Kanaaddeleni etoonyihedho baani nneerihu noonege ya odha weenyu ni omakuthulo wa dhaatedhene?”

<sup>4</sup>Oliye ahaakulaga, wiira: “Pole-pole, ahikalevo oneere ooholose-ni. <sup>5</sup>Vowi enoodha efiye athu ajinji mu ndina naaga yiirege: ‘Miyo gili Kirixtu<sup>o</sup> ole aromeliwe’, eneere waaholosa athu ajinji. <sup>6</sup>Teto muhukuu-we mweewaga koddo naari dhooruma dha koddo, mwaha wi soofuneya wi dhego ndo dhiireyege, mbwenye makuthulo kinafiye. <sup>7</sup>Vowi nlogo nneerege owana koddo ni nlogo nimohi, omwene oneerege owana ni omwene omohi, enoodha ekalewo dala ni othikeya wa elabo mburo dhoohiyana-hiyana. <sup>8</sup>Dhoo padduwa ndo dhinaakale dhooligana ni dhoo-voreya dhowambeela dha mwihiyana mudhidhi wa obala.

<sup>9</sup>“Vano nyo muneerege ooharahariwa, woonihiwa goyi, amohi ofiyedha opiwa. Munakala owiiddiwa ni malogo maatene, mwaha wa ndina naaga. <sup>10</sup>Mudhidhi oyene athu ajinji enoodha ehiye nroromelo neewa, epelekanenge ni wiiddana. <sup>11</sup>Eneerege okumelela anamavuhulela ajinji ooratha, yaanyengethege athu ajinji. <sup>12</sup>Vano mwaha woweenjedhedheya dhootakala, odhivela onoodha oyeve vaari va athu ajinji. <sup>13</sup>Mbwenye oyene onaavilele ofiyedha omakuthulo, onoodha avulumusiwe. <sup>14</sup>Muselu Wapama wa Omwene ola, onoodha olaleyiwe elabo yaatene ya vati okale onamoona wa malogo maatene. Mowindo finaadhe makuthulo a dhaatedhene.

<sup>m</sup> 23.39 Masaalimu 118.26    <sup>n</sup> 24.1 Mamagiwelo a nyuba ya Mulugu Yawoga ndo mwaha wi nyuba eyo kayaalivo emohive dhaalivo nyuba dhijinjidhene.    <sup>o</sup> 24.5 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. Moone teto maverisikulu 23, 24 ni 26.

<sup>15</sup>“Mwadha moona yoonyakavala yoobwanyula yawogile namavuhulela Daniyeli vamburoni woweela, (ole oneelenga eeweleelemo),<sup>p</sup> <sup>16</sup>ole onaa-kale oZhudeya athawele omwaangoni. <sup>17</sup>Ole onaa-kale ode kavolowe mba wi athukule dhego. <sup>18</sup>Ole onaa-kale omudda kawelele vaade wi athukule kasaako yaaye. <sup>19</sup>Ooddilu bi abiyana enaakalena wari mudhidhi oyene teto enawaamwihege ahima! <sup>20</sup>Lobelani wi othawa weenyu ohudhe wiireya mudhidhi wa muzongwe<sup>q</sup> naari nlabo na sabuddu. <sup>21</sup>Mwaha wowi mudhidhi oyene okubanya ni masooso malubale enaakalewo kinakalegewo wambeela vipaddusiwe elabo ofiyedha peeno. Teto kadhidha dhiireya dila emohi. <sup>22</sup>Malaboya yaheere ehivuguliwa, kalivo muthu naari mmohi aavulumusiwe. Mbwenye malaboya ehivuguliwa mwaha wa athu yaasakuliye. <sup>23</sup>Vano muthu owaaddelani, eera: ‘Moone! Kirixtu ole aroromelihiwe oli va!’ naari eera: ‘Ole oli wule!’ kamurumeedhe. <sup>24</sup>Ginawogela ela vowi eneere okumelela athu ajinji ooratha, eneerege: ‘Nili Kirixtu ole aroromelihiwe’ ni anamavuhulela ajinji ooratha. Makuru meenddi ala eneerege waanyenge-tha athu, yiiragana dhitoonyihedho ni dhootikiniha dhuulubale, mowindo eneerege oxixa wi dhaandeyaga, yanyengethege ni oosakuliweene a Mulugu. <sup>25</sup>Mvuruwane, miyo ginowuwaaddelani dhedhi dhihinapadduwe.

<sup>26</sup>“Mowindo yeera: ‘Kirixtu ole aroromelihiwe, oli okokolani!’ kamuyewo; naari yeera: ‘Oli muwari mwa nyuba’, kamurumeedhe. <sup>27</sup>Mwaha wowi wona mwemo ozherima onakuma onakumela nduwa wooneyele ofiyedha omadhowelo wa nduwa, odha wa Mwaana a Muthu onadha wiireyege ndo. <sup>28</sup>Wewo onakale muruthu funaatugamane mbidha.

<sup>29</sup>“Mowaaguva yavira masooso a malabo alene,  
 “*‘nduwa nnoodha nribe,*  
*mweeri kunaamoneyege,*  
*ttendderi dhinoodha dhimorewo odhulu,*  
*kopolo dha odhulu dhinoodha dhithikeye’<sup>r</sup>.*

<sup>30</sup>“Vano odhulu onoodha wooneye etoonyihedho ya Mwaana a Muthu, malogo maatene a vati enoodha ekubanyege emoonaga Mwaana a Muthu adhaaga mmiraboni dha odhulu ni owodha ni nthithimiho nookwaranya. <sup>31</sup>Oliye oneere waaruma angero aaye ni oruma wuulubale wa palaza wi yaatugumanye oosakuliwa a Mulugu a elabo yaatene, dhipaddi nnayi dha mmagomelo mwa elabo ya vati ni ya odhulu.

<sup>32</sup>“Musuuze dhinasuuziha namutaambwi,<sup>s</sup> moonaga mijindda dhiwa dhambeelaga ofeewa, mataakuru epwedheyaga, nyo munonona wi elimwe ehaaddamela. <sup>33</sup>Mwa mukalelo mmohive nyo mwadha moona dhego dhaatedhene dhedhi munone wi Mwaana a Muthu ohaaddamela, oli vamulagovene. <sup>34</sup>Ebaribareene ginowuwaaddelani wi nlogo ndda

<sup>p</sup> 24.15 Daniyeli 9.27; 11.31; 12.11    <sup>q</sup> 24.20 Naari wi: *mudhidhi wooddiddila*.

<sup>r</sup> 24.29 Ezaya 13.10; 34.4    <sup>s</sup> 24.32 Naari wi: *namutaambu*.



kannamale, dhihinapadduwe dhaatedhene nda. <sup>35</sup>Elabo ya vati ni odhulu dhinoodha dhimale, mbwenye madhu aaga kidha emala.

<sup>36</sup>“Mbwenye dha nlabo nddo ni mudhidhiya kalivo ononile, naari angero a odhulu kinonile, naari Mwaana kanonile, ononile di Babe baahi. <sup>37</sup>Dhapadduwile malabo a Nowe<sup>t</sup> teto sinapadduwe odha wa Mwaana a Muthu. <sup>38</sup>Mudhidhi olene ehinafiye malabo a mutokora athu yooja, yoong'wa, yootela ni oteliwa, ofiyedha nlabo navolowile Nowe mmwanddeyani mulubale. <sup>39</sup>Kayanonelemo yego ofiyedha ofiya muto-kora,” waadhowiha aatene. Dhinadha dhiireyege ndo odha wa Mwaana a Muthu. <sup>40</sup>Mudhidhi olene alobwana abiili enoodha ekale vamudda, mmohi athukuliwegevo, mmohiwa ahiyiwege. <sup>41</sup>Ahiyana abiili enoodha elabege vasiloni, mmohi athukuliwegevo, ahiyiwegevo mmohiwa.

<sup>42</sup>“Mowindo eng'anelani mwaha wi kamunonile nlabo nnadha Nabwiya enyenu. <sup>43</sup>Mwiwe teto ela, mwiinya a vaade ahaanonege mudhidhi onadha mbava, eerege wiing'anela, kaahiyege wi nyuba yaaye ekupuliwe. <sup>44</sup>Mowindo nyo mwiisasanyedhe, wovi mudhidhi ohunoobuweleliinyu, Mwaana a Muthu fineeriye adhe.

<sup>45</sup>“Vano oli mwiimeleli oororomeleya, oowaraala baani? Kahuwo ole athomiwe ni nabwiye okala pogo a amwiimeleli akwaaye wi aagawelege dhooja mudhidhiya waakwana? <sup>46</sup>Ooreelihiwa di mwiimeleli oyene nabwiye adhaaga onamfwaniyiye eeragana ndo. <sup>47</sup>Ebaribareene ginowuwaaddelani wi nabwiye onomwiira musadoro a dhookalana dhaaye dhaatedhene. <sup>48</sup>Mbwenye mwiimeleli ole akala ootakala, onoobuwelela mmurimani mwaaye, eeraga: ‘Nabwiya aaga onoribeliwa’, <sup>49</sup>ambeela waaddwadha amwiimeleli akwaaye, ajaga ni ong'wa ni athu oolezela. <sup>50</sup>Nabwiya a mwiimeleli ole onoodha afiye nlabo nihinajehihiye, naari wora ehinoniliye. <sup>51</sup>Oneere omoonihwa goyi vajinji, amudhowihe mburo mmohive ni aliba onyengetha, wewo onaakale wuundda ni otakuna meeno”.

### Musibe wa anamwali kumi

**25** <sup>1</sup>“Mudhidhi oyene Omwene wa Odhulu onadhe okale wona dheerilege anamwali kumi. Yathukulege panti dheewa wi yagumane ni namatela. <sup>2</sup>Anamwali ale atanu yaaligi oolodhowa, atanu yaaligi ooxaga. <sup>3</sup>Oolodhowa vathukuligiiwa panti dheewa, kayathukulilege makura mamohi, <sup>4</sup>mbwenye ooxaga egathukulile panti teto yahithukulaga makura mmagaraafwani. <sup>5</sup>Namatela ahiribeliwaga, aatene yahihiddiwaga ni kove, ogonelavo.

<sup>6</sup>“Vaari ni vaari va mahiyu wahiiweyaga okuwa, weeraga: ‘Namatela ohufiya! Venyani mwagumanena’.

<sup>7</sup>“Anamwali aatene ale yahivenyaga, osasanyedha panti dheewa. <sup>8</sup>Oolodhowa yahawiirelaga ooxaga: ‘Nivahemoni vang'ono makura enyenu, mwaha wi panti dheehu dhinoothima’.

<sup>t</sup> 24.37 Wambeela 6.5-8    <sup>u</sup> 24.39 Wambeela 7.6-24

<sup>9</sup>“Anamwali ooxaga yahawaakulaga, wiira: ‘Naari, yinniihuna kinaakwanela hiyo teto ni nyo! Dhowani wa anamaguliha, mwaagule eenyu’.

<sup>10</sup>“Aliwa egamaruwile wi yaagule, namatela ahifiyaga. Ale yaaligi owiisasanye-dheene yahivolowaga ni oliye mwaaligi mathanga ootela, ofugiwa musiuo.

<sup>11</sup>“Vigavirile mudhidhi yahifiyaga anamwali oolodhowa, ekuwaga, yiiraga: ‘Nabwiya, nabwiya, nithuleleni!’

<sup>12</sup>“Mbwenye oliye ahaakulaga, wiira: ‘Ebaribareene ginowuwaaddelani wi kaguunonileni’ ”.

<sup>13</sup>Vano Yesu agamarihile owoga musibe ola, ahiiraga: “Mwiing'anelege, mwaha wi kamunonile nlabo niwa naari mudhidhiya onaadhe Mwaana a Muthu”.

### Musibe wa matalenti

(Luka 19.11-27)

<sup>14</sup>“Omwene wa Odhulu oli wona muthu mmohi anna olenddo, awiithanilege amwiimeleli aaye, waahiyedha dhooreela dhaaye. <sup>15</sup>Ahimwinkaga mmohi korowa dhowaakwana matalenti<sup>v</sup> matanu, mmohi amwinkilege korowa dhowaakwana matalenti meenddi, amwinkilege mmohiwa talenti emohi. Ahiiragana ndo mooligana ni tthotho dha kadda muthu, omaruwa olenddo waaye. <sup>16</sup>Ole aakelilege matalenti matanu ahivenyaga mowaaguva, omwiira nagooso, opura matalenti mamohi matanu. <sup>17</sup>Emodha-modhave ole avahiwege matalenti meenddi teto ahipuraga mamohiwa meenddi. <sup>18</sup>Mbwenye ole aakelilege talenti emohi wa nabwiye eerege otibela talenti ele.

<sup>19</sup>“Vigavirile mudhidhi mujinji, nabwiya a amwiimeleli ale ahidhaaga. Agadhiile aheelengelaga korowa dhaatedhene nde ni amwiimeleli aaye. <sup>20</sup>Mwiimeleli ole aakelilege matalenti matanu, ahiveleelaga teto mamohi matanu, wiira: ‘Nabwiyani, mwagivahile matalenti matanu. Moone, gihipuramo mamohi matanu ala’.

<sup>21</sup>“Nabwiye ahiiraga: ‘Dhihikala pama, we oli mwiimeleli apama ni oororomeleya. We ohuroromeleya ni dhego dhing'onong'ono, ginuwuvaha okameela dhego dhijinji. Volowa ohagalale ni miyo!’

<sup>22</sup>“Ahidhaaga teto mwiimeleli ole aakelilege matalenti meenddi, omwiirela: ‘Nabwiyani, mwagivahile matalenti meenddi. Moone, gihipuramo mamohiwa meenddi’.

<sup>23</sup>“Nabwiye ole ahimwaaddelaga, wiira: ‘Dhihikala pama, we oli mwiimeleli apama ni oororomeleya. We ohuroromeleya ni dhego dhing'onong'ono, ginuwuvaha okameela dhego dhijinji. Volowa mburo woohagalala wa nabwiya aawo!’

<sup>24</sup>“Vano agafiyle ole aakelilege talenti emohi, ahiiraga: ‘Nabwiya, wovi gihinona wi muli muthu oovaadda murima, munohadda vihidhali-

<sup>v</sup> 25.15 *Talenti* yaali korowa ya oro mutheengo waliveliwa namalaba alaba yaaka kumi ni yaaka tanu. Moone teto maverisikulu 16, 17, 18, 20, 22, 24, 25, ni 28.

liinyu, munotugumanya vihimidhiliinyu, <sup>25</sup> gowuwoovani mwaha wa ela, geere otibela vati talenti yeenyu ela, thukulani eli yeenyu’.

<sup>26</sup> “Nabwiye ahimwaakulaga, wiira: ‘Mwiimeleli abure, ooyimwa, wahinona wi ginohadda vihidhaliliimi, ginotugumanya vihimidhiliimi. <sup>27</sup> Vano odhe ohuhelege obanko korowa yaaga, miyo gaweligiimiwo, gowaakela ni yoweenjedhedhavoya.

<sup>28</sup> “ ‘Mmwaake talenti eyo mumvahe ole winna matalenti kumi. <sup>29</sup> Vowi ole winna oneere weenjedhedhiwa, vano oneere akalana dhowiinjiva, mbwenye ole ohinna, naari yooyeva elene yinniyena onowaakiwa. <sup>30</sup> Vano mwiimeleli ooyimwa oyo, mumvokedhe ode, oli epipi. Wewo onaakale wuundda ni otakuna meeno’ ”.

### Othongi woogomihedha

<sup>31</sup> “Mwaana a Muthu, adha adhaaga ni nthithimiho naaye na omwene, vamohi ni angero aatene, onoodha akaraati vampanddoni vaaye va omwene wa nthithimiho. <sup>32</sup> Malogo maatene enoodha etugumane vameentoni vaaye, oliye onoodha aamwalanihe wona makambuzi onamwalaniha mbuzi ni mabila. <sup>33</sup> Onoodha aahela mabila omoononi waaye wooja, vano mbuzi onoodha ahele omoononi waaye woong’oto.

<sup>34</sup> “Vevo mwene” onoodha awiirele ale enaakale omoononi wooja: ‘Mudhe wuno, nyo ooreelihiwa a Ababa! Volowani muuMweneni oyene wasasanyedheliwiinyu okuma opaddusiwa wa elabo ya vati. <sup>35</sup> Mwaha wi gahikalana dala mwahigivaha yooja; gahikalana nthona mwahigivaha yoong’wa; gaali mwanaweendda mwahigaakela; <sup>36</sup> gaali madave mwahigiwariha; gaali muredda mwahigikameela; ngafugeliwe mukaambura mwahidha ogoona’.

<sup>37</sup> “Mowindo ooharihamo efunelo ya Mulugu enoodha emukohege, yiiraga: ‘Nabwiya, nowoonileni alini muganna dala nuuvahani yooja? Naari muganna nthona nuuvahani yoong’wa? <sup>38</sup> Naari nowooniliihuni mugali mwanaweendda nuwaakelani? Naari mugali madave nuuwarihani? <sup>39</sup> Ki nowoonileni alini mugali aredda naari mugafugeliwe mukaambura ndha nuwoonani?’

<sup>40</sup> “Mwene onoodha awaakulege, eere: ‘Ebaribareene ginowuwaadde-lani wi mudhidhi dhaatedhene mwaakamihedhiinyu amohi mwa addibilaga ang’onong’ono ala, mwagikamihedha miyeene’.

<sup>41</sup> “Vevo mwene ole onoodha awiirele ale enakale omoononi waaye woong’oto: ‘Venyavoni va miyo, ooddubiwa nyo, mudhowe omunddoni woohumala wasasanyedheliwe Ddiyabo<sup>x</sup> ni angero aaye. <sup>42</sup> Vowi gahikalana dala kamwagivahile yooja; gahikalana nthona kamwagi-

---

w **25.34** Yesu onowoga dhowi *mwene* oneyaagana oliyeene, mudhidhi oyene onaadhiiye akaraati vampanddoni vaaye va omwene. Vevo onoodha ambeele waathonga athu a elabo yaatene wona *mwene* athu aatene. <sup>x</sup> **25.41** *Ddiyabo* naali ndina nimohi na Sathana.

vahile yoong'wa; <sup>43</sup>gaali mwanaweendda kamwagaakelile; gaali madave kamwagiwarihile; gaali muredda kamwagikameele; gahifugeliwa mukaambura kamwadhiile mugoona'.

<sup>44</sup>“Aliwa enoodha emukohege, yiirege: ‘Nabwiya, nowoonileni alini mugali ni dala, ni nthona, mugali mwanaweendda, mugali madave, mugali aredda, naari mugafugeliwe mukaambura nuhuupwathani?’

<sup>45</sup>“Mwene onoodha awaakulege, eerege: ‘Ebaribareene ginowuwaadde-lani wi mudhidhi dhaatedhene mwahaakamihedhiinyu amohi mwa addibilaga ala ang'onong'ono, mwahiya ogikamihedha miyeene’.

<sup>46</sup>“Vano ayo enoodha edhowege ogoyini yoohumala, mbwenye oohari-hamo efunelo ya Mulugu enoodha edhowege wiigumini yoohumala”.

### Opanganela dha ompa Yesu

(Maruku 14.1-2; Luka 22.1-6; Zhuwawu 11.45-57)

**26** <sup>1</sup>Yesu agamalile dhosuuziha dhaatedhene dhedhi, ahawiirelaga anamasuuzi aaye: <sup>2</sup>“Muhunona wi ehalile malabo meenddi wi athabeliwe Paxkwa,<sup>y</sup> vano miyo, Mwaana a Muthu, ginopelekiwa wa amwiiddani wi egikomele vamuraddini”.

<sup>3</sup>Mudhidhi oyene apogo a anamakutha ni apogo a aZhudewu yahitugumanaga vaade va musogoleli a anamakutha, eethaniwa Kayifa. <sup>4</sup>Vano yahiiwananelaga mukalelo wowi emwihidde Yesu mowiipiteya wi empe. <sup>5</sup>Aliwa yowiiiraga: “Ohukale mudhidhi woothabela Paxkwa wi nnaadhe nitatamule wiinyuwela vaari va athu”.

### Mwihiyana mmohi onomukuthulela makura Yesu oBetaniya

(Maruku 14.3-9; Zhuwawu 12.1-8)

<sup>6</sup>Yesu agali oBetaniya vaade va Simawu muliba mareda. <sup>7</sup>Vevale Yesu ajaga, mwihiyana mmohi ahimwaaddamelaga aganna garaafwa noosasanyiwa ni alabasuturu<sup>a</sup> mwaaligi makura oonukwela a mutheengo wookwima. Ahifugulaga garaafwa ndde, makuraya omukuthulela Yesu mmuruni.

<sup>8</sup>Vano anamasuuzi a Yesu egoonile nda yahitakaleliwaga, wiira: “Makura ala enanoongeliwa ddi? <sup>9</sup>Vowi makura ala aheere waaguliha, aguliha korowa dhijinji, ndo eere waagawela athu oorabula”.

<sup>y</sup> **26.2 Paxkwa** yaali mathanga oofuneyesesa a aZhudewu. Moone Okuma 12.1-27. Vowi Yesu avenyihwe nlabo nenddo na Paxkwa, hiyo dhiinova Paxkwa eehu nnathabela ovenyihwa wa Yesu muukwani. <sup>z</sup> **26.6 Mareda** mu ewogelo ya eGerego kinaagana maredave, mbwenye teto dhireda dhoohiyana-hiyana dha nikupa na muthu. <sup>a</sup> **26.7 Alabasuturu** naali nibwe noozhazhaala na mooneyelo oweela nasasanyiwana mino, milinga ni magaraafwa a makura oonukwela.

<sup>10</sup>Yesu aganonile dhedhi, ahawiirelaga: “Munamukathamihela ddi mwihiyana ola? Egiireliiye sapama. <sup>11</sup>Athu oorabula enaakalege ni nyo malabo maatene, mbwenye miyo kaginaakalege vamohi ni nyo mudhidhi waatene. <sup>12</sup>Voogikuthulela makura ala mwiili waaga, oliye osasanyedhe ologohiwa waaga. <sup>13</sup>Ebaribareene ginowuwaaddelani wi oli waatewene mwiilaboni onaalaleyigege Muselu Wapama ola, athu eneerege omuwoga mwihiyana ola, emuubuwelelaga mwaha wa dhedho dhigiireliiye”.

**Zhudasi onowiiwanana ni apogo a aZhudewu dhoompeleka Yesu**  
(*Maruku 14.10-11; Luka 22.3-6*)

<sup>14</sup>Vevale mmohi mwa anamasuuzwa aaye kumi ni abiili eethaniwa Zhudasi a oEsikariyothi, ahidhowaga ogumana ni apogo a anamakutha. <sup>15</sup>Ahaa-kohaga, wiira: “Ki munagivahe ddi gadha gimpeleka Yesu oyo wa nyo?” Aliwa yahimulivaga korowa dha parata makumi maraar. <sup>16</sup>Zhudasi okuma mudhidhi olene, odhowa osogolo oosayela mpatha wowi ampeleke Yesu.

**Yooja ya Nabwiya**  
(*Maruku 14.12-26; Luka 22.7-23; Zhuwawu 13.18-30*)

<sup>17</sup>Nlabo nowambeela na Mathanga a Mikaathe Dhooheheliwa Emela, yahidhaaga anamasuuzwa wa Yesu omukohaga, wiira: “Munafuna nasasanyedhe waani wi mujewo Mathanga a Paxkwa?”

<sup>18</sup>Vano oliye ahawaakulaga, wiira: “Dhowani muluwani, munomfwanya muthu mmohi, mwawoge, mwiire: ‘Namasuuziwa wiire: mudhidhi waaga ohaaddamela, vaade veenyu finamuthabeliimi Paxkwa ni anamasuuzwa aaga’ ”. <sup>19</sup>Aliwa yahiiiragana wona mwawaaddelege Yesu. Vevale yahisasanyedhaga Mathanga a Paxkwa.

<sup>20</sup>Ociguwoni, Yesu agakaraatile vameeza vamohi ni anamasuuzwa aaye kumi ni abiili, <sup>21</sup>ejaga, oliye ahiiraga: “Ebaribareene ginowuwaaddelani wi mmohi mwa nyo onogiguliha wa amwiiddani aaga”.

<sup>22</sup>Aliwa yookubanyaga vajinji, wambeela owogaga: “Ebaribareene kahuwo miyo, Nabwiya”.

<sup>23</sup>Oliye ahawaakulaga, wiira: “Oyene onareha mukaathe muziwo mmohive ni miyo, dinagipeleke. <sup>24</sup>Miyo, Mwaana a Muthu, onookwa wona mulebeliwiwa dha oliye, mbwenye oddilu oli ni olene onampeleke Mwaana a Muthu! Yaali yapama muthu oyo aheere ahibaldiwa!”

<sup>25</sup>Nuwindo, Zhudasi ole afunaga ompeleka, ahiiraga: “Ebaribareene kahuwo miyo, namasuuziwa”. Yesu ahimwaakulaga, wiira: “Ee, diweene”.

<sup>26</sup>Vano ejagave, Yesu ahithukulaga mukaathe, otamaalela wa Mulugu, ogwaddanya, wawinka anamasuuzwa aaye, wiira: “Akelani, muje, ola bu mwiili waaga”.

<sup>27</sup>Vooharela ahimuthukulaga nakoma,<sup>b</sup> otamaalela wa Mulugu, wawinka anamasuuz aaye, wiira: “Mmung'we mwaatene, <sup>28</sup>vowi ola bu mwazi waaga, mwazi wa nipangano no waandana onakuthuleliwa athu ajinji wi eleveleliwe dhoothega dheewa. <sup>29</sup>Ginowuwaaddelani wi okuma dhiinova, odhowa osogolo, kagidha gimung'waga vinyu dila emohi ofiyedha nlabo nddo nnaadhiimi gimung'we vinyu muxa vamohi ni nyoovo muuMweneni wa Ababa”.

<sup>30</sup>Vano egeebile njibo noomutamaala Mulugu, yahimaruwaga, odhowa oMwaangoni wa Olivera.

**Yesu onomwaaddela Peduru wi oneere omukoodda**  
(*Maruku 14.27-31; Luka 22.31-34; Zhuwawu 13.36-38*)

<sup>31</sup>Nuwindo, Yesu ahiiraga: “Mahiyu alena, nyo mwaatene muneere ogileva. Vowi Maleba Ootaleleya yiire:

“*Ginoodha gimporose makambuzi,  
vano mabilaya ebalaleye*’.<sup>c</sup>”

<sup>32</sup>Vano gavenyihiwa muukwani, ginoodhowa osogolo weenyu oGalileya”.

<sup>33</sup>Peduru ahiiraga: “Naari aatene yuuleveni, miyo kagidha guulevani”.

<sup>34</sup>Yesu ahimwaakulaga, wiira: “Ebaribareene, ginowuwaaddela wi mahiyu alena, mutubi ahinandde oneere ogikoodda dila thauru, wiiraga kuginonile”.

<sup>35</sup>Peduru ahimwaakulaga, wiira: “Kagidha gukooddani, naari dhakala dhoofuneya wi gikwe, ginookwa vamohi ni nyo”. Anamasuuz aatene yahiwoga madhu mamohive.

**Nlobelo na Yesu oZheesimani**  
(*Maruku 14.32-42; Luka 22.39-46*)

<sup>36</sup>Vooharela, Yesu ahidhowaga ni aliwa mburo weethaniwa Zheesimani. Vano ahawiirelaga anamasuuz aaye, wiira: “Mukaraati veva, miyo ginadhowa wule galobebe”. <sup>37</sup>Ahimuthukulaga Peduru ni ahima abiili a Zebedeyo, ahambeelaga wukuuwa ni ovoreyiwa. <sup>38</sup>Nuwindo, ahiiraga: “Murima waaga oli wowukuuwa vajinji, ofiyedha okwa, mukale veva mwiing'anelege ni miyo, kamugone”.

<sup>39</sup>Oliye aheeddaga vang'ono, okokora, oworomihedha kove vati, olobela, wiira: “Babani, dhakala dhoorumeedheya, mmukwaranyihe nakoma<sup>d</sup> oyo! Dhihiireye wona munafuneliimi, mbwenye dhiireye wona munafuneliinyu”.

<sup>40</sup>Nuwindo, ahiwelelaga wa anamasuuz aaye, aafwanyilege egonaga. Vano ahimukoha Peduru, wiira: “Kamwaandile wiying'anela ni miyo naari

<sup>b</sup> 26.27 Naari wi: kopo. Moone teto maverisikulu 39 ni 42.    <sup>c</sup> 26.31 Zakariya 13.7

<sup>d</sup> 26.39 Nakoma etoonyihedho ya owali wa Mulugu. Moone Ezaya 51.17,19,22; Zheremiya 49.12.

mudhidhi vang'ono? <sup>41</sup> Mwiying'anele, mulobelaga wi muhimorele moweehiwani. Muneba onofuna wiirana, mbwenye mwiili buli woolodhowa”.

<sup>42</sup> Ahiwelelaga ovenyavo dila ya nabii, olobela, wiira: “Babani, akala kadhinarumeedheya omukwanyiha nakoma ola gihimung'wile, yiireye efunelo yeenyu”.

<sup>43</sup> Vano awelagawo aafwanyilege egonaga mwaha wi meento eewa yowaanyemelaga. <sup>44</sup> Ahaahiyaga, odhowa olobela dila ya neethaar, aawelelaga madhu mamohive.

<sup>45</sup> Nuwindo, ahiwelelaga wa anamasuza aaye, wiira: “Munoogonave ni ovuma? Keeng'anani, mudhidhi ohufiya onaapelekiwiiye Mwaana a Muthu mmadadani mwa athu oothega! <sup>46</sup> Mvenye, nidhowege! Onafuna ogiguliha oli vakukuve”.

### Omagiwa wa Yesu

(*Maruku 14.43-52; Luka 22.47-53; Zhuwawu 18.1-11*)

<sup>47</sup> Yesu awogagave, ahifiyaga Zhudasi, mmohi mwa kumi ni abii, ni athu ajinji eganna masupaadda ni golomondo. Athu ala yarumiwege ni apogo a anamakutha ni apogo a aZhudewu. <sup>48</sup> Namampeleka ahipanganelaga ni aliwa etoonyihedho ela, wiira: “Oyene gineeriimi gimbezhari, duuyeene mummage”. <sup>49</sup> Mowaagava Zhudasi ahimwaaddamelaga Yesu, wiira: “Ginowuulojelani, Namasuuziha!” Vevale ombezhari.

<sup>50</sup> Yesu ahimwaaddelaga, wiira: “Mukwaaga, odheele ddi?”

Vevale amohi yahimuthamagelaga Yesu, omwihidda, ommaga.

<sup>51</sup> Vano mmohi aaligi ni Yesu, ahixomolaga supaadda naaye, omporosana mwiimeleli a musogoleli a anamakutha, ompadha nibaru.

<sup>52</sup> Nuwindo, Yesu ahiiraga: “Ovolosihe muthumbani supaadda naawo, vovi aatene alene enalabiha supaadda, enadha epiwe ni supaadda. <sup>53</sup> Kaahi onoobuwela wi kaginaanda waaloba Ababa, dhiinoveva wi egrumihedhe angero ajinji akoddo, ookwaranya makuru kumi ni meenddi?<sup>e</sup> <sup>54</sup> Miyo geera ndo enaakwanele addi Maleba Ootaleleya enawoga wi soofuneya dhiireye?”

<sup>55</sup> Mudhidhi olene Yesu ahaakohaga anamwinji, wiira: “Mudhiile ni masupaadda ni golomondo wi mugihidde wona gili owiinyuwela? Malabo maatene gakaraatesa mu nyuba ya Mulugu gisuuzihaga, kamugihiddile. <sup>56</sup> Dhaatedhene nda dhihipadduwa wi yaakwanele Maleba a anamavuhulela”. Vevale anamasuza aaye aatene yahithawaga, omwihiya yeeka.

### Yesu va Nikuru nuulubale na apogo a aZhudewu

(*Maruku 14.53-65; Luka 22.54-55,63-71; Zhuwawu 18.12-14,19-24*)

<sup>57</sup> Ale yammagilege Yesu yahimudhowagana vaade va Kayifa, Musogoleli a anamakutha, wewo watugumanilege anamasuuziha a Malamulo

<sup>e</sup> 26.53 Makuru kumi ni meenddi mu ewogelo ya aRoma yeera lezhiyawu. Naali nikuru nimohi nakanna anyakoddo owaakwana macikwi matanu ni nimohi, (6.000).

ni makolo a aZhudewu. <sup>58</sup>Peduru owaaharaga voolapelavene, ofiyedha ovolowa vathaddo vaade va musogoleli a anamakutha. Nuwindo, Peduru ahivolowaga, okaraati vamohi ni anamaang'anela wi oone omagomelo wiwa.

<sup>59</sup>Apogo a anamakutha ni Nikuru nuulubale na apogo aZhudewu naatene yoosayelaga onamoono wooratha wi Yesu apiwe. <sup>60</sup>Mbwenye kayamfwanyilegena mwaha. Athu ajinji yoomurathelaga Yesu, naari ndo, onamoono weewa kawaakwanaga. Omakuthulowiwa yahivenyaga athu abiili omurathelaga, yiiraga:

<sup>61</sup>“Mulobwana ola wiire: ‘Miyo ginowaanda obwanyula nyuba ya Mulugu, gimage muwari mwa malabo maraaru’ ”.

<sup>62</sup>Agavenyile musogoleli a anamakutha, ahimukohaga Yesu, wiira: “Kunaakula yego, athu ala dhinoosumeliwa?” <sup>63</sup>Yesu kaakulilege yego. Vano musogoleli a anamakutha, ahiiraga: “Miyo ginowuulamula wi olibele vameentoni va Mulugu mugumi onaaddele akala we oli Kirixtu<sup>f</sup> ole aroromelihiwe, Mwaana a Mulugu”.

<sup>64</sup>Yesu ahawaakulaga, wiira: “Fu mwemo munawogeliinyu. Vano ginowuwaaddelani wi okuma dhiinoveva munomoono Mwaana a Muthu agakaraatile omoononi wooja wa Oowodha-wodha, adheelaga mmuraboni dha odhulu”.

<sup>65</sup>Vano musogoleli a anamakutha ageewile madhu alena ahitalaga dhoowara dhaaye, wiira: “Muhumwiiwa onyemula waaye! Ki nnaasayelege onamoono wa ddi? <sup>66</sup>Munoobuwela avi?” Apogo amohi yahaakulaga, wiira: “Ofwaneelele apiwe”.

<sup>67</sup>Vevale amohi yoomutaperaga mare wiintoni, emvahaga masoko, amohiwa emuddwadhaga mbarutuni, <sup>68</sup>yiiraga: “Ovuhulele, we Kirixtu. Wuuddwadhile baani?”

### **Peduru onokoooda wi ohumunona Yesu,**

*(Maruku 14.66-72; Luka 22.55-62; Zhuwawu 18.15-18,25-27)*

<sup>69</sup>Vevale Peduru agakaraatile vathaddo, mwiimeleli a namwali ahi-mwaaddamelaga, wiira: “We teto waali ni Yesu ole muGalileya”.

<sup>70</sup>Peduru ahikooddaga vameentoni va aatene, eeraga: “Miyo kaginonile enawogiwe”.

<sup>71</sup>Vano Peduru ovenyavo, odhowa vamavolowelo, mwiimeleli mmohi a mwihiyana omoonona, wawaaddela yaaligi vevale wiira: “Ola teto aali ni Yesu a oNazarethi”.

<sup>72</sup>Oliye ahikooddaga dila ya nabiili ni olibela, eeraga: “Miyo kagimunonile muthu oyo”.

---

<sup>f</sup> 26.63 Kirixtu mu ewogelo ya eGerego enatapulela Muthikitheliwi, Misiya, naari wi: oosakuliwa a Mulugu, oyene onaavulumuse athu. Moone teto verisikulu 68.



<sup>73</sup>Vigavirile mudhidhi vang'ono yahimwaaddamelaga Peduru athu yaaligi vevale, wiira: “Ebaribareene, oli mmohi mwa aliwa, vowi ma-wogelo aawo enowuunoneyiha”.

<sup>74</sup>Vevale ahambeelaga okoooda olibela, wiira: “Miyo kagimunonile mulobwana oyo! Mulugu agoonihe goyi akala ginooratha!” Mowaaguva mutubi ahunddaga.

<sup>75</sup>Vano Peduru ahuubuwelelaga madhu a Yesu yeeriligiiye: “Mutubi ahinaandde, we oneere ogikoodda dila thaaruu”. Peduru ahimaruwaga vevale, okumela ode, anddaga ni okubanya wuulubale.

### Yesu onopelekiwa wa Pilatu

(Maruku 15.1; Luka 23.1-2; Zhuwawu 18.28-32)

**27** <sup>1</sup>Ode ogasile bebeheene, apogo aatene a anamakutha ni apogo a nlogo yahipanganelaga wi empe Yesu. <sup>2</sup>Aliwa ommaga, omudhowagana wa kuminadori Pilatu.

### Okwa wa Zhudasi

<sup>3</sup>Vano Zhudasi, muliba ompeleka, vooniligiiye wi Yesu ohukoniwa, ahuubuwelelaga, wiira: “Geerela ddi?” Ahaawelihedhaga korowa nde makumi maraaruu dha parata apogo a anamakutha ni apogo a nlogo, wiira: <sup>4</sup>“Gihithaga voopeleka mwazi wa muthu ahithegile”. Aliwa yahimwaakulaga, wiira: “Hiyo niire avi? Ndo saawo weeka”.

<sup>5</sup>Vevale Zhudasi ahivokedhaga korowa nde dha parata mu nyuba ya Mulugu, odhowa wiimagelela.

<sup>6</sup>Apogo a anamakutha yahithukulaga korowa nde, wiira: “Kadhifwaneelele wi nihele moologolela korowa dha mvahi vowi sa mutheengo wa mwazi”. <sup>7</sup>Vano yahiiwananelaga ogulana korowa ndo mudda wa namooba dhibale wi elogohiwegewo anaweendda. <sup>8</sup>Mwahaya buuyene mudda ole ofiyedha peeno oneethaniwiiwa “Mudda wa Mwazi”. <sup>9</sup>Ndala dhihaakwanela dhawogile namavuhulela Zheremiya, eeriliiye: “Ehithukula korowa makumi maraaruu dha parata, mutheengo oyene wathomile ahima amohi aEzarayeli, <sup>10</sup>oguliwana mudda wa namuuba dhibale wona mwemo Nabwiya mwagilamuleliiye”.<sup>8</sup>

### Yesu omuthegoni wa miladdu wa kuminadori Pilatu

(Maruku 15.1-15; Luka 23.1-5,13-25; Zhuwawu 18.33 ofiyedha 19.16)

<sup>11</sup>Yesu ahiimelaga vameentoni va kuminadori, oliye ahimukohaga, wiira: “We oli mwene aZhudewu?” Yesu ahimwaakulaga, wiira: “Onawoga di nyo”.

<sup>12</sup>Vano apogo a anamakutha ni apogo a nlogo emusumelaga kaawaakulege yego. <sup>13</sup>Pilatu ahimukohaga, wiira: “Kuneewa dhaatedhe-

8 27.10 Moone Zakariya 11.12-13; Zheremiya 19.1-13; 32.6-9

ne dhinoosumeliisuna?”<sup>14</sup> Yesu kaakulilege naari ndhu nimohi; mwa ela kuminadori Pilatu ahitikinaga vajinji.

<sup>15</sup>Sowi, mudhidhi wa Othabela wa Paxkwa, kuminadori ahilemeelela omutapula munyakaambura mmohi, oyene athu yamfuniisu. <sup>16</sup>Mudhidhi olene yahikanna munyakaambura mmohi oononeya ni bili ya bure eethaniwa Baraba. <sup>17</sup>Athu egatugumane, Pilatu ahaakohaga, wiira: “Munamfuna aani wi gimutapule, Baraba naari Yesu, oneethaniwa Kirixtu?”<sup>h</sup> <sup>18</sup>Vowi oliye ahinonaga wi empelekele mwaha woomugana.

<sup>19</sup>Pilatu agakaraatile mmuthegoni mwa miladdu, mwihiyanaaye ahirumihaga mutheenga wi yamwaaddele wi: “Pole-pole, ahimukone owogoowa ole, mwaha wi miyo mahiyu gihoona goyi moorohani mwaha waaye”.

<sup>20</sup>Mbwenye apogo a anamakutha ni apogo a nlogo yowaathuzha athu wi emulobe Baraba, empihe Yesu.

<sup>21</sup>Pilatu ahiwelelaga waakoha dila ya nabiili, wiira: “Mwa abiili ala munamfuniinyu wi gimutapule baani?” Aliwa yahaakulaga, wiira: “Baraba!”

<sup>22</sup>Vano Pilatu ahaakohaga, wiira: “Gimwiirena avi Yesu, ola oneethaniwa Kirixtu?” Yahaakulaga aatene, wiira: “Mmukomele vamuraddini!”

<sup>23</sup>Pilatu ahaakohaga, wiira: “Yabure ddi yiiriliyena?” Mbwenye yoweenjedhedhagave okuwa, yiiraga: “Akomeliwe vamuraddini!”

<sup>24</sup>Pilatu agoonile wi kanaddoddavo yego athu ehambeela wiinyuwe-la, ahaalobaga mahinje, ohaba mmadani vameentoni va athu aatene, wiira: “Miyo kaginna muladdu ni mwazi wa muthu ola, mwiirege dhinafuniinyu”.

<sup>25</sup>Athu aatene yahaakulaga, wiira: “Muladdu wa mwazi waaye oni-morele hiyo vamohi ni ahima eehu!”

<sup>26</sup>Vevale Pilatu ahaatapulelaga Baraba, olamula wi Yesu awaxuliwe, nuwindo ompeleka wi akomeliwe vamuraddini.

**Anyakoddo enoomunyemula Yesu**  
(*Maruku 15.16-20; Zhuwawu 19.2-3*)

<sup>27</sup>Vevale anyakoddo a Pilatu yahimuthukulaga Yesu, omudhowagana nyuba yoolibihwi ya kuminadori.<sup>i</sup> Nikuru naatenene na anyakoddo yahitugumanaga omwaapeelela. <sup>28</sup>Omukuguula dhoowara dhaaye, omuwariha mukanjo woofiila.<sup>j</sup> <sup>29</sup>Yahiluwaga kara ya miinga, omuwariha mmuruni mwaaye. Vano omwihiddeeliha bango mundadani naaye na

---

<sup>h</sup> 27.17 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. Moone teto verisikulu 22. <sup>i</sup> 27.27 Naari wi: *Peretoriyo*. <sup>j</sup> 27.28-29 *Mukanjo woofiila* ni kara yaali etoonyihedho ya omwene wa aRoma, ni aZhudewu.

moono wooja, okokoraga vameentoni vaaye, ombeddaga, yiiraga: “Nno-wuulojelani, Mwene a zHudewu!”<sup>30</sup> Yoomutaperaga mare, othukula bango ele omuddwadhagana vamuru.<sup>31</sup> Nuwindo, egamalile ombedda-bedda, yahimukuguulaga mukanjo ole woofiila, omuwaraha dhoowara dhaaye. Vooharela yahimuthukulelaga ode wi yamukomele vamuraddini.

### Okomeliwa wa Yesu vamuraddini

(*Maruku 15.21-32; Luka 23.26-43; Zhuwawu 19.16-27*)

<sup>32</sup> Emaruwaga yahigumanaga ni muthu mmohi a nluwa na oSire-ne eethaniwa Simawu, ola yahimuwaddihedhaga othukula muraddi.<sup>33</sup> Egafiyile mburo oneeriwa Gologotha (enatapulela “Mburo wa Egari-gadhi”),<sup>34</sup> yahimvahaga vinyu oomutaganyihedha ni cowe wi amung'we, mbwenye oliye agamulawihile kamfunilege omung'wa.<sup>35</sup> Nuwindo, egamukomele, yahigawanaga dhoowara dhaaye, yahombezelaga gari wi yoone kadda muthu yaathukuliye.<sup>k</sup> <sup>36</sup> Yahikaraatigi vevale omwiing'anelaga.<sup>37</sup> Vamuraddini, vadhulu va muru wa Yesu, yahikomelagavo ntabwa, valebiwege madhu oomusumelana, owi: “OLA DI YESU, MWENE A AZHUDEWU”.<sup>38</sup> Yesu ahikomeliwana vamuraddini ambava abiili, mmohi omoononi waaye wooja, mmohiya omoononi waaye woong'oto.<sup>39</sup> Athu yaviraga vevale, yoomunyemulaga, ethikaga miru,<sup>40</sup> yiiraga: “Kahuwo weene weera: ‘Ginoodha gibwanyule nyuba ya Mulugu, gimage dila biili mwa malabo maraaru?’ Akala oli Mwaana a Mulugu, okite vamuraddinivo, wiivulumuse weeka!”

<sup>41</sup> Mwa mukalelo mmohive, apogo a anamakutha ni anamasuuziha a Malamulo ni apogo a nlogo yoomunyemulaga yiiraga:<sup>42</sup> “Waavulumusa athu amohi, vano kunaanda wiivulumusa weeka. Oliye di mwene a Ezarayeli! Akita dhiinoveva vamuraddini vale, nneere omuroromela.<sup>43</sup> Amuroromela Mulugu; adhe dhiinova amvulumuse, akala ebaribareene onomudhivela. Vowi onowoga, eeraga: ‘Gili Mwaana a Mulugu’”.<sup>44</sup> Vano ambava ale yakomeliwigiiyena yoombeddaga ni mukalelo mmohive.

### Okwa wa Yesu

(*Maruku 15.33-41; Luka 23.44-49; Zhuwawu 19.28-30*)

<sup>45</sup> Okuma wora ya neekumi nabiili ya mutana yihi yahikuneelaga elabo yaatene, yahilogelaga wora thaaru ogali wooribawene.<sup>46</sup> Okuma wora thaaru dha ciguwo, Yesu ahikuwaga moolibiha, wiira: “*Eli, Eli, lama sabakathani?*” Enatapulela wi: “Mulugu aaga, Mulugu aaga, mugihyele ddi?”<sup>l</sup>

<sup>47</sup> Vano amohi yaaligi vevale yamwiiwaga, yowiiraga: “Onamwiithana namavuhulela Eliyazi”.

<sup>k</sup> 27.35 Moone Masaalimu 22.18    <sup>l</sup> 27.46 Masaalimu 22.1

<sup>48</sup>Mowaaguva mmohi mwa aliwa ahithamagaga, othukula nthoje, obwiniha mvinyuni onyuunya oseredha obangoni, omvaha Yesu wi amung'we. <sup>49</sup>Amohi yowiraga: “Kamwihiyeni! Nimooone akala Eliyazi onaadhe amvulumuse!”

<sup>50</sup>Yesu ahikuwaga dila ya nabiili ni ndhu nooliba, okwa.

<sup>51</sup>Mudhidhi olene guwo yagawa nyuba ya Mulugu<sup>m</sup> yahitaleyaga dhi-paddi biili, okuma vadhulu ofiya muddibani, elabo yahithikeyaga, mabwe yahiparuwaga, <sup>52</sup>masiye yahifuguwaga, athu oweela mirima ajinji yakwile wale yahivenyihwaga muukwani. <sup>53</sup>Egakumile mmasiye mweewa yahivolowaga muZheruzalemi, nluwa noweela, okumelela wa athu ajinji, nda dheereyilege Yesu agavenyihwe muukwani. <sup>54</sup>Sinturiyawu<sup>n</sup> ni ale yamwiing'anelaga Yesu, vooniligiiwa othikeya wa elabo ni dhaatedhene dheereyaga, yahikalagana woova wuulubale, wiira: “Ebaribareene, ola aali Mwaana a Mulugu”.

<sup>55</sup>Vevale vahikalaga ahiyana ajinji, yoonelaga woolapelawene. Yaaligi ale yadhaaga emuharaga Yesu okuma oGalileya wi emukamihedhege. <sup>56</sup>Mwa aliwa aaligi Mariya a oMagadala, Mariya, amaaye a Tiyago ni a Zhuuze, ni mwihiyana a Zebedeyo.

### Ologohiwa wa Yesu

(*Maruku 15.42-47; Luka 23.50-56; Zhuwawu 19.38-42*)

<sup>57</sup>Ociguwoni ahifiyaga muthu mmohi ooreela a oArimateya, ndina naaye Zhuuze. Ola teto aali namasuza a Yesu. <sup>58</sup>Oliye ahidhowaga wa Pilatu, omuloba mwiili wa Yesu. Vano Pilatu ahirumihaga wi emwinke. <sup>59</sup>Vevale Zhuuze agathukule mwiili ole, ahihuruwedhaga ni guwo yoweela ya liinyu. <sup>60</sup>Ohela munsiyeni<sup>o</sup> nixa natopiwe vanibweni. Opigirisa nibwe nuulubale, ofugana omulago wa nsiye ndde, ovenyawo. <sup>61</sup>Mariya a oMagadala vamohi ni Mariya mmohi, yaaligi vevo, okaraati vakukuuve ni nsiye ndde.

### Anamaang'anela a nsiye na Yesu

<sup>62</sup>Nlabo nooharella, nigavirile nlabo noomusasanyedha sabuddu, yahitugumanaga apogo a anamakutha ni aFarizi, odhowa wa Pilatu. <sup>63</sup>Omwaaddela, wiira: “Nabwiya, nnowuubuwelela wi namaratha ole agali mugumi ahiwoga wi: ‘Yavira malabo maraaruu ginoodha givenyihwe muukwani’.” <sup>64</sup>Mulamule wi onsiyeni wule waang'aneliwege ni anyakoddo ofiyedha malabo maraaruu wi dhinaapadduwe edhe anamasuza aaye emwiwiyemo, yawaaddelege athu

---

<sup>m</sup> 27.51 *Guwo yagawa nyuba ya Mulugu yaali guwo yatomeyiwe munyuba ya Mulugu yagawa Mburo Woweela ni Mburo Wowelesesa. Moone Okuma 26.33.* <sup>n</sup> 27.54 *Asinturiyawu yaali asogoleli a anyakoddo zana (100) a Roma.* <sup>o</sup> 27.60 *Masiye a mudhidhi olene yakala wona nikungu.*

wi ‘oliye ohuvenyihiwa muukwani’. Vano oratha woogomihedha wula onaa-kale wootthabwesesa okwaranya wowambeela”.

<sup>65</sup>Pilatu ahawaaddelaga, wiira: “Mwaathukule anyakoddo ala, edhowe yaang'anelegewo onsiyeni wo wona munoobuweleliinyu”. <sup>66</sup>Aliwa yahidhowaga, obandiha selu<sup>p</sup> vanibweni nafugiwegenena onsiyeni wule, waahiyavo anamaang'anela.

### Ovenyihiwa wa Yesu muukwani

(Maruku 16.1-8; Luka 24.1-12; Zhuwawu 20.1-10)

**28** <sup>1</sup>Sabuddu agavirile, ddimingu ebembe mbee, Mariya a oMagadala ni Mariya mmohiwa yahidhowaga onsiyeni.<sup>q</sup>

<sup>2</sup>Mowaaguva wahiiweyaga othikeya wuulubale wa elabo, vowi mungero a Nabwiya ahikitaga odhulu, ofiya, opigirisavo nibwe ndde, okaraatela. <sup>3</sup>Mooneyelo aaye yaaligi wona ozherima, dhoowara dhaaye dhaaligi dhoweelesesa. <sup>4</sup>Vano anamaang'anela yowoovaga, wambeela ogurumela, okalagahi yiire okwa.

<sup>5</sup>Mungero ole ahifiyaga vaaligi ahiyana, wiira: “Muhoove, vowi gihi-nona wi munamusayela Yesu, oyene okomeliwe. <sup>6</sup>Oliye mula kalimo, ohuvenyihiwa muukwani wona mwawogeliye. Mudhe, moone mburo walogohiwiye. <sup>7</sup>Mudhowe mowaaguva mwawaaddele anamasuuzaa aaye, mweere: ‘Oliye ohuvenyihiwa muukwani. Oli osogolo weenyu, onadhowa oGalileya, wewo muneere omoona’. Siyeene yafuniimi wuwaaddelani!”

<sup>8</sup>Vano ahiyana ale yahimaruwaga onsiyeni wule ni waaguva, yoovaga teto ni ohagalala wuulubale, yahithamagaga odhowa wawaaddela anamasuuzaa. <sup>9</sup>Mowaaguva Yesu ahifiyaga ogumana ni aliwa, wiira: “Ginowuulojelani!” Vano aliwa yahimwaaddamelaga omukubaarela manyalo, omweebedha. <sup>10</sup>Nuwindo, Yesu wiira: “Muhoove! Mudhowe mwawaaddele addibilaga wi edhowe oGalileya, wewo eneere ogoona”.

### AZhudewu enowaanyingala anamaang'anela

<sup>11</sup>Vevale ahiyana ale edhowaga, anamaang'anela amohi yahidhowaga oluwani wawaaddela apogo a anamakutha dhaatedhene dheereyile-ge. <sup>12</sup>Aliwa yahitugumanaga vamohi ni apogo a nlogo, wiiwananela waanyingala anamaang'anela ale ni korowa dhijinjidhene, <sup>13</sup>wawaadde-la wi yiirege: “Anamasuuzaa aaye bidhiile mahiyu, wiiyamo mwiili wa Yesu nigonaga. <sup>14</sup>Dheera dhiiweya wa kuminadori dhoopadduwa ndo hiyo nnomukurumula murima wi ooleveleleni”. <sup>15</sup>Anamaang'anela ale yahaakela korowa nde, wiirana wona mwaaddeleliwiwa. Mowindo dhoo-ratha nde dhahivuwihiwa vaari va aZhudewu ofiyedha peeno.

<sup>p</sup> 27.66 *Selu* si etoonyihedho enabandihwana yego yafugiwa wi yafuguliwa yooneyege wi ehifuguliwa. <sup>q</sup> 28.1 Masiye a mudhidhi olene yakala wona nikungu.

**Yesu onowaaruma anamasuuzza aaye mwiilaboni**

<sup>16</sup>Yahivenyaga anamasuuzza ale kumi ni mmohi, odhowaga oGalileya, omwaangoni oyene Yesu waatoonyihedhiye. <sup>17</sup>Vano egamoonile yahimweebdhaga mbwenye amohi yowaanganyedhaga. <sup>18</sup>Yesu ahifiyaga vakukuuve wawaaddela, wiira: “Owodha waatewene ovahiwe wa miyo, odhulu ni elabo ya vati. <sup>19</sup>Mwaha wa ela nyo dhowani wa malogo maatene, mwaarugunuse ekale anamasuuzza aaga. Mwaabathizege mu ndina na Baba, na Mwaana, ni na Muneba Woweela, <sup>20</sup>mwasuuzihaga ologolela dhaatedhene dhedho miyo dhowaaddeliimini. Muubuwelege wi miyo gili ni nyo malabo maatene, ofiyedha omakuthulo wa elabo ela”.